

O Le ihona


Mauaina o Lou Auala i le
Ola Tutoatasi, i. 32, 40–43

Malumalu ma Talafaasolopito
o Aiga: O Se Valaaulia mai ia
Peresitene ma Sister Nelson, i. 14

Faatoa Papatiso Talu Ai Nei? E Mafai
Ona E Auauna Atu i le Taimi Nei i le
Malumalu, i. 20

O Laasaga e Tolu i le Foiaina o
Feteenaiga i Faaipoipoga, i. 22





O solofanua ma taavaletoso e pasi atu i le Malumalu o Sate Lekí, o loo faaaltia iinei i le pe a o le 1891. Sa avea Uilifoti Utilafí (1807-98) ma Peresitene o le Ekalesia i le taimi na faapaaina aile Malumalu o Sate Lekí i le 1893. Sa ia aoao mai, "O le a faamasinoina i tatou mo le . . . fausainá o malumalu i le Silisilise, ia e mafai ora tatou ulufale ai e faia sauniga paia mo le faaolaina o o tatou tagata otí" (Aooga a Peresitene o le Ekalesia: Wilford Woodruff [2004], 94).

Ata male faaaloaloga a le Potutusi
o talataasolopito o le Ekalesia

O Le Liahona, Oketopa 2017



O SAVALI

- 4 Savali a le Au Peresitene Sili: Avea ma ni Soo Moni**
Saunia e Peresitene Henry B. Eyring
- 7 Savali a Faiaoga Asiasi: Opogi ma le Alofa i Latou E Se Ese**



I LE FAAVAA
Ata na pueina e Leslie Nilsson.



TALA FAAALIA


- 14 Tatala le Lagi e ala i Galuega o Malumalu ma Talafaasolopito o Aiga**
Saunia e Peresitene Russell M. Nelson ma Wendy W. Nelson
O le Faaeaga o se mataupu faale-aiga. E nao sauniga faaola lava o le talalelei a Iesu Keriso e mafai ona faaeaina ai aiga.
- 20 Ia Illoa Muamua ae E te Lei Alu: Papatisoga i le Malumalu**
Saunia e Heather J. Johnson
Ile avea ai o se tagata fou fo le ekalesia, e mafai ona e auai atu i le taimi lava lea i le malumalu ma se pepa faataga o le malumalu e tapu-la le faaaogaina. O nisi nei o tali i ni au fesili e ono i ai ae e te lei alu.
- 22 Foia o Feteenaiga i Lau Faaipoipoga**
Saunia e S. Brent Scharman
Pe a foia feteenaiga, e mafai ona sui tulaga i ai ni mamanu fou.
- 28 Mauaina o le Fesoasoani i le mavae ai o le Maliu o Nancy**
Saunia e Darren Wilcox
E mafai faapefea ona suitulaga le toafilemu i lou tiga lofituina?



- 32 "Ia Tatou Ola Faalagolago ia i Tatou Lava ma la Tutoatasi"**
O le a le polokalama taimua a le Ekalesia o le ola tutoatasi, ma e mafai faapefea ona fesoasoani ia te oe?


MATAGALUEGA

- 8 Tatou te Talanoa ia Keriso: E Le o Tuai mo se Avanoa Lona Lua**
Saunia e Amber Jensen
- 10 Aoao Atu i le Ala a le Faaola: O Se Elefane i totonus o le Potuaoga**
Saunia e Jessica Griffith ma Richard M. Romney
- 38 O Ata o le Faatuatua: Ilir Dodaj**
- 40 O Leo o Le Au Paia o Aso e Gata Ai**
- 80 Seia Tatou Toe Feiloai: Fesoasoani i se Tasi i le Aso**
Saunia e Peresitene Thomas S. Monson



44

- 44 O Lesona e Lima mo le Autalavou Matutua mai i Aposetolo Talavou**
Saunia e Matthew C. Godfrey
O le a se mea e mafai ona tatou aoao ai i le aso mai aafiga o nisi o uluai Apostolo o le Toefuataiga?



58

50 O Se Uiga Faa-Keriso

Saunia e Elder David A. Bednar

*O Iesu, o le na sili ona puapuagatia, ua sili ona agaalofa ia i tatou uma o e ua sili ona itiiti o tatou puapuaga.***54 O le Auala e Mafai ona Suia ai e se savali o le Konafesi Lou Olaga**

Saunia e Hadley Griggs

*O le a se mea e tatau ona e taulai atu i ai i le konafesi lenei? Ia fai le suega puupuu lenei e iloa ai!***58 Pipii Mau**

Saunia e Lindsay Hiller

*Sa tauanaau au e lau tupulaga e inu le ava, ae tau mai loa e se tasi o tama se mea ia te au na suia ai lou olaga.***60 Momotu le Sitaili "Masani a le Tupulaga"**

Saunia e Charlotte Larcabal

*E te manao e talepe talitonuga taatele? O le taimi lenei e tulai ai ma gaoioi!***62 Pepa Lautele o I Ai se Savali: Alu Ae i le Faatuatua****63 Tali mai Taitai o le Ekalesia: O le Auala e te Illoa ai mo Oe Lava**

Saunia e Peresitene Henry B. Eyring

64 Fesili ma Tali*E faaopoopo atu i le tatalo ma le suesueina o tatususiga paia, o le a se auala sili ona lelei e faamalosia ai la'u molimau?*

66

66 Mai Pale i Sapporo

Saunia e Amie Jane Leavitt

*Ua i ai uma i tamaiti i Farani ma Iapani se mea e tulimatai atu i ai: o se malumalu fou!***68 O Tali mai se Aposetolo: E mafai faapefea ona fesoasoani mai le Agaga Paia ia te au?**

Saunia e Elder Robert D. Hales

69 O La Tatou Itulau**70 O le Malaga a Sieni**

Saunia e Jessica Larsen

*O le leai ai o se vaa, o le a faapefea ona oo atu le aiga o Sieni i Navu?***72 Sara ma le [Fa'aata] MRI**

Saunia e Juliann Doman

*Sa fefe Sara e fai se fa'aata MRI. O le a se mea e mafai ona ia faia e maua ai lagona lelet?***74 Ata Faatusa o le Talafaasolopito o le Ekalesia: O Se Perofeta Fou****75 Fesoasoani Atu, e Tasi le Penitala i le Taimi**

Saunia e Caleb H.

*Sa manao Caleb e fesoasoani i tagata sulufai—ma sa faapena foi isti tamaiti!***76 Tala ia lesu: Na Asiasi Mai lesu ia Iosefa Samita**

Saunia e Kim Webb Reid

79 Itulau e Valivali: O Le Sapati o se Aso Paia

OKETOPA 2017 VOL. 41 NU. 10
O LE LIAHONA 14450 890

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostetolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: Randall K. Bennett, Carol F. McConkie

Fautua: Brian K. Ashton, Bonnie H. Cordon, LeGrand R.

Curtis Jr., Sharon Eubank, Christoffel Golden, Douglas D.

Holmes, Erich W. Kopischke, Larry R. Lawrence

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Cremilda Amaral

Au Tositusi ma Faatonutonu: Maryssa Dennis, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Jon Ryan Jensen, Charlotte Larcabal, Michael R. Morris, Eric B. Murdock, Sally Johnson Odeirkir, Joshua J. Perkey, Jan Pinborough, Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Todd R. Peterson

Au Mamamu: Jeanette Andrews, Fay P. Andrus, C. Kimball Bott, Thomas Child, David Green, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Connie Bowthorpe Bridge, Julie Burdett, Thomas G. Cronin, Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy K. Vellinga

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le *Liahona*.ids.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O le *Liahona* (o lona uiga i le Tusi a Mamona o le "tapasa" po o se "faatomuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalaoia, Siekisolovakia, Tenimaka, Take, Igilisi, Esitonua, Fiti, Finelani, Farani, Siamani, Eleni, Hanikeri, Initu, Iselani, Initonua, Italia, Japani, Kiripati, Korea, Latvia, Lithuania, Malakasa, Maselai, Monokolia, Nouei, Polani, Potukale, Romania, Rusia, Samoa, Saina (ua faafaigofeina), Silovenia, Sipanilo, Suetenua, Swahili, Tagaloka, Tahiti, Tai, Toga, lukureini, Urutu, ma Viatename. (E esesea lava gagana.)

© 2017 Puletaofia o le Intellectual Reserve, Inc. Ua taofia aia tatau uma. Lomia i le lunaité Setete o Amerika.


Faamatatalaga o le Puletaofia: Vagana ua faailoa atu, e mafai e tagata taitoatasina ona kopina anomaea mai le *Liahona* mo lo latou faaaogaina patino, ma le saili tupe (e aofia ai mo valaauga o le Ekalesia). O lenei aia tatau e mafai ona faaleaoagaina i sooo se taimi. O anomaea o mea faintino e le mafai ona kopina pe afai o loo faailoa mai se faasa i le laina o loo i ai ma le faatuifugaga. O fesili mo le Puletaofia e tatau ona faatuatusi mai i le Intellectual Property Office, 50 E., North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

For Readers in the United States and Canada:

October 2017 Vol. 41 No. 10. O Le Liahona (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 68, 72

Alofa, 7

Aso Sapati, 79

Auauna atu, 38, 75, 80

Avea ma Soo, 4

Faaipoipoga, 22

Faamafanafana, 28, 72

Faatuatua, 28, 32, 62

Faavauvau, 28

Filemu, 28

Fonotaga a le aufono a faiāoga, 10

Galuega, 32, 41, 43

Galuega faalemalumalu, 14, 20, 66

Iesu Keriso, 28, 50, 76

Konafesi aoao, 54

Le Atua le Tama, 4, 7, 8, 14, 38, 63, 76

Maliu, 28, 38

Malumalu, 66, 69

Molimau, 63, 64

Natura paia, 60

Ola tutoatasi, 32, 40, 41, 42, 43

Salamo, 8

Suesue i tusitusiga paia, 64

Tagata fou [o le ekalesia], 20

Tagata sulufai, 75

Talafaasolopito o aiga, 14

Talafaasolopito o le Ekalesia, 44, 70, 74, 76

Tatalo, 63, 64

Upu o le Poto, 58

Uunaiga a tupulaga, 58



Saunia e
Peresitene
Henry B. Eyring

Fesoasoani
Muamua i le Au
Peresitene Sili

AVEA MA NI SOO MONI

Isauniga faamanatuga uma, tatou te maua ai le avanoa e tautino atu ai i le Tama Faalelagi o le a tatou manatua pea le Faaola ma tausi Ana poloaiga ina ia tatou maua Lona Agaga e faatasi ma i tatou (tagai Moronae 4:3; 5:2; MF&F 20:77, 79). O le manatuaina o Ia o le a oo mai i taimi uma ia i tatou e pei ona masani ai a o tatou tauave i o tatou luga Lona suafa. E tele auala tatou te faia ai ae maise lava pe a tatou auauna atu i isi i Lona suafa, faitau i Ana fetalaiga paia, ma tatalo ia iloa mea ua Ia finagalo tatou te faia.

Sa tupu ia te au ao ou faatinoina le papatisoga o se alii talavou. Sa ou iloa na valaaufina au e auauna faauufina a le Faaola e avea o se faifeautalai e aoao atu Lana talalelei ma molimau atu e uiga ia te Ia ma Lana Ekalesia moni. Sa ma folafola atu ma lau soa faifeautalai i le alii talavou, o le a faamamaina o ia e ala i le mana o le Togiola a Iesu Keriso pe a salamo o ia ma faatuatua i le Faaola ma sa papatisoina e se tasi o Ana auauna faamaoniaina.


Ao ou aveina ae le alii talavou mai le vai o le faatanoa o le vai papatisoga, sa musumusu mai o ia i lo'u taliga, "Ua ou mama, ua ou mama." I lena taimi, sa ou manatua ai le papatisoga o le Faaola e Ioane le Papatiso i le Vaitafe o Ioritana. E le gata i lena, sa ou manatua ai sa ou faia le galuega laveai a se Faaola toetu ma soifua—lea sa auai ai le Agaga Paia, e pei ona sa i ai Ioane.

Mo au ma mo i tatou taitoatasi, o le manatuaina o le Faaola e mafai ona sili atu nai lo o le faalagolago i se manatuaga o lo tatou malamalama ma aafiaga faatasi ma Ia. E mafai ona tatou faia i aso uma filifiliga tatou te latalata atili atu ai i le taimi nei ia te Ia.

Atonu o le filifiliga aupito faigofie lava o le faitau o tusitusiga paia. O le faia o lena mea, e mafai ona tatou maua ai lagona o le latalata atu ia te Ia. Mo au lava, o le latalata atu e masani lava ona oo mai pe a ou faitau i le Tusi a Mamona. I uluai minute ou te faitau ai i mataupu o le 2 Nifae, ou te faalogoina ai i lo'u mafaufau ia leo o Nifae ma Liae o faamatalaina le Faaola e pei sa la masani lelei ia te Ia. E oo mai se Igona o le vavalalata.

Mo outou, atomu o isi nofoaga i tusitusiga paia e faapitoa ona outou latalata atu ai ia te Ia. Ae po o fea lava ma po o le a foi le taimi e te faitau ai i le afioga a le Atua, faatasi ai ma le lotomaulalo ma le manatu tonu i ai e manatua ai le Faaola, o le a faapea ona faateleina ai lou naunau e tauave Lona suafa i ou luga i lou olaga i aso taitasi.

O lena naunau o le a suia ai le ala e te auauna ai i le Ekalesia a le Alii. O le a e tatalo i le Tama Faalelagi mo le fesoasoani i le faalauteleina [o se valaauga] e tusa lava pe foliga atu ia te oe o se valaauga faatauvaa. O le fesoasoani o le a e talosagaina o le gafatia lea e faagalo ai oe lava ae taulai atili atu i le mea e finagalo ai le Faaola mo i latou ua



valaaufina oe e te auauna i ai.

Na ou lagonaina Lona aao ma Lona latalata mai i lau auaunaga faatasi ma le ma fanau ina ua ou tatalo ia iloa le auala e fesoasoani ai ia i latou ia maua le filemu lea e na o le talalelei na te aumaia. I taimi faapena, sa ou le popole lava i le iloa mai o au o se matua faamanuiaina, ae sa matua ou popole lava mo le faamanuiaina ma le manua o lau fanau.

O le naunau e tuuina atu ia i latou tatou te auauna i ai mea o le a tuuina atu e le Faaola ia i latou, e taitai atu ai i tatalo o ni *auganiga* moni i le Tama Faalelagi, i le suafa o Iesu Keriso. A tatou tatalo i le ala lena—i le suafa o le Faaola, faatasi ai ma le faatuatua ia te Ia—e tali mai le Tama. Na te auina mai le Agaga Paia e taiala, faamafanafana, ma faamalosiau i tatou. Aua o le Agaga e molimau mai e le aunoa i le Faaola (tagai 3 Nifae 11:32, 36; 28:11; Eteru 12:41), e faateleina lo tatou gafatia ona alofa atu i le Alii

ma o tatou loto, mafaufau, ma malosi atoa (tagai Mareko 12:30; Luka 10:27; MF&F 59:5).

O faamanuiaga o le manatuaina i aso taitasi ma le taimi nei, o le a tumau le oo malie mai a o tatou auauna atu ia te Ia, taumamafa i Ana

afioga, ma tatalo atu ma le faatuatua i Lona suafa. Ma o lenei manatuaga o le a mamanu ai i tatou ia avea ma ni soo moni o le Alii o Iesu Keriso i Lona malo i lenei lalolagi—ma mulimuli ane faatasi ma Lona Tama i le lalolagi mamalu a sau. ■

AOAO ATU MAI LENEI SAVALI

Ua fautuaina i tatou e Peresitene Eyring, ia manatua e le aunoa le Faaola e ala i le faia o filifiliga i aso taitasi tatou te latalata atili atu ai ia te Ia. Faatasi ai ma i latou e te aoaoina, atonu tou te faituina tatalo o le faamanatuga, lea o loo taua mai ai le feagaiga ia tatou manatua pea o la (tagai Moronae 4:3; 5:2; MF&F 20:77,

79). Mafaufau e valaaulia i latou e te aoaoina e tusi se lisi o mea e mafai ona latou faia i aso taitasi ia manatua ai le Faaola. E mafai foi ona e mafaufau e valaaulia i latou e tatalo i le Tama Faalelagi mo le tulaga manua ma le soifua maloloina o le tasi ma le isi. Mafaufau foi e tatalo mo i latou i lea lava tulaga e tasi.



AUTALAVOU


Manatuaina o le Alii i Aso Uma

Uo, feau, meaaoga, TV—e tele naua mea e manao mai mo lo tatou taulai atu. Ae o vaiaso uma lava, ua tatou folafola atu ai i le Tama Faalelagi, “[tatou] te manatua pea [Lona Alo, o Iesu Keriso]” (MF&F 20:79).

Fai mai Peresitene Eyring e mafai ona tatou “faia i aso uma filifiliga” e fesoasoani tatou te manatua ai le Faaola. Mafaufau e fai se sini i le masina lenei ia manatua atili ai le Faaola i aso taitasi. E mafai ona e faia se kalena ma tautino e fai se mea e tasi i le aso e atina ae ai

lou sootaga ma la. Sa lisi mai e Peresitene Eyring ni mea e pei o le faitauina o tusitusiga paia, tatalo i le faatuatua, ma le auauna atu i le Faaola ma isi. O loo i ai foi le tusia o talaaga, auai i sauniga Lotu, faalogologo i konafesi aoao, alu i le malumalu, usuina o viiga—e alu pea le lisi! Pe a tatou manatua le Faaola i aso uma, ua folafola mai e Peresitene Eyring, “o le a oo malie ma tumau mai faamanuiaga . . . [ma] o le a mamanu ai i tatou ia avea ma ni soo moni o Iesu Keriso.”


O KETO PA



TAMAITI

Tele o le Alofa

Pe a tatou faitau i tusitusiga paia pe tatalo, e mafai ona tatou lagona le tele o le alofa o le Tama Faalelagi ma lesu Keriso ia i tatou. Valivali se fatu i taimi taitasi e te tatalo pe faitau ai au tusitusiga paia. O le a se isi mea e mafai ona e faia ia lagona ai le latalata atu i le Tama Faalelagi ma lesu?



Opogi ma le Alofa i Latou o E Se Ese

Ia suesue ma le agaga tatalo lenei savali ma saili mo uunaiga ia iloa ai mea e faasoa atu. E faapefea e le malamalama i le faamoemoega o le Aualofa ona saunia afafine o le Atua mo faamanuiaga o le ola e faavavau?

“O le mea moni lava e leai ni aiga e atoatoa . . . ,” o le sau-noaga lea a Peresitene Dieter F. Uchtdorf, Fesoasoani Lua i le Au Peresitene Sili. “Po o a lava ni faafitauli o loo feagai ma lou aiga, po o le a lava le mea e tatau ona e faia e foia ai, o le amataga ma le faaiuga o le vai-fofo o le alofa mama, le alofa le pona o Keriso.”¹

E uiga ia i latou o e e le o auai atoatoa i le talalelei, na saunoa mai ai Linda K. Burton, o le sa avea muamua ma Peresitene Aoao o le Aualofa: “E alofa le Tama Faalelagi i Ana fanau uma. . . . E le afaina po o fea o i ai i latou—i luga po o fafo ma le ala—E finagalo o la ia latou toe o mai i le aiga.”²

Na aoao mai Peresitene Iosefa F. Samita (1838–1918), “Po o le a lava le faalogotata e i ai [lau fanau], . . . pe a e tautala pe talanoa atu ia i latou, ia aua le faia i le ita, aua le faia ma le sauia, i se agaga o le tausalaga.” “Tautala atu ia i latou ma le agalelei.”³



Faaatuatua

Aiga

Toomaga



Na toe taua e Elder Brent H. Nielson o le Fitugafulu le aoaoga a le Faaola ia i latou o e ua i ai tipe siliva e 10 ma na leiloa le tasi: “Ia saili seia oo ina maua. Pe a leiloa se tasi o ou atalii po o ou afafine, lou uso po o lou tuafafine, . . . a uma ona faia o mea uma tatou te mafaia, tatou te alolofa i lena tagata ma o tatou loto atoa. . . .

“Tau ina ia tatou mauaina le faaliga ia iloa ai le auala silisili e talanoa atu ai ia i latou i o tatou olaga o e ua leiloloa ma, pe a talafeagai ai, ia maua le onosai ma le alofa o lo tatou Tama i le Lagi ma Lona Alo, o Iesu Keriso, a o tatou alolofa atu, vaavaai, ma faatalitali mo le atalii faamaumau oa.”⁴

Na saunoa Peresitene Henry B. Eyring, Fesoasoani Muamua i le Au Peresitene Sili: “Na ou tatalo ma le faatuatua ina ia saili ma lagona e se tasi ou te alofa i ai le mana o le

Togiola. Na ou tatalo ma le faatuatua ina ia oo mai ni agelu tagata e fesoasoani ia i latou, ma sa latou oo mai.

“O loo i ai i le Atua se auala ua fuafuaina e laveai ai Ana fanau taitoatas.”⁵

Mau Faaopoopo ma Faamatatalaga

Mataio 18:12; Alema 31:35;
3 Nifae 13:32; MF&F 121:41–42;
reliefsociety.lds.org

Mafaufau i le
Mea Lenei

E mafai
faapefea ona
faauau ona
tatou faaali
atu le alofa
mama ia i
latou o e e le
mananao e
ola i mataupu
faavae o le
talalelei?

FAAMATALAGA

1. Dieter F. Uchtdorf, “I Le Viiā ai o i Latou o E Laveai,” *Liahona*, Me 2016, 79, 80.
2. Linda K. Burton, i le Sarah Jane Weaver, “Sister Burton, Sister Wixom Visit Church’s Pacific Area,” *Church News*, Ape. 2, 2013, lds.org/church/news.
3. *Aoaoga a Peresitene o le Ekalesia: Iosefa F. Samita* (1998), 252.
4. Brent H. Nielson, “Faatalitali mo le Faamaumau Oa,” *Liahona*, Me 2015, 103.
5. Henry B. Eyring, “I Le Fanau a La’u Fanau,” *Liahona*, Nov. 2013, 71.

E LE O TUAI MO SE AVANOA LONA LUA

Saunia e Amber Jensen

Sa tau atu e le tama i lona afafine, o se tasi o au tamaitiiti aoga sa tauivi ma le aoga, "E le o tuai ona e [taumafai] ia manuia lau aoga." Ua tuu mai e le Alii ia i tatou lea lava savali e tasi.

Sa i ai Sandra i lau vasega Igilisi e mauluga atu. Na o ni nai vaiaso talu ona amata le tausaga, ae na te lei faia lava se meaaoga mai le fale po o galuega faatino. Sa na o le sioa lava i lana kesi. Sa ia faia ni alofaga mo mafuaaga sa lei uma ai ana meaaoga, ma na te lei faaalia foi le agaga po o galuega sa manaomia mo le faamanuiaina i se vasega luitauina.

Sa tonu loa ia i ma'ua ma lana faufautua e faatulaga se fonotaga ma Sandra, lona tama, ma nisi o ana faiaoga e iloilo ai le tulaga e tatau ona ia agai i ai: pe tatau ona ia tuua vasega maululuga atu ae ave ni ana vasega masani. O le mea aupito taua sa matou mafaufau uma i ai o le: mata matou te maua se auala e fesoasoani ai ia Sandra ia faamanuiaina?

O le talitonu ai e faapea, sa tele ni avanoa na tuuina atu ia Sandra ia manuia ai, ae sa filifili lava e toilalo, o lea na ou alu atu ai i le fonotaga ma le lagona o le lotovaivai tele. Sa faalilolo ona ou faamoemoe o le a filifili o ia e aluese ma la'u vasega ina ia ou le toe popole ai ia te ia. Sa ou manatu, ua ou faia mea uma sa ou mafaia ma ua fai lava si tuai.

I le fonotaga, sa faaalia lava i taga a Sandra sa ia masalomia foi lona mafai ona faamanuiaina [i la'u vasega] Sa faataupupula atu o ia i le laulau ao ou faamatalaina lona le pasi i le vasega Igilisi. A o faamautu mai e lona fai-aoga o talafaasolopito e faapea, sa le pasi foi Sandra i lana vasega, sa atili ai ona faamimigi o ia i lona nofoa ma na mafai ona ou iloa atu le tafe ifo o ona loimata i ona foliga.

O le lagonaina ai o le agaalofa, sa ou faamalamalama atu ai ia te ia ma lona tama e faapea, afai e fia manuia Sandra i nei vasega luitauina, e tatau la ona sui lana amio lea na ala ai ona oo i lenei lua loloto, ma o se mea o le a matuai faigata lava.

O se Savali mai Lona Tama

Ona faliu atu lea o le faufautua i le tama o Sandra, o se alii sa le tele sona aaooina, o le sa foliga mai sa le lagolelei i le tulaga o le aoga. Sa fesili atu i ai le faufautua pe sa i ai ni ana fesili mo faiaoga. Sa fai mai o ia e leai, ma na faafetai mai mo mea na matou faia mo Sandra. Ae sa fai mai, sa i ai sana tala e fia fai atu i lona afafine.

Sa popole lo'u loto. Sa ou i ai i nisi o fonotaga a matua ma faiaoga lea na otegia ai e matua a latou fanau i luma o faiaoga ma faufautua, ma faitioina i latou ona o lo latou paie, le faalogo, ma le leai o se naunautai. Sa ou sauniuni e toe faalogo foi i ai.

Ae o le mea na ou faalogoina, sa faateia ai au. Sa liliu atu le tama lotomaulalo o Sandra i lona afafine e 16 tausaga ua tagi, o le sa matuai maulalo lava i le maasiasi ma le faanoanoa ma faapea atu ia te ia, "E le i tuai lava. E le i tuai lava mo oe le faamanuiaina. O le mea moni e le i tuai lava."

Sa ou tuua lena fonotaga ma le agaga faafetai mo lenei tali atu ma le agaalofa peitai sa popole, faapea sa matuai leai ma sona silafia i le mea o le a manaomia mo lona afafine ia pasi ai i le taimi lea. Sa foliga mai o se mea faigata. Sa oo mulimuli mai le tala e faapea, sa tonu ia te ia e aluese mai lana vasega o le talafaasolopito ae le o la'u vasega Igilisi.

I se taimi mulimuli ane o lena aso a o ou tootuli i le tatalo, sa ou mafaufau ai i ou lava faaletonu ma ole atu i lou Tama Faalelagi mo se faamagaloga, sa ou iloaina ai le tele o se mea na ou



aoaoina mai i le tama o Sandra. O le le mautonu ma lagona o le le atoatoa sa faapea ona i ai taimi o lou lava olaga sa ou mafaufau ai pe sa ou agavaa pe sa tatau ona maua se avanoa lona lua. I na taimi, sa filifili ai le Alii, e pei o le tama o Sandra, e le faitioina au ae faamautinoa mai: "E le i tuai lava, lou afafine. E le i tuai lava."

O le Savali o le Talalelei

Pe ua faafia ona tatou talitonu i le savali a le fili e faapea, ua leai so tatou faamoemoe? Ae peitai, e ese le mea ua tau mai e perofeta ia i tatou. Ua folafola mai Isaia, "A ia foi mai ia Ieova, ona alofa mai lea o ia ia te ia; ia foi mai i lo tatou Atua, aua na te matua faamagaloina" (Isaia 55:7). Ua faoopoop mai e Mamona lana molimau,

"Soo se taimi sa latou salamo ai ma saili le faamagaloga, ma le faamoe-moe faamaoni, sa faamagaloina i latou" (Moronae 6:8). O le olioli o le talalelei o le, e le taitai lava ona tuai. Aua pe faafia lava ona tatou sailia le faamagaloga, o le a faataga e le togiola a le Alii i tatou e fai se amataga fou.

Faatasi ai ma se uunaiga, sa faia ai e Sandra ni suiga malie ae taua. Sa le faigofie le suiga—sa manaomia ai se taumafaiga i aso uma e faatoilalo ona mausa le lelei—ae sa ia vaaia taui o ana taumafaiga a o faasolosolo ina faaleleia ona togī.

Mai se vaaiga o le talalelei, o le tatou togi faaiu o le a le taulia ai po o le a le umi na tatou pauu ai pe o le a foi le mamao na tatou se ese ai. Nai lo o lena, o le a faamasino e le Alii

o tatou olaga e faavae i le itu o loo tatou o i ai, pe na faapefea ona tatou salamo, ma po o le a le tele na tatou faalagolago ai i le Togiola a le Alii.

I lou malamalama faalelava, sa ou masalomia ai le mafai e Sandra ona faatoilalo ana mea sese i le taimi ua tuanai. O le eseesega, e le taitai alu ese le faamoemoe o lo tatou Tama atoatoa i le gafatia o Ana fanau e ausia ai le faaolataga e ala i le faaatoatoaina ia Keriso. E le afaina pe o le a le mamao ua tatou se ai; o le a Ia saili pea mo le tasi. Ua augani mai le Alii ia i tatou, ia aua le toe feoai solo e pei o ni tagata ese i le agasala ae nai lo o lena, ia saili atu ia te Ia i le faamoemoe ma fiafia i faamanuiaga o Lana Togiola e le iu. E moni, e le tuai lava. ■

E alala le tusitala i Virginia, ISA.

O SE ELEFANE I TOTONU O LE POTUAOGA

O fonotaga a aufono a faiaoga e le nao le suia ai o le auala tatou te aoao atu ai; ua latou suia le ala tatou te aoao ai.

**Saunia e Jessica Griffith
ma Richard M. Romney**
Mekasini a le Ekalesia

Ua feagai Mzwakhe Sitole ma se lui-tau. O le avea ai ma peresitene o le Aoga Sa a le uarota, ua ia te ia se tiute-tauave na tuuina mai e le Atua e fesoasoani e faaleleia le aoaoina mai ma le aoaoina atu o le talalelei i le uarota.¹

Ae peitai, o tagata o lana uarota i Johannesburg, i Aferika i Saute, i nisi o tulaga, e matuai eseese lava mea latou te silafia ma faamoemoega O nisi sa lelei a latou aoga; o isi e leai. O le toatele lava na aoaoina e faapea, o le tulaga o se tagata aoga o le faalogo, ae le o le tautala. O isi ua feagai ma se luitau faigata faaleaganuu i le malamalamaga e faapea, e tatau ona aafia *uma* alii ma tamaitai i le aoao atu i le lotu ma i le aiga.

Fai mai Brother Sitole, “E i ai foi o matou tagata o e tautatala i ni gagana eseese.” “Peitai e finagalo le Agaga e uunaia i latou taitoatasi.”

Ina ua faalauiloa mai fonotaga a aufono a faiaoga ma le *Aoao Atu i le Ala a le Faaola* i le tausaga ua tuanai atu, sa faapea ona amata loa e uarota ma paranesi i le Ekalesia atoa ona fai fonotaga a le aufono a faiaoga e talanoa ai, aoao ai e uiga i le, ma faataitai ai le mea e tau o le aoao atu i le ala a le Faaola.

O le taimi lena na amata vaaia ai e Brother Sitole le auala e mafai ona faamanuia ai e fonotaga a le aufono a faiaoga ia lana uarota. E mafai ona soalaupuleina ai luitau faaleaganuu, e mafai ona faateleina ai le auai i vasega, ma mafai ona avea ma ni faamanuiaga ia finagalo faaalia eseese o le au paia.

E pei lava o le toatele o isi i le lalolagi atoa, na iloa e Brother Sitole, e le o faaaogaina e le Alii fonotaga a le aufono a faiaoga ia tau lava ina sui ai le ala tatou te aoao atu ai; ua Ia faaaogaina foi e sui ai le ala tatou te aoao mai ai.

O Se Elefane faatasi ma se Vaaiga Tulaga Ese


O se tasi o mea aupito sili ona manaia na iloa e Brother Sitole o le, pe a musuia e faiaoga ia tagata aoga e auai i lo latou lava aoaoina, e faapea ona manuia ai tagata uma mai le vaaiga lautele lea e tuuina mai e finagalo faaalia eseese.

Na oo mai lena malamalamaaga ia Brother Sitole ao faagaso se fonotaga a le aufono a faiaoga, ina ua faasoa mai e se tagata o le uarota se faataoto e uiga i ni alii tauaso ma le

Maea



Puipui



Ili



elefane, ua nao se mea e faamalie ai. O le faataoto i le auala na faamatala eseese ai e ni alii tauaso e toaono se elefane (o le vae e pei o se pou, o le siusiu e pei o se maea, o le isu e pei o le faagaau e sau ai le vai, ma isi mea faapena) ona e tofu lava le tagata ma se vaega ese o loo tago i ai.²

“A faapea la o le elefane ua faatusa i aoaoga o le talalelei,” na fai mai ai Brother Sitole. “E manaomia la ona mafai e tagata taitasi o le vasega ona faasoa mai o latou manatu, a tuufaatsasi loa, ona tatou maua lea o se malamaaga tutusa i auala e faamanuia ai i tatou uma e le talalelei.”

O le mafuaaga lena e nonofo faata-milo ai i se laulau i taimi uma faiaoga o le uarota a Brother Sitole i le taimi o le fonotaga a le aufono a faiaoga—e faafaigofie le talanoaga. Fai mai a ia,

“E faamanatu mai ai ia i tatou, e tutusa uma lava le taua o leo o tagata uma.”

E Tusa ma o Latou Manaoga

I Tokyo, Iapani, sa le talitonu lava Natsuko Soejima e mafai ona lelei lana aoao atu. “Ina ua valaauna au e avea ma se faiaoga a le autalavou i le Aoga Sa,” fai mai o ia, “Sa ou fai atu i le epikopo, o le a ou fefe. Ae sa sauna mai o ia, o le valaauga sa mai le Atua, o lea na ou taliaina ai.”

I le avea o se vaega, sa taufaafefe le vasega ia te ia ona o luitau taitasi sa latou tuuina mai. E toalua le autalavou sa faletonu le faalogo. O nisi o tagata o le vasega o e na siitia atu i Iapani mai isi atunu sa nao le Igilisi sa tautatala ai. Sa popole foi o ia i le eseesege i le va o ona tausaga ma [tausaga] o tagata o lana vasega.

Ona oo lea i se fonotaga a le aufono a faiaoga, sa faapea ona maua ai e Sister Soejima se tali. “Sa matou talanoa e uiga i le alofa i tagata taitoatasi o le vasega, iloa o latou igoa, tatalo mo i latou taitoatasi, ma aoao atu—i le taialaina ai e le Agaga—e tusa ma o *latou manaoga*,” sa ia faamatala mai ai, “o le mea la lena na amata ona ou faia.” Sa ia faia foi se isi mea sa ia aoaoina mai i le aufono: “Sa ou faaaogaina le gagana na faailoa atu ai lo’u alofa.”

O le taunuuga? “Na suia lo’u loto. Sa amata ona ou lagona le alofa mo a’u tamaiti aoga. Sa ou popole mo i latou o e sa le auai mai ma tatalo mo i latou foi. O le taimi lava e uma ai le tasi o lesona, e amataina ai ona ou tapena mo le isi lesona, ina ia ou maua le taimi e mafau-fau ai e uiga i avanoa e aoao atu ai. Sa matuai tumu au i le olioli.”

Pou



Faagaau



Tao



Tali Maoti

Ua faamautinoa e Brad Wilson, o se peresitene o le Aoga Sa i Minesota, ISA, e le tuumuli faiaoga i le fonotaga a le aufono a faiaoga, seiiloga ua latou talanoaina auala o le a latou suia, ona o mea ua latou aoaoina.

“Matou te mulimuli i le faataatiga o loo tuuina mai i le *Aoao Atu i le Ala a le Faaola*,” o le tala lea a Brother Wilson. “Matou te talanoa i aafiaga a faiaoga, ona matou faasoa lea i se autu e tasi na fautuaina mai. I le avea ai ma se tagata e faafagofieina le talanoaga, ou te tuuina atu ni fesili ma aotele manatu. Ona matou faataitaia lea o le faaaogaaga. Matou te vaevae i vaega toalaiti ma soalaupule, ‘O le a se mea o le a ese

ona ou faia ona o le tatou fonotaga i le aso?’”

Fai mai Ron Goodson, o se faiaoga a le korama a tiakono i le uarota lava lea, ua faagaeetia lava o ia i le vaaia o le auala o loo “aoao” ai e Brother Wilson le aufono. “Matou te talanoa i le auala e ono aoao atu ai le Faaola,” o lana tala mai lea. “Ma ao e lagonaina le Agaga, e te manatu ifo, ‘E tatau ona ou faataitaia le mea lenei i lau vasega.’ O le mafaufau i le Faaola e suia ai le auala [e te aoao atu ai]. E oo ina tuuitiitia le, ‘E tatau ona ou saunia se lesona,’ ae matele i le, ‘O le a se mea e manaomia e nei tiakono, ma e mafai faapefea ona ou fesoasoani e avatu atu lena mea ia i latou?’”

Na te manatua lona tusia i lana api talaaga e faapea, “Sa ou auai i le

fonotaga a le aufono a faiaoga ananei, ma o le mea lenei e manaomia ona ou faia.” O le mea moni, ua tumu lana api talaaga i ni faamatalaga faapena. O le taimi nei, ua tapena mamao o ia: “Vave amata, ona e maua lea o uuniga i le vajaso atoa.” E fesili atu o ia i le au tiakono po o a mea o loo tutupu i o latou olaga: “E sili atu ona lelei lau fesoasoani ia i latou pe a ou iloa lelei i latou.” Ma na te valaaulia le au tiakono e fesoasoani e aoao atu: “A o latou faia, e sili atu foi ona latou aoao ai.”³

Sa Ou Pese Pea

“I le matou fono, sa matou talanoa ai i auala e mafai ai e musika ona valaaulia le Agaga,” o le tala mai lea a Jocelyn Herrington, o se faiaoga Peraimeri i le



ISI FAAMATALAGA

Ina ia aoao atili e uiga i fonotaga a aufono a faiaoga ma le *Aoao Atu i le Ala a le Faaola*, asiasi i le teaching.lds.org.

uarota lava lea a Minesota. "Mulimuli ane, sa ou aoaoina ai le Aveolela. Sa ou mafaufau, 'O le a ou pese a o valivali a latou [atal], ma o le a manaia.' Sa amata ona ou pese, ma sa latou tuu mea uma ae faalologologo. O lea sa ou pese ai pea. Sa aumaia ai le Agaga, ma ina ua uma lau [pesel], sa latou faaaloalo, ma faatalitali seia ou tautala. Sa matou talanoa foi i lena [aufono], e tuu atu lau molimau pe a oo mai le avanoa. O lea na ou moiilmau atu ai i ni upu e mafai ona latou malamalama ai."

Fai mai Sister Herrington, na te talisapaia le faaaofia ai o faiaoga Peraimeri i fonotaga a le aufono. "Matou te talanoa i le aoaoina o tagata matutua," na ia fai mai ai, "ona faapea mai lea o Brother Wilson, 'Ae faapefea le aoaoina o le autalavou? Ae faapefea le aoaoina o tamaiti?' Na te toe faamanatu mai ia i matou, e eseese uma le matututa o tausaga [o tagata] o loo i ai iina."

Mai le Aufono i le Aufono

Fai mai Atamu Matini, o se peresitene o le Aoga Sa i Calgary, Alberta, Kanata, na te talisapaia fautuaga mai le aufono a le uarota. Fai mai a ia, "O le a faapea mai le peresitene o le Aualofa po o le peresitene o le korama a le au toeaina, 'Matou te mananao i faiaoga ia taulai atu i lenei mea,' o lea matou te talanoaina ai i le [fonotaga] a le aufono a faiaoga."

I le taimi na faatoa amata ai fonotaga a le aufono a faiaoga, sa le mautinoa e faiaoga po o le a se mea ua faamoemoe e tupu mai ai, o lea sa ia tuuina atu ai ni valaaulia patino se tele ma faalauiloa atu mea e faaaoga i le aoaoga faamasani o loo maua i le teaching.lds.org. "O lea la ua taavale le polo," o lana tala mai lea. "Ua latou iloa o se nofoaga lea e talanoa ai mea o loo tutupu."

O le fonotaga talu ai nei sa taulai atu i le mulimuli i le Agaga. "Sa matou talanoa e uiga i le saunia lelei, ae le

SUIGA I SAUNIGA I ASO SA I LE 2018

E amata atu ia lanuari ona i ai ni suiga i sauniga a le Perisitua Mekisateko ma le Aualofa. O nei suiga na mamanu mai i mea ua aoaoina i fonotaga a le aufono a faiaoga. O se faamalamalamaga o le suiga, e aofia ai tusi fou ma mea e faaaoga i lesona, o le a tuuina atu—e amata atu i le masina a sau—i mekasini o lomiga o le konafesi, i luga o le polokalama Gospel Library, ma luga o le LDS.org.

o le popole i le aoaoina atu o mea uma," o lana tala mai lea. "Sa fai mai se tasi o tuafafine, o taimi uma lava sa manatu ai e tatau ona ia talanoaina aitema uma o loo i le fuafuaga o lana lesona. E te iloa atu lava ua amata ona malamalama o ia, ina ua matou talanoa e uiga i le mulimuli i musumusuga ao e taitaia se talanoaga."

Mauaina Faatasi o Tali

Ua i ai i tulaga faafaiaoga taitasi ona lava avanoa, luitau, ma faamanuiaga e mafai ona maua. O le pogai lena e taua ai aufono, aua latou te faatagaina faiaoga, faatasi ai ma le fesoasoani a le Agaga, e saili ma maua tali i o *latou* luitau faapitoa.

Fai mai Geoffrey Reid, o se peresitene o le Aoga Sa a le siteki i Arisona, ISA, e sili atu le aoga o fonotaga a le aufono a faiaoga pe a malamalama faiaoga o latou faamoemoega o le fautua atu: "Ona latou iloa ai lea e mafai ona latou fesoasoani atu i le tasi ma le isi."

Fai mai o ia, ua taulai atu le siteki i le fesoasoani i faiaoga ia me'i mai le mafaufau, "Mata o lelei la'u faatinoga?" i le mafaufau, "Ua faapefea ona taliana le savali?"

Fai mai Marisa Canova, o se faiaoga Peraimeri i le siteki e faapea, i le tali

atu i se uunaiga sa ia lagonaina i le aufono a faiaoga, ua ia uunaia ai nei tamaiti o lana vasega o le Valiana 8 e tatalo mo le tasi ma le isi. Sa aoga lena mea, ae atonu e le tutusa le auala e aoga ai mo se vaega a tagata matutua. "O le tatalo mo tagata uma o se vaega toatele o Aoaoga Faavae o le Talalelei e ono avea ma se mea lotifutina," sa ia fai mai ai. "O le mea e lelei ai, sa fai mai na faiaoga, 'O le a se auala ete manatu e mafai ona matou fetuunaia ai lena mea mo la matou vasega?' Ma matou te mauaina faatasi ia tali.

"O le mea ou te talisapaia e uiga i fonotaga a le aufono a faiaoga," na ia fai mai ai, "o le, latou te tuuina mai ia i matou le taimi e manatunatu ai pe o faapei a matou taumafaiga ma mea o loo matou faia. E aoga tele le i ai o le lagolago ma manatu faaalia, ma le lagona o loo outou galulue uma agai atu i le sini e tasi. Ou te fiafia foi i manatu eseese e folasia e tagata e toatele i le laulau. E fesoasoani ou te mafaufau ai i mea ia e mautinoa lava ou te le mafaufauina i le nao au lava."

Ao matou auai ma faasoa i fonotaga a le aufono a faiaoga, na amata ona manino atili mai la matou vaaiga mamao e uiga i le elefane na ta'ua o le "aoaoina atu o le talalelei". E pei o Brother Sitole i Aferika, e toatele le au paia i le Ekalesia i le lalolagi atoa ua iloina, a o faaleleia atili lo tatou gafatia e aoao atu i le ala a le Faaola, e le gata ina suia ai le ala tatou te aoao atu ai, ae faapea foi i le ala tatou te aoao mai ai. ■

FAAMATALAGA

1. Tagai *Tusitaulima 2: Taitaiina o le Ekalesia* (2010), 12.2.2.
2. O loo aofia le faataoto i le [saunoaga al Dieter F. Uchtdorf, "What Is Truth?" (Faigalotu a le Ofisa o Aoga a le Ekalesia mo le autalavou matutua, 13 Ian. 2013), broadcasts_lds.org; ma le Dieter F. Uchtdorf, "What Is the Truth?" *Friend*, Mat. 2017, 2.]
3. Mo nisi fautuaga, tagai i le Brian K. Ashton, "Fesoasoani i le Au Talavou ia Aoao Atu," *Liahona*, Aok. 2016, 24–25.




"E toatele [agaga] o loo vaavaai mai ma le naunau-tai i a latou uo o e o loo ola pea e auauna atu mo i latou i totonu o malumalu," na fai mai ai le tama o lo'u tama matua ua maliu ina ua ia faaali mai i lo'u tamamatua o A. C. Nelson.



Tatala LE Lagi

E ALA I GALUEGA O MALUMALU MA TALAFaaSOLOPITO O AIGA



**Saunia e
Peresitene
Russell M. Nelson**

Peresitene o le
Korama a Aposestolo
e Toasefululua

Ma na saunia e
Wendy W. Nelson

I le taimi o le la aoaoga i le RootsTech2017, na valaaulia ai e Peresitene Russell M. Nelson ma lona faletua o Wendy, le Au Paia o Aso e Gata Ai ina ia mafaufau ma le agaga tatalo po o a ni ituaiga o osigataulaga e mafai ona latou faia ina ia mafai ona latou faia ai ni galuega e sili atu o le malumalu ma talafaasolopito o aiga.

Peresitene Nelson: A o avea lo'u tamamatua o A. C. Nelson ma se tane talavou ma se tama, sa na o le 27 tausaga o lona soifua, sa faapea ona maliu ai lona tama. Pe a ma le tolu masina mulimuli ane, na sau ai lona tama ua maliu, o le tama o lo'u tamamatua, e asi o ia. O le aso o lena asiasiga o le po o le aso 6 o Aperila, 1891. Sa matuai faagaeetia tamamatua Nelson i le asiisi mai o lona tama, o lea na ia tusia ai le aafiaga i lana api talaaga mo lona aiga ma uo.

Sa tusia e Tamamatua Nelson e faapea, "Sa ou i ai i le moega i le taimi na ulufale mai ai Tama i le potu." "Na sau ma saofai i le pito o le moega. Sa ia faapea mai, 'Ia, lo'u atalii e, ona e i ai nai a'u minute ia e avanoa, ua ou maua ai le faatagaga e sau e vaai oe mo ni nai minute. O lea ou te manuia, lo'u atalii e, ma e tele ni mea na ou faia talu ona ou oti.'"

Ina ua fesili atu Tamamatua Nelson po o a ana mea sa fai, sa tali mai lona tama, sa pisi lava i le aoaoina atu o le talalelei a Iesu Keriso i le lalolagi o agaga.

"Lo'u atalii e, e le mafai ona e iloaina, le tele o agaga o loo i ai i le lalolagi o agaga, o e e lei mauaina lava le talalelei," sa ia fai mai ai. "Ae e toatele ua taliaina, ma ua ausia ai se galuega maoae. O le toatele o loo vaavaai mai ma le naunautai i a latou uo o e o loo ola pea e galulue mo i latou i totonu o malumalu."

Na tau atu e tamamatua Nelson i lona tama, "Ua matou fuafua e o atu i le malumalu ma faamauina ia te oe, Tama, i se vave matou te mafaia ai."



A. C. Nelson, o le tamamatua
o Peresitene Russell M. Nelson.

Sa tali mai le tama o lo'u tamamatua: "O le mea lena, lou atalii e, o se vaega lea o le mea na ou sau ai e vaai oe. O le a tatou faia ai loa se aiga ma ola ai i le faavavau atoa."

Ona fesili atu lea o tamamatua Nelson, "Tama, pe moni ea le talalelei e pei ona aoaoina ai e lenei Eklesia?"

Sa tusi atu lona tama i se ata o le Au Peresitene Sili na tautau i le puipui o le potumoe.

"Lo'u atalii e, e pei lava le mautinoa o lou vaai atu i lena ata, e faapena foi le mautinoa o le moni o le talalelei. Ua i ai i totonu o le talalelei a Iesu Keriso le mana e laveai ai alii ma tamaitai uma o e o le a usitai i ai, ma e leai lava se isi auala e mafai ona latou maua ai le faaolataga i le malo o le Atua. Lo'u atalii e, ia pipii pea e le aunoa i le talalelei. Ia lotomaualalo, ia agaga tatalo, ia usitai i le perisitua, ia amiosao, ia faamaoni i feagaiga ua oulua osia ma le Atua. Ia aua lava nei faia se mea o le a le fiafia ai le Atua. Oka, o se matuai faamanuiaga le talalelei. Lo'u atalii e, ia e tama lelei."

Sister Nelson: E ese lo'u fiafia i na Ia uma. "Ia lotomaualalo, ia agaga tatalo, ia usitai i le perisitua, ia amiosao, ia faamaoni i feagaiga ua oulua osia ma le Atua. . . . Ia e tama lelei." O Ia e ono na aumai ia te oe e le tama o lou tamamatua

ua fai i lagi le folaua. E pei uma ua ou faalogo ia Peresitene Gordon B. Hinckley (1910–2008) ma ana Ia e ono.¹

Peresitene Nelson: Ae sao, a ea? E ese le pele ia te au o le faapea ona tuua ai e lo'u tamamatua o lena faamau-mauga mo i matou. Sa matou iloaina, sa faapea ona faamauina mulimuli ane le fanau a lona tama ia te ia. O lea la, sa faapea ona ausia le pogai o lana asiasiga.

O Le Agaga o Elia

Peresitene Nelson: Ua faamalamalama mai e se suafa sili ona taua i tusitusiga paia le pogai e taua tele ai le aiga. O lena suafa o Elia. O EL-I-JAH i le faaEperu o lona uiga moni o "Ieova o lo'u Atua."² Mafaufau i ai! O loo taoto i totonu o le suafa o Elia ia upu faaEperu mo le Tama ma le Alo.

Sister Nelson: O Elia o le perofeta mulimuli lea na umiaina le mana faamau o le Perisitua Mekisateko a o lei oo i le vaitaimi o Iesu Keriso. O le misiona a Elia o le liliu lea o loto o fanau i tama, ma loto o tama i fanau, ina ia mafai ona faamauina i latou, afai e le faapea "o le a *faumatia atoa* le lalolagi i lona afio mai" (Iosefa Samita—Talafaasolopito 1:39; ua faaopoopo le faamamafa). E fai lava si malosi o lena faaupuga.

Peresitene Nelson: Ou te fia mafaufau i le agaga o Elia o "se faaali mai o le Agaga Paia e molimau mai e uiga i le natura paia o le aiga."³ E tusa ai ma le Bible Dictionary, "O le mana o Elia, o le mana faamau lea o le perisitua lea e mafai ai ona noatia pe tatalaina mea i le lalolagi pe noatia pe tatalaina i le lagi" ("Elijah").



Sister Nelson: A tatou fai atu la, o loo fealuai le agaga o Elia i luga o tagata e uunai i latou e saili i o latou aiga ua maliliu, o le uiga moni o le faamatalaga, o loo uunaia i tatou e le Agaga Paia e fai mea na o le a mafai ai ona faamauina o tatou aiga e faavavau.

Peresitene Nelson: E ese le manaia o le liliu atu o loto o fanau i o latou tama e ala i le faamatalaga atu o tala taua o talafaasolopito o aiga i ni auala e maua gofie ai ma manatua ai pea. Atonu o le tatou vaai i taimi uma i pepa faamatalaga o talafaasolopito, tala, ata, ma mea faitino e manatua ai, e mafai ona faamalolosia ai a tatou molimau (tagai i le Mosaea 1:5). Pe a tatou tuu ia mea i luga o o tatou puipui, o a tatou laulau, a tatou komepiuta, a tatou iPads, faapea foi ma a tatou telefoni feaveai, atonu o le a uunaia ai i tatou e fai filifiliga e lelei atu ma faalatalata atili atu ai i le Alii ma i o tatou aiga.


Ae peitai, afai tatou te tuua ai i le tulaga lena, o le mea moni e le o lava mea na tatou faia. I le avea ai ma tagata o le Ekalesia, o lo tatou fiafia i talafaasolopito o aiga na faaosofaina e le faatonuga mai le Alii e faapea, e le mafai ona faaatoatoaina o tatou tuua e aunoa ma i tatou, ma e le mafai ona faaatoatoaina i tatou e aunoa ma i latou (tagai i le MF&F 128:15). O le uiga o lena mea, e tatau ona fusia faatas i tatou e ala i sauniga paia o le faamauga o le malumalu. E tatau ona avea i tatou ma ni sooga malolosi i le filifili mai i o tatou tuua e oo atu i a tatou fanau. Afai e tatau ona avea le aoina o tala ma ata ma se tau-nuuga mulimuli o mea tatou te faia—afai tatou te iloa po o ai o tatou tuua, ma iloa mea mata-gofie e uiga ia i latou, ae tatou tuua ai lava i latou e paulia i le isi itu e aunoa ma o latou

sauniga—o se suiga faapena o le a leai se aoga i o tatou tuua o e o loo tumau pea ona taofia i le lalolagi o agaga.

Sister Nelson: E taua le faasaoina o tala a augatuaa, ae e le tatau lava ona aveesea ai le faataunuina o galuega o sauniga a o tatou tuua. E manaomia ona tatou faaavanoa le taimi mo faamatalaga a o tatou tuua e agavaa ai mo le [faia] o o latou sauniga.

Peresitene Nelson: Ma o le uiga o lena mea, o le ositaulaga lea o taimi sa masani ona tatou faaaluina i isi gaoioiga. E manaomia ona tatou faaaluina ni taimi e tele atu i totonu o le malumalu ma i le faia o sailiga o talafaasolopito o aiga, lea e aofia ai le faasino igoa [indexing].

Sister Nelson: E aumai moni e le ositaulaga faamanuiga o le lagi.⁴ Ua faamanuiaina au i le mauaina o le toatele o tuua o e ua ou lagona le mautinoa ua saunia e osia feagaiga ma le Atua ma ia maua o latou sauniga e tatau ai. Na ou iloaina i le mavae ai o se taimi, afai sa ou galue i se



galuega faatino lofituina ma ua uma lou taimi, malosi, ma manatu, afai o le a ou faia se ositaulaga o le taimi e ala i le sueina o faamatalaga e agavaa ai mo sauniga mo nisi o tuua po o le alu i le malumalu e sui mo i latou, e faapea ona matala le lagi ma amata ona solo mai le malosi ma manatu. Na i ai lava le ala na ou maua ai le taimi e ausia ai le aso atofaina e faauma ai [se galuega]. Sa matuai faigata lava, ae e tupu lava i taimi uma. E aumaia e galuega o malumalu ma talafaasolopito o aiga ia te au se olioli lea e le i ai moni i lenei lalolagi.

Talafaasolopito o Aiga ma le Galuega Faafaifeautalai

Peresitenet Nelson: A na faapea o au o se faafeautalai i le taimi nei, o au uo sili lava e toalua i le uarota po o le parnesi o ou galue ai, o le taitai misiona a le uarota ma le faufautua a le uarota mo le malumalu ma talafaasolopito o aiga.

E i ai i tagata se manao moni ia iloa se mea e uiga i o latou tuaa. E avea lena mea o se avanoa masani mo o tatou faafeautalai. A o aoao a tatou faifeautalai e alolofa i tagata latou te aaooina, o le a avea ma se mea masani lo latou fesili atu e uiga i o latou auaiga. “O soifua ou matua? O soifua matua o ou matua? E te silafia matua o ou matua e toafa?” E faigofie lava ona see le talanoaga pe a valaaulia i latou o e e tosina atu e talanoa ma faifeautalai e talanoa e uiga i tagata latou te alolofa i ai.

O le taimi lena, o se mea ua masani ai faifeautalai, e aofia ai foi tagata faamisiona a le uarota, e fesili atu, “E te silafia se isi o matua o ou matua matutua? E te silafia o latou suafa?” Atonu o le a le iloa e tagata sailili ia suafa o le toavalu o matua o o latou matua matutua.

Ona mafai lea ona fai atu e faifeautalai le fautuaga lenei: “E i ai sau uo i le lotu e mafai ona fesoasoani mai. Afai e mafai ona tatou maua ia suafa o nisi pe atonu foi o matua uma o ou matua matutua, mata o le a alu aoga ai ni itula se lua o lou taimi e sue ai po o ai matua o ou matua matutua?” Ioe, o lena uo i le lotu, o le faufautua o le malumalu ma talafaasolopito o aiga.

Sister Nelson: Ou te manatu e mafai ona lagona e faifeautalai le mafanafana i le iloa, e le mafai lava ona tuua nao i latou pe a latou maua ma aaooina i latou o e e fiafia i upumoni o le talalelei toefuataiina a Iesu Keriso. Na aaoao mai e Peresitene George Q. Cannon (1827–1901), o le sa auauna atu o se fesoasoani i le toafa o Peresitene o le Ekalesia e faapea, i nei aso e gata ai, o i latou o e ua auai i



le Ekalesia ua auai tonu mai ona na tatalo o latou tuaa ina ia auai se tasi o a latou fanau i le Ekalesia ina ia mafai e latou, o tuaa, ona maua o latou sauniga e tatau ai e ala i sauniga sui.⁵

Faaeaga: O Se Mataupu e Faaleaiga

Peresitene Nelson: O le faaeaga o se mataupu e faaleaiga. E nao sauniga faaola o le talalelei a Iesu Keriso e mafai na faaeaina ai aiga. O le faaiuga tupito lea o loo tatou taumafai i ai o le, ia tatou fiafia o se aiga—maua faaeega paia, faamauina, ma saunia mo le ola e faavavau i le afioaga o le Atua.

Sister Nelson: O vasega taitasi o le Lotu tatou te auai atu i ai, o taimi taitasi tatou te auauna atu ai, o feagaiga taitasi tatou te osia ma le Atua, o sauniga taitasi o le perisitua tatou te mauaina, o mea uma tatou te faia i le Ekalesia e taitai atu ai i tatou i le malumalu paia, o le maota o le Alii. E tele naua se mana o loo avanoa mo se ulugalii ma mo a laua fanau e ala i le sauniga o le faamauga pe a latou tausia a latou feagaiga.

Peresitene Nelson: Tatou te filifili i aso uma lava po o fea tatou te fia nonofo ai e faavavau e ala i le ala tatou te mafaufau, manatu, tautala, ma amio ai. Ua folafola mai e lo tatou Tama Faalelagi, o Lana galuega ma Lona mamalu o le auamaia o le tino ola pea ma le ola e favavau o Lana fanau (tagai i le Mose 1:39). Ae e *finagalo* o Ia ia tatou filifili e toe foi atu ia te Ia. O le a Ia le faamalosia i tatou i soo se mea lava. O le sao tonu tatou te tausia ai a tatou feagaiga, e faaali atu ai ia te Ia le tele o lo tatou manao e toe foi atu



e nonofo faatasi ma Ia. O aso taitasi e aumaia ai i tatou ia latalata atili atu po o le mamao atili ese mai lo tatou avanoa matagofie o le ola e faavavau. E manaomia e i tatou uma taitoatasi ona tausia a tatou feagaiga, salamo i aso uma, ma saili ia avea atili e pei o lo tatou Faaola. Ma e nao le pau lava lena o le mea e mafai ai ona faatasi o tatou aiga e faavavau.

Sister Nelson: Ou te molimau atu, po o le a lava le matagofie o i ai lou olaga i le taimi nei, po o le a foi le lotovaivai ma le lotonutimomoia atonu o i ai, o lou aafia ai i le galuega o malumalu ma talafaasolopito o aiga o le a faaleleia atili ai. O le a le mea o loo e manaomia i lou olaga i le taimi nei? Faateleina o le alofa? Faateleina o le olioli? Faateleina o le loto pulea? Faateleina o le toofilemu? Faateleina o taimi anoa? Faateleina o se lagona o loo e faia se eseesega? Faateleina o mea e fiafia ai? Faateleina o tali i au fesili loloto? Faateleina o ni fesootaiga faamaoni ma isi? Faateleina o le malamalama i mea o loo e fatauina i tusitusiga paia? Faateleina o le gafatia e alofa ma faamagalo atu ai? Faateleina o le gafatia e tatalo ai ma le mana? Faateleina o musumusuga ma manatu fatufatua mo lau galuega ma isi galuega faatino? Faateleina o le taimi mo mea e taua moni?

Ou te talosagaina outou e fai se osigataulaga o le taimi i le Alii e ala i le faateleina o le taimi e te faaaluina i le faia o galuega o malumalu ma talafaasolopito o aiga, ona e maitau lea o le mea e tupu. O lau molimau, a tatou faaali atu i le Alii tatou te manatu mamafa i le fesoasoani atu i o tatou tuaa, o le a matale le lagi ma o le a tatou maua mea uma tatou te manaomia.

Peresitene Nelson: E mafai ona musuia i tatou i le aso atoa e uiga i aafiaga o le malumalu ma talafaasolopito o aiga na maua e isi. Ae e tatau ona tatou faia se mea ina ia tatou maua moni ai e i tatou lava le olioli. Ou te fia faalautele atu se lui ia i tatou uma taitoatasi, ina ia faaauau pea ma

faateleina pea le lagona matagofie o lenei galuega. Ou te valaaulia outou ina ia mafaufau ma le agaga tatalo po o le a le ituiga ositaulaga—ma e talosia o se ositaulaga o le taimi—e mafai ona e faia ai galuega se tele o malumalu ma talafaasolopito o aiga i lenei tausaga.”

O loo tatou i ai i le galuega a le Atua Silisili Ese. O loo soifua o Ia. O Iesu o le Keriso. O Lana Ekalesia lenei. O i tatou o Ana fanau o le feagai-ga. E mafai ona Ia faalagolago mai ia i tatou. ■

Mai se aoaoga i le RootsTech 2017 Konafesi a le Talafaasolopito o Aiga i le Aai o Sate Leki, Iuta, ISA, i le aso 11 o Fepuari, 2017. Ina ia maimoa i le puega o le aoaoga i le Igilisi, Potukale, po o le FaaSipaniolo, asiiasi i le lds.org/go/1017Nelson.

FAAMATALAGA

1. Tagai Gordon B. Hinckley, “O Le Fautuaga ma le Tatalo a se Perofeta mo le Autalavou,” *Liahona*, Ape. 2001, 30–41.
2. Bible Dictionary, “Elijah.”
3. Russell M. Nelson, “O Le Taimi O Se Seleselega Fou,” *Liahona*, Iulai 1998, 39.
4. Tagai “Viia Le na Fetaia’i ma Ieova,” *Viiga*, itu.15.
5. Tagai *Gospel Truth: Discourses and Writings of President George Q. Cannon*, comp. Jerrel L. Newquist, 2 vols. (1974), 2:88–89.



IA ILOA MUAMUA
AE E TE LE'I ALU:

Papatisoga i le Malumalu

E le manaomia ona faatali. O tagata agavaa uma o le ekalesia, e aofia ai le autalavou ma tagata fou, ua mafai nei ona auauna atu i le malumalu.

Saunia e Heather J. Johnson

Mekasini a le Eklesia

“Ta avea moni i tatou ma tagata toaaga ma alolofa i le malumalu,” o le saunoaga lea a Petersene Howard W. Hunter (1907–95). “E tatau ona tatou faanatinati soo atu i le malumalu . . . e tusa ai ma o tatou tulaga faaletagata. E le tatau ona tatou o mo nao e ua maliliu, ae ia o foi mo faamanuiaga o le tagata lava ia mo le

tapuai i le malumalu, mo le faapaiaina ma le saogalemu i totolu o na pa paia ma le mamalu” (“O Tagata Naunau I le Malumalu,” *Liahona*, Me. 1995, 5).

O lenei fautuaga ua faatatau lea i tagata uma o Le Eklesia a Iesu Keriso o le Au Paia o Aso e Gata Ai—e tusa lava pe o oe o se tagata na faatoa papatisoina lata mai nei. Afai lava o loo e agavaa, e leai se mea e tau faatalitali ai ona faatoa mafai lea ona

e auai atu i le malumalu. O le taimi lava e papatisoina ma faamauina ai oe, ona mafai loa lea ona e maua se pepa faataga o le malumalu e tapulaa le faaaogaina.

O lenei pepa faataga e mafai ai ona e ulu atu i le malumalu e faia sui papatisoga ma faamauga mo tuua ua maliliu. Pe a e auauna ma tapuai atu i totolu o le malumalu, e mafai ona e faamalosia ai lau molimau o le talalelei.

E faatatau i lana uluai aafiaga i le malumalu, na fai mai ai Natalia Lorena Figueroa mai Atenitina, “I totolu o le potu o papatisoga, sa ou vaai atu ai i se tuagane na papatisoina mo lo’u tamamatua ma toeaiina o lo’u aiga (uncles). Ona papatisoina ai lea o au mo lo’u tinamatua ma tamaitai o lo’u aiga. Sa matuai tulaga ese le olioli na ou lagonaina. Sa maligi ou loimata, ma e lei i ai se isi taimi muamua na ou lagonaina ai le mu i lo’u loto.” E faapena foi faamanuiaga o loo faatalitali mai ia i latou o e agavaa mo, ma faaaoga pepa faataga o le malumalu e tapulaa le faaaogaina. ■



O FESILI E FESILIGIA SOO

E faapefea ona ou maua se pepa faataga e faatapulaa le faaaogaina?

- E tatau ona 12 ou tausaga pe matua atu, ma o se tagata agavaa o le Ekalesia. O alii e tatau ona maua le Perisitua Arona, lea e masani na mafai ona faia i totonus o se vaiaso talu ona latou papatiso.
- Ina ia maua se pepa faataga, e faatalanoa oe e lou epikopo po o le peresitene o le paranesi. O le faatalanoaga e talitutusa lava ma lou faatalanoaga na fai ae e te lei papatiso. O le a ouluu talanoa ai i lau molimau i le talalelei ma lou tausia o poloaiga.
- O le pepa faataga e tasi le tausaga e aoga ai.

O a ni faamanuiaga o le i ai o se pepa faataga o le malumalu e faatapulaa le faaaogaina?

- E mafai ona e auauna atu ai i ou tuaa ua maliliu ma isi o e ua maliliu e ala i le faia o sui papatisoga ma faamauga mo i latou.
- E mafai ona e manatuaina ai a oe lava feagaiga o le papatisoga ma le faamauga na e osia.
- E tusa lava pe le mafai ona e auai soo atu i le malumalu, e mafai ona e fealuai ma oe lau pepa faataga e avea o se faamanatu faifaipea o le malumalu ma lau tautinoga ia agavaa e te auai atu i ai.
- O le ola agavaa mo se pepa faataga o le malumalu e tapulaa le faaaogaina, e fesoasoani e te saunia ai e maua a oe lava sauniga o le malumalu o le faaeega paia ma le faamauga.

O a ni auala e tatau ona ou fuafuafina ai se malaga i le malumalu?

- Fesili i se taitai o le uarota po o le paranesi, e pei o le taitai misiona o le uarota po o le peresitene o le Aualofa, mo se fesoasoani i le fuafuafina o se malaga i le malumalu.
- O loo i luga o le initioneti ia taimi faatulagaina mo papatisoga i malumalu taitasi i le temples.lds.org. E mafai foi ona e telefoni atu i le malumalu mo ni faamatalaga.
- Afai o le taimi muamua lea ua e auai atu ai, e mafai ona e telefoni i le malumalu e faatulaga ai [lou] taimi atofaina. O lenei faiga, o le a latou saunia ai e faafeiloai oe ma faamatala atu mea o le a e faia i totonus o le malumalu.

- Ia laei atu ou laei o le Aso Sa i le malumalu.
- Sau ma aumai sou ofu laitiiti paepae e te sui ai e faaaoga. O nisi malumalu e tuuina atu ofu laiti papae, ae o nisi e leai. O le a tuuina atu e le malumalu se ofu soloatoa paepae ma se solotaele.

O a ni mea e tatau ona ou faamoemoeina pe a ou auai atu i le malumalu e fai sui papatisoga ma faamauga?

- Pe a e ulufale atu i le malumalu, o le a e tau muamua atu i le laulau e siaki ai pepa faataga. O le a siaki ai e se tagata faigaluega o le malumalu lou pepa faataga.
- Ona o atu lea o alii ma tamaitai i potu sui eseese e sui ai. E tuuina atu potu o le loka a le tagata lava ia e sui ai mai ou laei i se ofu soloatoa paepae e tuuina atu.
- O le a faasino atu oe e le tagata faigaluega o le malumalu i le mea e te alu i ai e fai ai sui papatisoga ma faamauga.
- O papatisoga ma faamauga e te aafia ai, o le a tutusa lava ma lou lava papatisoga ma le faamauga, ae o le a e fai ma sui o se tagata ua maliu.
- A uma ona e auai i sauniga, o le a e toe foi atu i le potu e sui ai laei ma toe sui i ou oe lava laei.
- E leai se mea e popole ai i le auai atu i le malumalu. O loo i ai tagata faigaluega o le malumalu i soo se mea e te alu i ai i totonus o le malumalu. O le a latou fesoasoani ia te oe.



Foia o Feteenaiga i Lau Faaipoipoga



Saunia e S. Brent Scharman

Fautua litaea, Tautua a le AAG Mo Aiga

Sa tape e Mati ma Makerita (ua sui uma igoa) le televise ina ua uma le sauniga faaiu o le konafesi aoao. Sa musuia savali, ma sa la fiafia i le agaga lelei sa faatumulia ai lo latou fale i le faaiuga o lena vайaso.

E leai se tasi na sili atu ona le fiafia nai lo Mati ma Makerita ona, e lei atoa le 24 itula mulimuli ane, ae la faia loa se finauga vevela faapea, pe sefe se ponesi sa lei mafaufauna na maua e Mati i le galuega pe faaalu i ofu aoga o tamaiti matutua. Sa lei foia le finauga, ma sa see atu Mati ma Makerita i isi galuega ma lagona le le femalamalamaaai.

Ina ia fatufatuina se faaipoipoga tumau ma fiafia, e ao i ulugalii ona iloa auala e foia ai feteeenaiga, ina ia lagona ai e tagata taitoatasi le malamalama o le isi ma fai ai faaiuga e aafia ai fetuutuunaiga talafeagai.

Lapataiga ma Taitaiga Faaleagaga

O tusitusiga paia ma upu a perofeta ma aposetolo ua tuuina mai ai le tele o lapataiga e uiga i finauga. I le

*E tafe mai
faamanuiaga
matagofie
mai le foia o
feteenaiga i
se agaga o le
alofa.*



3 Nifae tatou te faitau ai, "O le e i ai le agaga o le finauga ua le mai ia te au o ia, ae ua mai le tiapolo ia, o le o le tamā o le finauga" (3 Nifae 11:29). Na aoao mai Elder M. Russell Ballard o le Korama a Aposetolo e Toasefululua e faapea, o Satani "e galue e sunu'i se tina o le feitagai i le va o se tama ma se tina. Na te faatosina fanau ia le usitai i o latou matua. . . . "E iloa e Satani o le mea e sili ona mautinoa ma sili ona aoga e faaleaga ai le galuega a le Alii, o le faaitiitia lea o le taua o le aiga ma le paia o le auuaiga."¹

O le eseese o manatu, mausa, po o mea e o mai ai e le mafai ona alofa, ae ua ia i tatou le anoano o punaoa e fesoasoani tatou te iloa ai le ala e taulima ai. O aoaoga faavae ma faatonuga e aoaoina i sauniga i Aso Sa ma lomiga a le Ekalesia, e mafai ona fesoasoani ma e mafai ona faaopoopoina atu i faamatalaga faapolofesa aoga pe a manaomia ai. E mafai ai e ulugalii ona iloa auala mo le taulima ina o feteeenaiga. O musumusuga e mafai ona taitai atu i le suia o loto lea e faamaluluina ai uma taitoalua ma suia ai mai totonu.

Ua lapatai mai Peresitene

Thomas S. Monson: “O nisi o o tatou avanoa silisili e faaali atu ai lo tatou alolofa o le a i ai lea i totonu o puipui o o tatou lava fale. O le alofa e tatau ona i ai i le totonugalemu o le olaga faaleaiga, ae o nisi taimi e le o i ai. O loo tele naua le le onosai, tele naua le fefinauai, tele naua fetauaiga, ma tele naua loimata maligi.”²

Pe a i ai pea lava faafitaui ma oo ai ina faatamaia ai le olaga faaleaiga, e mafai ona tele atu ni faapogai ogaoga o feteenaiga, e aofia ai le moto o le mafaufau, manatu faapito, manao ia malo i tauiviga i le fiapule, ma le faamaualuga. Na aoao mai Peresitene Gordon B. Hinckley (1910–2008), “Ua leva ona ou lagonaina, o se elemene aupito sili i se faaipoipoga fafia o se popolega naunautai mo le manua ma le tulaga solo lelei o lana soa. O le tele lava o mea e tutupu, o le manatu faapito o le autu lea e mafua ai feupuaiga, o teteaga, tatala o faaipoipoga, ma loto nutimomoia.”³

Na ta’ua foi e Elder Marvin J. Ashton (1915–94) o le Korama a Aposetolo e Toasefululu: “A mafaufau se tagata i lagona le lelei ma le le manaia lea e mafua mai i finauga, e sili le fesili ifo, ‘Aisea ua ou faia ai?’ . . .

“. . . E taua le iloa, tatou te filifilia a tatou amioga. O loo i le aa o lenei mataupu le faafitaui ua loa o le faamaualuga.”⁴

Po o le a lava le pogai, e tatau ona tatou aoaoina ni tomai fou ma faamalulu o tatou loto pe a tumau pea ona tulai mai faafitaui.

Mafuaaga o le Feteenai

E tele mafuaaga o le feteenai, e mai lava i manatu papau faaituau a le tagata lava ia e oo atu i ituaiga fesootaiga loloto ma maotua. E faaopoopo atu i le faatoilaloina o le manatu faapito ma le moto o le mafaufau, o le a fetaiai foi ulugalii ma isi pogai masani o feteenaiga e pei o vaega nei:

O le taumafai o ulugalii fou e faafetaui atu i sitaili a le tasi ma le isi	O eseeseaga masani i le va o alii ma tamaitai	O le le fafia e uunaia e le lelava	O le eseese o manatu i auala sili ona lelei e tausi ai fanau pe pulea ai tupe
O fanau e aoao e faaaoga le faitalia	O le eseese o mea e fafia ma e le fafia ai	O le soona mateletele i le atuatuvalle	O le le lava o le malamalamapo o tomai i le foiaina o feteenaiga



Lapataiga e uiga i le Ita

O le tele o feteenaiga i faaipoipoga po o aiga e tulai mai ona o le le pulea o le ita. Afai tatou te le faaeteete, e mafai ona tumau pea i o tatou mafaufau i le mavae ai o se feteenaiga, le lagona na faia e o tatou taitoalua se mea sese ia i tatou. O le umi lava o le tatou teulotoina [o lena lagonal], o le tele foi lea o pogai tatou te faatupuina e tauamitonu ai o tatou manatu. O le faaaauau pea ona i ai o lenei manatu le lelei, e mafai ona taofia ai i tatou mai le toofilemu, ma a toe tulai mai loa se isi mea e oso ai le ita ao lei faaleleia le faafitauli muamua, o le oso mai o lagona ma mafaufauga e mafai ona faaopoopo ai le oso o le ita.

Mo se faataitaiga, i se fonotaga faufautua, na faamatala ai e Merelini le faaosoita o le taoto i le



Faaali ou lagona i ni mea aoga.

O le ee e uiga i ou lagona o le a le fesoasoani lea "e faatea ese ai mai lou loto." O le tele lava o le faaalia o ou lagona i se agaga o le ita, o le malosi atili foi lena o ou lagona.



Sue se mea faalavefau.

Filifili e mafaufau i se isi mea pe alu e savalivali.



Faalogologo i musika toafimalie

pe faitau ni tusi faagaeetia.

moega ina ua uma ona la feei ma lona toalua i le tasi ma le isi. Na fai mai o ia, "Sa ou iloa sa sao au." "Sa ou iloa o le a ia kiina le moli ma faatoese mai, ae na te lei faia lava. O le tele o lou mafaufau i ai, o le tele foi lea o lou ita. Ina ua ou faalogo atu ua amata ona taagulu o ia, sa le mafai ona ou toe tatalia—Sa ou oso ese mai le moega ma toe ee atili atu ia te ia ona ou alu loa lea i le fogafale a lalo. E te talitonu e lei faatoese mai lava o ia?" O le aafiaga a Merelini o se faataitaiga lelei lea o le auala e le tatau ona taulima ai lagona o le ita.

O mausa, e oo lava foi i mausa pupuu, e mafai ona foliga mai e faigata ona momotu. Ae e mafai e taitoalua ona aoao tomai e fesoasoani ai. O nisi nei o faiga aoga:



Toe Amata.

Ia e vave taofi i le faatoa amataina o se feeseseseaiga. Ua faaalia i suesuega e faapea, o le uluai tolui le lima minute o se talanoaga e faataoto ai le faavae mo le mea atonu e sosoo mai ai. Ia faapea, "E le lelei le itu ua agai atu i ai le mea lenei. Sei ta toe amata."



Ia faatoatoa muamua ou faalogona

ae e te lei taumafai e taulima se faafitauli. Faatali sei te'a le vevesi o lou mafaufau.




Tusi i lalo ou manatu.

Mo nisi, o lenei mea e fesoasoani e faateleina ai le nofouta o le tagata lava ia.

Laasaga i le Foiaina o Feteenaiga

O le *Faamalolosia* o *Faaipoipoga*, o se tusi lesona a le Tautua mo Aiga o le AAG, ua fautuaina mai ai ni laasaga se tolu mo le foiaina o feteenaiga: (1) faaali manatu, (2) sailia o popolega, ma le (3) filifilia o vaifofo fesuiai faamalie loto.⁵ O nei laasaga ua faavae i se faataitaiga o se talanoaga ma fefaasoaaiga e faapea ona aofia ai le soosoo tauau ma soalaupule ai faafitauli o tagata uma e aafia ai.

1. Faaali Manatu	2. Sailia o Popolega	3. Filifilia o Vaifofo Fesuiai Faamalie loto
<p>E faasoatatu e tagata tai-toatasi ni manatu i se agaga faamaoni ae le o le osofai. O nisi taimi, o manatunatuga magafagafafa e foia ai faafitauli pe a oo ina manino mai, o le feeseseaseaiga sa na o se le femalamalamai lava. Mo se faataitaiga, o se fafine e manatu o loo tauanau ma le manatu faapito lona toalua late o i se taaloga pasiketipolo a le aoga mauluga nai lo le o e aai i se faleaiga mo le la tafaoga, atonu e ono malamalamana ane, e itiiti sona fiafia i le pasiketipolo nai lo le faaali atu o lona gauai i se tagata taalo ua le toe sau i lana vasega o le Aoga Sa.</p>	<p>O ulugalii e sailia popolega o loo laualalo i o laua manatu. O le mea e taulai i ai o le malamalamama ma le taliaina o atugaluga o le tasi. I le faaauau ai o le faataitaiga i le pasiketipolo, o le fafine, e ui ua malamalamama i le atugaluga o lona toalua mo le tagata o le vasega, e ono talitonu lava o loo atinaeina e lana tane se mamanu o le faamuamua i taimi uma o manaoga o isi nai lo o manaoga o le la faaipoipoga. I le tulaga lenei, e tatau ona faise talanoaga loloto e tofu faaali ai lagona i se agaga o le faautauta ma suia ai le feteenai i le aufaatasi.</p>	<p>E palepalealuga ma filifili e ulugalii ia fofo e tau fai malilie uma ai. O le taulai atu, ua i ai lea i mea e mafai ona faia e tagata taitasi e taulima ai atugaluga ae le o le, o a ni mea e mafai ona faia e o latou taitoalua. O fetuutuunaiga faapena e mafai ona tofotofo ai le matua o le mafaufau ma le onosai peitai, i le mavae ai o aso, e oo atu ai i se talitonuga e faapea, e i ai le saogalemu i le faailoaaina o lagona ma le talitonuga o le a faapea ona talanoaina manaoga o tagata taitasi. E mafai ona malilie le ma'ua ulugali e faaalu fatastise po se tasi o se Aso Faraile i se taaloga pasiketipolo, se po o se Aso Faraile se tasi e alu ai nao le tamaloa i le taaloga, ma ni po o ni Aso Faraile se lua e fai ai gaoioiga faaleulugalii. E le taua tele pe faapefea ona faaalu e le ulugalii le po o le Aso Faraile, nai lo o le faamalieina uma o i laua i le lelei o le faagasologa o le faiga o faaiuga.</p>



Taunuuga o le Foiaina o Feteenaiga

E tafe mai faamanuiaga mataogife mai le foia o feteenaiga i se agaga o le alofa. O nei faamanuiaga e aofia ai le malu puipuia; tuputupu ae patino, lea e taitai atu ai i le filemu o le loto; faatuatua faateleina; faalelea ai uiga faaalia; ma le amiotonu patino.

A foia feteenaiga, e mafai ona suitulaga atu i ai ni mamanu fou. Ona matala ai lea o le faitotoa mo taitoalua e faailoa atu ai manatu lelei ma faaali atu le lagolagosua. Na saunoa mai Sister Jean B. Bingham, Peresitene Aoao o le Aualofa: “Ua i ai i upu se mana e ofo ai, e faafafia ai ma faalotovaivaia ai foi. Atonu tatou te manatuaina uma lava ni upu lē lelei na faalotovaivaia ai i tatou ma isi upu na tautalagia i le alofa na matua faagaeetia ai o tatou agaga. O le filifili e fai atu na o upu e lelei e uiga i isi—ma i—isi e siitia ma faamalosia ai i latou o siomiaina i tatou ma fesoasoani ai i isi ia mulimuli i le ala a le Faaola.”⁶

O ulugalii o e ua faia ni faagasologa uumi i le foiaina o feteenaiga e selesele foi i taui manaomia. Na faapea mai se tane sa i ai i se mafutaga muamua sa le lelei, “E faigata ona ou toe tepa i tua i le mea sa masani ona i ai ma talitonu ai e faapea sa mo’i lava. Na mafai faapefea ona ou faia lo’u toalua i le auala na ou faia ai? Ou te faafetai mo le faasagatonuina o au e le Agaga, ma mo le onosai ua faaalia e lo’u toalua ia te au.”

Faaiuga

O le faatoilaloina o feteenaiga e manaomia ai se taumafaiga maga-faga ma le tulitatao. O le isi mea e te fai atu ai pe faia e mafai ona amatalia ai ni mamanu lelei o fesootaiga i lau faaipoipoga. E mafai ona e selesele i fua o le Agaga e pei ona sa oo i ai Sa Nifae: “Ma sa oo ina leai se finauga i le laueleele, ona o le alofa o le Atua sa mau i loto o tagata.

“Ma sa leai se mataua, po o ni feeseeaina, po o ni faanunu-nunu . . . ; ma e moni e le mafai ona i ai o ni tagata e sili atu ona fiafia” (4 Nifae 1:15–16). ■

E alala le tusitala i Iuta, ISA.

FAAMATALAGA

1. M. Russell Ballard, “The Sacred Responsibilities of Parenthood” (faigalotu a le Iunivesite a Polika Iaga, Aok. 19, 2003), 3, speeches.byu.edu.
2. Thomas S. Monson, “Alofa—o le Ute o le Talalelei,” *Liahona*, Me 2014, 92.
3. Gordon B. Hinckley, “Faamaoni,” *Liahona*, Me 2003, 59.
4. Marvin J. Ashton, “No Time for Contention,” *Ensign*, Oke 1978, 9.
5. Tagai *Faamalosia o le Faaiipoipoga: Tusitaiala mo Ulugalii* (2006), 57–59.
6. Jean B. Bingham, “O Le A Ou Aumaia le Malamalama o le Talalelei i totonu o Lou Aiga,” *Liahona*, Nov. 2016, 7

Tulafono mo le Talanoaina

o Atugaluga

Ua lisi atu i lalo nisi o manatu e faateleina ai le ono faamanuaina o le foia o feteenaiga:

- Saili le taitaiga faaleagaga.
- Filifili i se taimi ma se nofoaga e talanoa ai, pe afai o i ai se talafaa-solopito ogaoga o faafitauli.
- Saili ia malamalama nai lo o le finau.
- Tuu e talanoa mai lou toalua.
- Tautala malu ma ia agalelei.
- Fai ma malolo pe a manaomia.
- Faaaoga gagana talafeagai.
- Ia tumau i le mataupu [o loo talanoaina]. Ia talanoaina nao le atugaluga o loo i ai nei.
- Ia le faaaogaina le faasaunoa.
- Aua le faamatau atu e tatala le faaiipoipoga pe tetea.
- Sue ni fofo e mafuatiaina, e pei o le “O le a ou taulamua i tatalo faaleaiga, ae e taitaia afiafi faaleaiga.”
- Fuafua mo ni tulaga e le maalofia.
 - Ia malilie i ni faamanatu e le faaituau, e pei o le “Ia sei tuu atu i le kalena e tau mai poo ai lea ua oo i ai le faamamaina o ipu.”
 - Toe iloilo ma toe faamanatu vaifofo pe a manaomia ai.





Mauaina o le Fesoasoani i le mavae ai o le Maliu o Nancy

*O le a le mea na manaomia ona ou faia e faaaoga
ai le mana faamalolo o Iesu Keriso i lo'u olaga?*

Saunia e Darren Wilcox

Ta Fepuari o le 2016, na maliu ai lou toalua o Nancy i le mavae ai o se tauiviga e 11 tausaga ma le kanesa o le susu. O le tiga lofituina na ou lagonaina i uluai masina ina ua mavae lona maliu, o le a faigata ona faamatala atu i se tagata e lei oo i lenei ituaiga o faavauvau. O le faanoanoa, mafatia, le fafia, tiga—e leai se upu o nei upu e lava [ona faamatalaina ou lagona i lena taimi]. Sa le mafai ona onosaia.

O le Mana Faamalolo a le Faaola

Ua leva ona ou malamalamana na “afio ifo [Iesu Keriso] i lalo o mea uma” (MF&F 88:6) ina ia mafai ona Ia “fesoasoani [tuu mai le toomaga po o le fesoasoani] ai i ona tagata, e tusa ma o latou vaivaiga” (Alema 7:12). O le uiga o lenei mea, o le mana o le Togiola a le Faaola e faalautele i tua atu o le tuuina mai o le Toetutu ma mo le togolaina mai agasala. E ala mai i lenei mana, e mafai ai foi ona Ia faamalolo i tatou i o tatou taimi o puapuaga ma mafatiaga. I lou tiga, sa faananati—na toeitiiti lava a popolevaledona ou taumafai ia iloa le mea na manaomia ona ou faia e faagaei ai lenei vaega o le mana a le Faaola i lo'u olaga. Mo le tele o vайасо, sa ou suesue ai i tuisusiga paia ma saunoaga mai le Au Pulega Aoao a le Ekalesia. Sa ou talitonu faamaoni e faapea, e ala i tiga ogaoga ma le ositaaulaga mo Ia lava, sa silafia e le Faaola le tiga na ou oo i ai. Ae e faapefea e Lona silafaina o lena mea ona fesoasoani ia te au? Talu ai sa mafatia o Ia i lenei mea *mo* au, o le a se mea na tatau ona ou faia ia maua ai le fesoasoani lea ua Ia silafia le auala e tuuina mai ai?

I le mavae ai o le tele o saililiga, suesuega, tatalo ma tapuai atu i le malumalu, sa amata loa ona ou


malamalamana. E muamua lava, sa amata ona manino lau vaai e faapea, ua uma lava ona fesoasoani, faamafanafana, ma lagolagoina e le Alii lo matou aiga, ae maise lava i vайасо tonu a o lei maliu Nancy. Sa i ai ni aafiaga faale-agaga matagofie ua ou iloa nei o ni faamanuiaga na oo mai mai le mana faamalolo ma le faamalosi o loo i ai mo i tatou uma ona o le Togiola a le Faaola. Ma o le tau ina iloa sa tausia lava i matou e le Faaola i se auala sili ona patino, o le mea lava ia, sa matuai faamafanafanaina lava. E pei o Sataraka, Mesako, ma Apeteniko o anamua, sa i ai lava o Ia faatasi ma i matou i totonu o le “ogaumu aasa” (Tanielu 3:17) o o matou puapuaga.

Faalagolago i le Alii

Sa ou aoaoina foi, e i ai nisi o mea e manaomia mai ia i tatou e mafai ai ona maua le faamafanafanaga ma le faalagolago a le Alii. O le mea aupito taua lava, e tatau ona tatou faalagolago ia te Ia. O lena mea e fai lava si faigata ona fai. Aisea e tatau ai ona ou faalagolago i le Atua ae na mafai lava ona Ia taofia le maliu o Nancy ao lei tupu? I le tali i le fesili lenei, sa ou mafaufau loloto atili ai i se mea na ta'u mai e le Alii i le Perofeta o Iosefa Samita:

“E le mafai ona outou vaaia i o outou mata faalenatura, i le taimi nei, le fuafuaga a lo outou Atua e faatatau i mea o le a oo mai pe a mavae le taimi nei, ma le mamalu e mulimuli mai pe a mavae puapuaga e tele” (MF&F 58:3).

Sa faamanuiaina i matou i le tele o faailo e faapea, o le auala ma le taimi o le maliu o Nancy sa tusa ai lea ma le finagalo o le Alii. Ua faapea ona ou malamalamana, ua faataga e se Tama ua silafia mea uma ma agaalofa i matou



ATA O LE MALUMALU O ATLANTA GEORGIA

e tigaina i nei mea ona, i Lana mamanu atoatoa mo le faaeaga o lo matou aiga, i se isi itu, e alagatatau ai lenei puapuaga. O le iloaina o lena mea, ua ou malamalamai ai, o lo'u tulaga i Lana mamanu e le na o le talitalia ae ia "talitalia lelei" (MF&F 121:8). I le maualuga e mafai ona ou faapaia ai lenei tofotofoga ia te Ia, e le gata o le a ou maua le fesoasoani ae faapaiaina foi. Ua tele ni itu ua ou oo ai i lenei tulaga.

Ua ou fautuaina le ma fanau e fai le mea ua ou aoaoina e au lava i lenei faagasologa.

- Ia faataga le tiga o aafiaga faigata e uunaia outou agai i le avea atili ma se soo.
- Sasaa atu lou loto i le tatalo.
- Afai e te lagona le ita i le Atua ona o le faatagaina o faalavelave e tutupu, aioi atu ia te Ia e suia le ita i le faatuatua ma le usiusitai.
- Ia osifeagaiga o le a e alofa ia te Ia ma ia faamaoni e oo i le iuga.
- Inu e le aunoa mai le afioga a le Atua—mai tusitusiga paia ma saunoaga ma tusitusiga a perofeta o ona po nei ma faiaoga musuia.
- Alu i le malumalu ma se matelaina ina ia aoaoina i mea o le faavavau.
- Sue ni tagata o e ua avea se faalavelave patino ma se faalavelave o le faatuatua, ma faamalosi i latou i lau molimau e uiga i nei aoaoga faavae.

O Se Molimau FaaApostolo

Pe a ma se masina talu ona mavae le maliu o Nancy, na oo mai ai se po sa ou lagonaina ai le matuai faataumaoia o le tiga. Na alu lena aso atoa o ou i ai i le loloto o le tiga ma le faavauvau. Sa ou manatuaina le aoaoga a Elder Jeffrey R. Holland o le Korama a Apostolo e Toasefululua e faapea, "o le ala o le faaolataga e i ai lava le ala e taitai atu ai i taimi uma . . . i Ketesemane."¹ E ui e le mafaatusalia ou puapuaga i puapuaga o le Faaola, ae o lena po sa ou i ai i le totonugalemu o ou lava "taimi pogisa ma oona."²

Ina ua uma ona ou aafia i lenei mea mo se taimi ma tatalo ai mo le fesoasoani, sa oo mai i lou mafaufau se mea na ou faitauina ma faailoga i lau komepiuta i nai tausaga na muamua atu. Sa ou mauaina le [faila o le] faamatalaga ma faasolo loa i lalo i le mea sa ou sueina? Sa o se faatalanoaga ma Elder Richard G. Scott o le Korama a Apostolo e Toasefululua (1928–2015) lea sa fesiliglia ai o ia e uiga i le maliu o lona faletua o Jeanene, ona o le kanesa i le 1995. Sa tali mai Elder Scott, "O le mea muamua lava, . . . E leo leiloa o ia ia te au. O loo i le isi itu o le veli o ia. Ua faamauina i maua i lena sauniga paia o le malumalu, ma o le a ma faatasi e faavavau."³

O lena po, na oo mai ai na upu ma se mana ou te lei lagonaina lava muamua. Sa pei o le sulu o se moli o le ava ua kiina i se po pouliuli. Ou te lei faitau lava i se mea na faapea ona i ai se aafiaga vave ma le loloto ia te au. Sa te'a

ese le pogisa ma le tiga. Sa pei o Alema i le taimi na ia “le toe manatuaina [ona] tiga” (Alema 36:19). O lenei molimau faaaposetolo sa matuai tuia ai lou loto. Sa ou maofa ona o se manatu sa ou malamalama i ai talu mai lo’u laitiiti ua faafuasei ona pei e matuai mataina lava. Sa oo ina ou mafaufau pe na mafai faapefea ona silafia e Elder Scott se mea faapenei. Ma i le taimi lea, sa ou iloaina ai ua ou iloa foi. Afai ou te faamaoni, e mafai ona ou maua uma le faamoemoe sa i ai ia Elder Scott. E ui sa i ai moni lava le faanoanoa ma le faavauvau talu mai lena taimi, ae ou te lei toe lagonaina lava le loloto o le tiga ma le faanoanoa lea na ou oo i ai i lena po.

O le mana lenei ua faasafua mai e le Faaola ia i tatou e fesoasoani mai ai i o tatou tofotofoga. Ou te iloa o le a le mou atoa ese atu le tiga o lo matou aiga, ae e tofatomoanaina i le mea ua ta’ua o faamanuiaga “faamalosia” ma “faaatoatoaina” o le Togiola a le Faaola.⁴ Ua matou latalata atili atu i le Faaola, ma lagona Ana faamautinoaga, ma ua lagolagoina e ala i le faavae mautinoa o a matou feagaiga. ■

E alala le tusitala i Georgia, ISA.

FAAMATALAGA

1. Jeffrey R. Holland, “Lessons from Liberty Jail” (Faigalotu a le Iunivesite Polika laga, Sete. 7, 2008), 6, speeches.byu.edu.
2. Dieter F. Uchtdorf, “Siomiaina i Ona Aao Malu,” *Liahona*, Mat. 2015, 5.
3. “A Sure Witness of Jesus Christ: Elder Richard G. Scott,” lds.org/prophets-and-apostles.
4. Tagai Bruce C. Hafen and Marie K. Hafen, *The Contrite Spirit: How the Temple Helps Us Apply Christ’s Atonement* (2015), 34–52.



I le mavae ai o le 11 tausaga o tauivi ma le kanesa o le susu, sa faapea ona maliu ai loa Nancy Jean Newton Wilcox i le 2016.



FAAMALOSIAINA E IESU KERISO

“Sa aoao mai Isaia o le a tauave e le Mesia o tatou ‘tiga’ ma o tatou ‘faanoanoa’ (Isaia 53:4). Sa aoao mai foi Isaia e uiga i Lona faamalosia o i tatou: ‘Aua e te fefe, aua ou te ia te oe; aua le fetepatepai, aua o au o lou Atua; ou te faamalosia oe; e moni ou te fesoasoani ia te oe’ (Isaia 41:10). . . .

“Ma o lea ua tatou vaiai ai lena mea ona o Lana Togiola, o loo i ai i le Faaola le mana e lagolago ai—e fesoasoani ai—i tiga ma mafatiaga uma faaletino. O nisi taimi e faamaloloina ai e Lona mana se vaivaiga, ae ua aoao mai tusitusiga paia ma o tatou aafiaga e faapea o nisi taimi e lagolago pe fesoasoani mai o la e ala i le tuuina mai ia i tatou o le malosi po o le onosai e onosaia ai o tatou vaivaiga

“. . . O le Togiola a le tatou Faaola ua sili atu nai lo le faamautinoaina mai ia i tatou o le tino ola pea, e ala i se toetu mo le lalolagi uma ma tuuina mai le avanoa mo i tatou ina ia faamamaina ai mai agasala e ala i le salamo ma le papatisoga. O Lana Togiola foi ua tatou maua ai le avanoa e valaau atu ai ia te la o lē ua oo i o tatou vaivaiga uma faaletino ina ia tuu mai ia i tatou le malosi e lavātia ai avega o le olaga faaletino. Na te silafia o tatou tiga, ma o loo i ai o la iina mo i tatou. E pei foi o le Samaria agalelei, a la mauaina i tatou o manunua i tafatafā ala, o le a la fusifusi i o tatou manua ma tausi i tatou (tagai i le Luka 10:34). O le mana faamalolo ma le faamalosia o le Togiola a lesu Keriso e mo i tatou uma o e o le a ole atu. Ou te molimau atu ai i lena mea ma molimau atu foi i lo tatou Faaola, o le ua mafai ai mea uma.”

*Elder Dallin. H. Oaks o le Korama a Apostolo e Toasefululua, “Faamalosia e Ala i le Togiola a lesu Keriso,” *Liahona*, Nov. 2015, 62, 64.*



“IA TATOU OLA FAALAGOLAGO IA I TATOU LAVA MA IA TUTOATASI!”

A o talia ma mulimuli le Au Paia o Aso e Gata Ai i le lalolagi atoa i mataupu ma aoaoga faavae a le Eklesia i le taimua i le ola-tutoatasi, ua latou selesele i faamanuiaga o le “faamoemoega sili atu, toofilemu, ma le alualu i luma.”

Ao lei avea o ia ma se tagata o le Eklesia, sa faaalu e Pita Uglow le tele o lona soifua tagata matua e tulitulimatagau ai le manuia i mea tautupe. Sa foliga i le vaai mai i fafo, sa pei lava na ia mauaina. Aua, sa ia anaina ma faagaoioia ni nai pisinisi.

Ina ua talosagaina e se taitai o le Eklesia i le lotofale i Midlands i Sisifo, Egelani, ia Pita e auai i se vaega mo le taulimaina o mea tautupe patino na ofoina atu e ala i le taulamua a le Eklesia mo le ola tutoatasi, sa le talitonu o ia o le a aoao atu e le kosi se mea ia te ia. Ae peitai, o le taimi lava na amata auai ai Pita i le vaega, sa vave ona ia iloaina na tele lava mea na tatau ona ia aoaoina.

“O le kosi e le na o mea tautupe e faatatau i ai; ua na o le afa lena o le tala,” o lana faamatatalaga lea. “O le mea aupito taua ia te au o le aoao lea e faatuatua i le Tama Faalelagi—i le ala e tuuina mai ai e Ia ia i tatou uma faamanuiaga faaletino ma tatala faitotoa i le ola tutoatasi moni, pe afai tatou te mulimuli i Lana taitaiga faaleagaga.”


I le avea ai ma se sui o se vaega o mea tautupe patino, na aoao ai e Pita tomai moni e pei o le mataituina o tupe

faaalu a le aiga, faia ma le ola i se paketi, faaititia o aitalafu, ma le sefe mo le lumana. O le faaaogaina o nei tomai, faapea ma le faaalia o le faatuatua ia Iesu Keriso ma le galue malosi, na toe totogiina ai e Pita ma lona faletua se aitalafu tele.

“Ua ou faalogoina se lagona māmā tele ma saoloto atu e aunoa ma le matau lea e o mai faatasi ma aitalafu ma le le fuafuaina tatau o mea tautupe,” o lana tala lea. “Ua ou lagonaina le tele o faamanuiaga a le Tama Faalelagi i se auala ou te lei lagonaina muamua lava. Ua ou aoaoina le ala e talosagaina ai o Ia ma faalogo atu i Ana tali pe a ou manaomia le fesoasoani i au pisinisi faaletino.”

Taimua o le Ola Tutoatasi

O le ola tutoatasi e sili atu nai lo na o le i ai o se galugega lelei, teuina o taumafa, po o tupe i le faletupe. Nai lo o lena, o “le tomai, tautinoga, ma le taumafaiga e sauna mea faaleagaga ma faaletino e manaomia o le olaga mo le tagata lava ia ma le aiga. A ola-tutoatasi tagata o le [Eklesia], o le a sili atu ona lelei lo latou auauna atu ma tausia



isi”¹ a o latou faamuamua le galue o se mataupu faavae taiala i o latou olaga.

Ua aoao mai Peresitene Thomas S. Monson: “O le ola-tutoatasi o se taunuuga lea o a tatou galuega, ma e lagolago ai isi gaoioiga uma faaleuelefea. O se elemene taua i lo tatou soifua manuia faaleagaga faapea foi ma le faaletino. . . . ‘Ia tatou galulue mo mea tatou te manao-mia. Ia tatou ola faalagolago ia i tatou lava ma ia tutoatasi. E leai lava se isi mataupu faavae e mafai ona maua ai le faaolataga. O le faaolataga o se mataupu patino i le tagata lava ia, ma e tatau ona tatou galueaiina lo tatou lava faaolataga i mea faaletino faapea foi ma mea faaleagaga.”²

I lalo o le taitiaga a taitai perisitua i le lotoifale, e silia ma le 500,000 le Au Paia o Aso e Gata Ai i le silia ma le 100 atunuu ua auai i le taimua o le ola-tutoatasi talu mai le 2014. Ua faalauiloa atu nei e le Ekalesia le taimua i Amerika i Matu atoa.

O le taimua ua aofia ai kosi ma punaoa “e fesoasoani i tagata o le Ekalesia ia aoao ai ma faatino mataupu faavae

o le faatuatua, aoga, galue malosi, ma faalagolago i le Alii. O le taliaina ma ola ai i nei mataupu faavae,” ua saunoa mai le Au Peresitene Sili, “o le a mafai ai ona [tatou] maua faamanuiaga faaletino na folafola mai e le Alii.”³

Fiafia ma Faamoemoe [o le a Manuia]

Na leai se faamoemoe o Maria Edilene Romão. Sa ona le maua se galuega, o ia o se tina nofotoatasi, ma sa i ai sana fanau e tausi.

O le taimi lena na valaaulia ai o ia e ni tagata se toalua o lana uarota i Santa Catarina, Pasila, i se faigalotu a le ola tutoatasi. Ina ua uma le faigalotu, sa faapea ona auai loa Maria i se vaega e fesoasoani i le sueina o sana galuega.

“O le taimi muamua lea o lou olaga, na ou talitionu ai i se lumanaia lea e mafai ai ona ou tausia ai lou aiga,” o lana tala mai lea. “Sa ou talitonu o le a fesoasoani mai le vaega o le ola tutoatasi ia suia lou olaga.”

Sa faapena lava.

I le 12 vaiaso na sosoo ai, sa tuuto atu e Maria o ia lava i lana vaega, i ana suesuega, ma ana tautinoga. Sa galue ma

UA VALAAULIA OUTOU

O le auala i le ola tutoatasi sili atu e amata i se valaaulia i se faigalotu O Lo'u Auala i le Ola Tutoatasi. I le faigalotu, o le a uunaia ai oe e iloilo ou tulaga o loo i ai nei, faatulaga se fuafuaga mo le agai i luma, ona ave atu lea o lau fuafuaga i le Alii. I le faaiuga o le faigalotu, o le a valaaulia ai oe e filifili se vaega o le ola tutoatasi e mafai ona fesoasoani atu ia te oe:


- Saili se galuega pe faaleleia lou tulaga faalegaluega.
- Ia pulea lelei au lava mea tautupe ma mea tautupe a le aiga.
- Filifili se ala faaleaoaoga ma ia faamanuiaina i le aoga.
- Amata pe faatupulaia se pisinisi laitiiti.

I lau vaega o le ola tutoatasi, o le a e:

- Auai i se fonotaga a le vaega e faalevaiaso ma e tai lua itula le umi, mo le tolu masina.
- Atinae ma galue i tautinoga patino ina ia ausia ai sini o le ola tutoatasi.
- Aoao mai, fefautuaai faatasi, ma lagolago isi tagata o le vaega.
- Ia maua le faatuatua sili atu ia lesu Keriso ma i Lona mana e fesoasoani ai ia te oe lava ia e ola tutoatasi.

E galulue se vaega o le ola tutoatasi e tai pei lava o se aufono. E fesoasoani tagata auai i le tasi ma le isi ma e tali atu mo le tasi ma le isi. O taitai o vaega e valaaulia fegalegaleaiga, uunaia le auai, faaali atu vitio faaleaoaoga, ma fesoasoani i vaega o le ola tutoatasi ia mulimuli i le faagasologa e pei ona faataatia atu i tusi ma mea e faaaoga e faataatau i ai.

E mafai e tagata ona maua vitio ma mea e faaaoga na faaaoga i le aoaoga faamasani o le ola tutoatasi i le srs.lds.org po o le polokalama Gospel Library i telefoni feaveai.



se malosi fou na ia mauaina agai atu i ana sini. Sa ia faataitaia auala o faatalanoaga mo ni galuega. I totonu o le lua vasio, sa ia faamautuina ai se faatalanoaga na ono faamanuiaina mo se galuega. O lena faatalanoaga sa ia maua ai se galuega.

"Ua suia e faavavau lou olaga," o le tala lea a Maria, o le ua le toe tauivi e fafaga lona aiga. "O le taimi nei ua ou fiafia, naunau, onosai, ma faamoemoe o le a manuia mea uma. Ou te talitonu o loo soifua le Tama Faalelagi ma e alofa ia te au. Ou te iloa a faaali atu lou faatuatua ia Jesu Keriso, e faamanuiaina au.

"O Le Meafaigaluega Aupito Lelei"

Na saunoa Elder Robert D. Hales o le Korama a Apo-setolo e Toasefululu: "O le faalagolago ia i tatou lava o se auala i se iuga maualuga atu. O la tatou sini laualuga lava o le avea e faapei o le Faaola, ma e faalauteina lena sini e ala i le tatou auaunaga lē manatu faapito i isi. E faateleina pe faaitiitia lo tatou tomai e auauna atu ai e ala i le maualuga o i ai lo tatou faalagolago ia i tatou lava."

Na faaopoopo mai Elder Hales, seiloga lava ua tatou faalagolago ia i tatou lava, "ona mafai lea ona tatou faaa'aoa'o i le Faaola i le auauna atu ma faamanuiaina isi."⁴

Na iloa e Sergio Galbuchi lena upumoni mo ia lava ina ua amataina sana lava pisinisi a o lei leva ona valaauinna o ia e le au peresitene o le siteki e avea ma tagata faapitoa o le siteki mo le ola tutoatasi. O le i ai o le faatuatua, tomai, ma le malamalamana na ia mauaina o se sui o le komiti, na tatalaina ai e Sergio ma lona faletua o Silivia, se faleoloa i Buenos Aires lea na faatauina ai "mea taulima ma mea taumafa" a Atenitina.

"Ou te manatu o le ola faalagolago ia i tatou lava, o se auala lea e faaaoga ai le faatuatua," na fai mai ai Sergio. I se taimi na muamua atu, la te lei maua ai ma Silivia le fiafia i le manuia lea sa la faamoemoe i ai, o lea sa tumau ai ona avea le faatuatua ma totonugalemu o a laua taumafaiga. Peitai, a o la faatalitali mo le manuia i tulaga tautupe, sa la galulue malosi ma faamanuiaina ai tagata faatau i a laua oloa *ma* a laua taumafaiga faafaifeatalai.

"E toatele ni tagata sa faapea ona ma masani i ai," o le tala lea a Sergio. "Ma na ma maua le avanoa e foai atu ai kopi o le Tusi a Mamona."

O le taimi muamua lava, na faailoa atu ai e le komiti o le ola tutoatasi a le siteki ni tagata se toa 10 i le siteki a Sergio o e na manaomia le fesoasoani i le ola tutoatasi. Ae, na auai ai ma epikopo.



"O le taimi nei ua matou iloa e 35 tagata o loo manao-mia le fesoasoani," o le tala lea e Sergio a o faatupulaia le taumafaiga. "Sa valaaulia taitoatasi i latou e o latou epikopo e auai i vaega."

Sa tuputupu ae lo latou faatuatua, sa latou faia suiga na manao-mia, ma sa latou faaaogaina ni tomai fou.

Sa faaopoopo mai Sergio, "Soo se taimi lava matou te talanoa ai ma taitai perisitua, ou te taumafai e faailoa atu ia i latou o le meafaigaluega aupito lelei lenei ua matou mauaina mai le Au Peresitene Sili." "E sili atu nai lo soo se tupe e mafai ona tuuina atu e fesoasoani ai i se tasi, ma o ona aoaoga e manino atu nai lo o le tele o mea e faaaoga na ou aoaoina i le taimi na avea ai au o se tagata aoga i le iunivesite."

O le mea aupito taua, o i latou e faamaeaina a latou kosi e 12 vaiaso o le ola tutoatasi e avea ma soo sili atu le lelei o Iesu Keriso, ma iloa ona faaaoga o latou tomai e atinae ai le malo o le Atua.

FAAALIGA MA LE FAALAGOLAGO O LE TAGATA IA TE IA LAVA

O au peresitene o siteki ma itu e faatautaia, taitaia, ma taialaina le polokalama taulamua a le Ekalesia o le ola tutoatasi. Latou te faia lenei mea e ala i le galulue vavalalata ma le Aualofa ma e ala i le faatulagaina o se komiti o le ola tutoatasi.

O le komiti e aofia ai se sui o fautua maualuga, o se sui o le au peresitene o le Aualofa a le siteki, o le taitaifono a le aufono o le uelefea a epikopo, ma le tagata tomai faa-pitoa o le siteki mo le ola tutoatasi. O le komiti e aoaoina ma uunaia aufono a uarota e tatalo e uiga, ma valaaulia tagata e auai i le polokalama taulamua. Latou te faatu-lagaina vaega o le ola tutoatasi ma galulue faatasi ma le pule o Auauna o le Ola Tutoatasi e ao mai ma faasoa atu punaoa o le lotoifale.

"O le manulauti a le polokalama taulamua a le Ekalesia o le ola tutoatasi, e fesoasoani lea i tagata taitoatasi ia maua faaaliga faaletagata lava ia e ala i le ususitai i mataupu faavae taua o le talalelei. Ua valaaulia taitai e fatuina se siosiomaga [e ala i soalaupulega fefaaosoai] lea e mafai ai e le Agaga Paia ona aoaoina tagata auai i 'mea uma e tatau ona [latou] faia' (2 Nifae 32:5; tagai foi i le 2 Nifae 32:3)."⁵

E mafai ona maua e taitai perisitua ma tagata o le ekalesia isi faamatalaga atili i le srs.lds.org.



OLA FAALAGOLAGO IA I TATOU LAVA MA IA TUTOATASI

"Ua poloaiina le Ekalesia ma ona tagata e le Alii ina ia ola faalagolago le tagata ia te ia lava ma tutoatasi. (Tagai i le MF&F 78:13–14.)

"O le matafaioi a le tagata lava ia mo le soifua manua i fegalegaleaiga, lagona, faale-agaga, faaletino, po o le tamaoaiga ua pau muamua atu lava lea i ona luga, lona lua o lona aiga, ma lona tolu o le Ekalesia pe afai o se tagata faamaoni o ia."

Aoaoga a Peresitene o le Ekalesia: Spencer W. Kimball, (2006), 116.



"O le vaega lenei o le [ola tutoatasi] e le nao a matou pisinisi e taulai atu i ai; e taulai atu foi i a matou mafutaga ma le Atua ma isi," na fai mai ai Sergio. "E faapea ona avea i matou ma ni soo e sili atu le lelei o Iesu Keriso i le aluga o le tolu masina lea na faaalu i lenei vaega. E moni lava, atonu o le a fesoasoani se pisinisi ia i matou ia atili ola tutoatasi ai, ae o le faamoemoega tupito lava o le, ia auauna atu ai."

Tuputupu Ae ma le Faatinoga

Na saunoa Peresitene Iosefa F. Samita (1838–1918), "Ua avea ma se aoaoga faavae i taimi uma a le Au Paia o Aso e Gata Ai le, o se tapuaiga e le i ai se mana e laveai ai tagata i le faaletino, ma faia ia latou manuia ma fiafia iinei, e le mafai ona faalagolago i ai e laveai i latou faaleagaga, e faaaea i latou i le olaga a sau."⁶

E le tatau la ona tatou tetei ai, aua e ala i le malolosi i le faaletino, tatou te malolosi ai foi i le faaleagaga. Na molimauina lava e Elder David ma Sister Theresa Nish, o e na auauna atu o ni faamisiona i le ola tutoatasi i le Atu Solomona, lena sootaga [o le manuia faaletino ma le faaleagaga] i tagata o le Ekalesia iina.

"O le tuputupu ae faaleagaga ma le auai atu i le malumalu na manino lava le faamaonia ai o mataupu faavae, tomai, ma mausa o loo aoaoina i le *O Lo'u Faavae* ma le faamalamalamaga atoa o loo i le *O Lo'u Auala i le Ola Tutoatasi*," o le la tala mai lea e uiga i tamaitusi o le polokalama taulamua. "O loo [la]

fesoasoani i tagata ia alualu i luma faaleagaga faapea ma le faaletino, lea e taitai atu ai i le ola tutoatasi faaleagaga ma faaletino."

Ua faamatala mai e Cheryl Redd, o se taitai faamaopo-o o le ola tutoatasi i Iuta, ISA, le ala ua fesoasoani ai mataupu faavae faaleagaga o le polokalama taimua i lona alualu i luma faaletino: "Ua ou iloaina o nei mataupu faavae ma faiga faavae e mafai ona faatatau i vaega uma o o tatou olaga. O nei mafutaga faaleaoaoga ua fesoasoani ia te au ou te tulimatai atili atu ai i ou tiutetauave o se ava ma se tina. Ua ou maua nei meafaigaluega e malamalama lelei ai i mea tautupe a [lo'u] aiga. Ua ou vaaia le ala, o le galulue faatasi ma o tatou taitoalua e pulea mea tautupe, i se isi itu, o se pisinisi. Tatou te manaomiaina nei meafaigaluega ina ia manuia ai o tatou aiga."

I le Ekalesia aoao, o lenei vaaiga mamao faateleina, ua faaliliuina i le faamaoni faateleina ma le malosi faaleagaga. O se taunuuga, ua faateleina ai le tautino o le au paia e auai i le lotu, totogi sefuluai, ma tumau le agavaa mo le malumalu.

"Na ta'ina atu i ai lo'u mafaufau," o le tala lea a se tagata fou o Siaosi Echevarría e uiga i le polokalama taulamua o le ola tutoatasi. Fai mai Siaosi, o le e aveina se taavale loupase i Peru, na fesoasoani le polokalama taimua ia te ia e maua ai se molimau o le talalei a o faatumulia o ia i se manao ia alualu i luma o ia lava. O le taimi nei, ua faamoe-moe ia avea ma se fai eletise, e faaleleia tamai taavale laiti ia ua tele tausaga o ia aveina.

Fai mai o ia, "E le tatau ona tatou nofonofo ma faatalitali ia tutupu ni mea ia i tatou." "E tatau ona tatou galulue."

"O Le A Faamanuiaina Ai Lou Olaga"

Ua selesete e le Au Paia o Aso e Gata Ai i le lalolagi atoa ia faamanuiaiga folafolaina a le Alii a o latou aoao ma le filiga, ola, ma faaaoga mataupu faavae o le ola-tutoatasi faaleagaga ma faaletino. E ui e mafai ona manuia ai tagata uma, ae ua faapitoa ona faamanuiaina e le polokalama taimua i latou atonu e leai pe o manaomia foi le faamalolosia i le ola tutoatasi faaletino ma faaleagaga. O le Tupe Faaagaga mo Aoga e lagolagoina le polokalama taimua o le ola tutoatasi e ala i le fesoasoani ia i latou ia faia se fuafuaga mo aoaoga faamasani faaleaoaoga ia faaaoga ai punaoa manaomia.

O loo folafola mai i tusitusiga paia le fesoasoani a le Alii a o tatou galulue agai atu i le ola tutoatasi. Na fetalai mai o Ia, "O lo'u faamoemoe o le faia lea o mea mo la'u au paia" (MF&F 104:15).

O le saunoa ai e uiga i lena faamoemoega, ua tautino mai ai e le Au Peresitene Sili e faapea: "O lenei faaaliga o se folafolaga mai le Alii o le a Ia saunia ni faamanuiaiga faaletino ma tatala faitotoa o le ola tutoatasi, o le mafai lea e i tatou ona saunia mea e manaomia o le olaga mo i tatou lava ma tagata o o tatou aiga."

Pe a tatou suesue, faaaoga, ma aoao atu nei mataupu faavae i tagata o aiga, ua folafola mai e le Au Peresitene Sili, "o le a faamanuiaina ai lou olaga. O le a e aoao pe faapefea ona e faatinoina lou auala e agai atu ai i le ola tutoatasi



O LE UTE O LA TATOU TAPUAIGA

"E pei o itu e lua o se tupe, o le faaletino ma le faaleagaga e le mafai ona tuuveseeseina. . . .

"O lenei galuega o le faia i le ala a le Alii ua le na o se isi mea i le lisi o polokalama a le Ekalesia. E le mafai ona lafoaiina pe tuu ese. E totonugalemu i a tatou aoaoga faavae; o le ute lea o la tatou tapuaiga."

Peresitene Dieter F. Uchtdorf, Fesoasoani Lua i le Au Peresitene Sili, "O le Faia i le Ala a le Alii," *Liahona*, Nov. 2011, 2011, 53, 55–56.

atili. O le a faamanuiaina oe ma se faamoemoega sili atu, toafilemu, ma le alualu i luma."⁷ ■

FAAMATALAGA

1. *Tusitalima 2: Taitatina o le Ekalesia* (2010), 6.1.1.
2. Thomas S. Monson, "Guiding Principles of Personal and Family Welfare," *Ensign*, Sept. 1986, 3; tagai foi i le Marion D. Romney, i le Welfare Services Meeting Report, Oke. 2, 1976, 13.
3. Au Peresitene Sili, i le *O Lo'u Faavae: O Mataupu Faavae, o Tomai, o Mausa* (tamaitusi, 2015), 2.
4. Robert D. Hales, "O Se Vaaiga a le Talalelei i le Uelefea: Faatuatua i Lona Faatinoga," i le *Mataupu Faavae Autu o le Uelefea ma le Ola Faalagolago o le Tagata ia te Ia Lava* (tamaitusi, 2009), 2.
5. *Ua Valaaulia Outou: O Se Taiala a le Taitai i le Taulamua o le Ola Tutoatasi* (tamaitusi, 2016), 9.
6. *Aoaoga a Peresitene o le Ekalesia: Iosefa F. Samita* (1998), 164.
7. Au Peresitene Sili, i le *O Lo'u Faavae*, 2.



O le auauna atu e le o taimi uma e talafeagai ai, ae i le avea ai o se tama ma se epikopo, sa taumafai ai Ilir Dodaj e faaali atu i lana fanau [o le auauna atu] o taimi uma lava e aoga ai.

CODY BELL, LE PUEATA

Ilir Dodaj


Durrës, Alepania

Sa manaomia e se tuafafine matua o le uarota sa i ai se fula i lona laualo le fesoasoani i aso uma lava, ona sa le mafai ona minoi mai lona moega. Mulimuli ane, sa talosaga mai ai pe mafai ona ou sau nao au, ae le o se isi lava perisitua poo se isi lava tagata, ona sa matuai tigaina lava ma o le a maliu foi. Sa ia lagonaina le lagolelei i le i ai o lona epikopo e faatasi ma ia.

I se tasi o aso, sa faia ai se tao-toga o lo'u fatu, ma sa le mafai ai ona ou asiasi atu ia te ia mo se taimi puupuu. Ina ua ou toe alu atu e vaai o ia, sa ia fai mai, "Epikopo, e mafai faapefea ona e sau e fesoasoani mai ia te au pe afai o lena na faatoa uma lou taotoga?"

Sa ou fai atu ia te ia, "O lo'u valaauga o le auauna atu i isi."

Tagai i nisi o ata o Epikopo Dodaj ma lona aiga i le lds.org/go/101738.
Ina ia aoao atili e uiga i le galuega a se epikopo, asiasi i le lds.org/go/101739.





E POPOLE LE TAMA FAALELAGI I LA'U PISINISI

Le avea ai ma se tina nofofua ma se fanau e toalima, sa ou lagonaina ai le mamafa o le tiutetauave o le tausiga o lo'u aiga. Ou te faigaluega o se teufale i fale o aiga, ma e le lava [tupel] mai la'u galuega e tausi ai lo'u aiga. Sa ou auai i se vaega o le ola faalagolago o le tagata ia te ia lava, ina ia mafai ona ou aoao ai i auala e faaleleia ai lo'u tulaga.

Sa musuia au e le vaega "Amataina ma le Faalaina o La'u Pisinisi" ma ou filifili ai o le a ou suiina ma faatau atu ni taga e ufiufi ai ulo e kuka umi ai meaai. Ou te suiina lava ia taga seja

oo i le leva o le po pe a ou foi mai i la'u galuega ao.

Sa ou faigaluega i le leva o se tasi o po i se oka tele sa tatau ona uma i le taeao na sosoo ai, ae pe loa ma la'u laau suisui. Sa tuneva le po, ma sa leai ni fai masini na avanoa e fesoasoani mai. Sa aumai faatasi le masini ma lona tamaipusa o meafai-galuega, peitai ou te lei faia muamua lava se masini. Sa matuai ou le iloa po o fea e amata ai.

Ona ou manatuaina lea o le lesona i le tusi lesona *O Lo'u Faavae* na faaautuina "Faatinoina o le Faatuatua

ia Iesu Keriso." I lena taimi, sa ou iloaina sa manaomia ona tuu lo'u faatuatuaga i le Alii. Sa ou pau ifo i ou tulivae ma augani atu: "Le Tama Faalelagi, faamolemole fesoasoani mai ia te au e faaleleia lenei masini, ina ia mafai ona ou faamaeaina le oka mo au tagata faatau e piki i le taeao. "Le Tama Faalelagi, faamolemole fesoasoani mai ia te au!"

Sa faapea ona ou maua se uunaiga manino e aumai le vili faovilivili mai le tamaipusa o mefaigaluega ma faaaoga e oomi ai i totonu se vaega faapitoa o le laau suisui. Sa ou faia faapea, ma le faalagolago atoa i lo'u faatuatua. Sa taofi la'u manava ao ou toe kiina le laau suisui. Sa ola!

Ma sa mafai ona ou ausia le aso na faagata ai le oka. Sa ou iloaina le faapei o le i ai o le Tama Faalelagi ma Iesu Keriso o ni paaga faipisinisi. Ou te iloa o le a faaauau ona faamanuiaina au a o ou saili mo avanoa e faaaoga ai mea ua ou aoaoina i le vaega o le ola faalagolago o le tagata ia te ia lava. ■

Buyisile Zuma, KwaZulu-Natal,
Aferika i Saute

Sa ou faigaluega i
le leva o se tasi
o po i se oka tele
sa tatau ona uma i
le taeao na sosoo
ai, ae pe loa ma la'u
laau suisui.



O SE TALI MUSUIA I SE FAATALANOAGA MO SE GALUEGA

Ina ua uma ona tofia au ou te taitaia se komiti a le siteki o le ola faalagolago o le tagata ia te ia lava, sa ou malamalama ai sa le lava foi lou totogi. Faatasi ai ma lenei malamalamaaga, sa tele atu ni mea na ou manao i ai mai lo'u olaga faigaluega.

Sa ou lagonaina se naunau faafouina e sue se galuega e lelei atu, ma talosaga mo le fesoasoani i le tusiga o se talaaga faafaigaluega. Sa ou auina atu la'u talaaga fou faafaigaluega i nisi o pisinisi ma sa lei umi ae valaau mai mo ni faatalanoaga.

I se tasi o [faatalanoaga], sa faailoa mai e le fai faatalanoaga se laina mai la'u talaaga faafaigaluega lea na taua ai la'u galuega o se fesoasoani i le au peresitene o le siteki ma fesili mai, "E mafai ona e tau mai i le lima sekone po o le a le uiga o lenei auaunga faalelotu?"

Sa ou fai atu, sa ou i ai i le autaitai o se faalapotopotoga e nafa ma le taialaina ma le manuia o le silia ma le 2,500 o tagata. Sa oso le fialoa o le fai faatalanoaga ma faapea mai, "E tasi le minute e te filifili ai pe faapefea ona e tuuina mai se tali e lima sekone i le fesili lenei: e faapefea ona e taialaina na tagata e 2,500?"

Na ou iloa o le taimi sili ona taua lenei i le faatalanoaga. Sa ou tatalo ma ole atu i lo'u Tama Faalelagi mo se fesoasoani ma manatua vave ai lesona na ou aoaoina mai le vaega o le ola-tutoatasi. Sa ou lagonaina le oso mai le mautinoa.



Ina ua uma le minute e tasi, sa fesili mai le fai faatalanoaga, "E faapefea ona e taialaina na tagata e 2,500?"

"Matou te fesoasoani ia i latou e faatutu ni sini," sa ou tali atu ai.

Na ou iloa o nei sekone e lima o le a avea ma taimi sili ona taua i le faatalanoaga. Sa ou tatalo ma ole atu i lo'u Tama Faalelagi mo se fesoasoani.

Sa tulai le fai faatalanoaga, sa [ma] lulu lima, ma fai mai, "Ua e faigaluega."

E maoae le tago mai o le Atua i lo'u lima ma tali mai i la'u tatalo. Ou te faafetai i lo'u Faaola mo le musuia o o tatou taitai e fatufatuai le taulamua i le polokalama o le ola faalagolago o le tagata ia te ia lava. Ua faapea ona faa-

manuiaina patino ai au, ma ua ou vaia le faagasologa faigofie ma le musuia o le taulamua i le polokalama o le ola faalagolago o le tagata ia te ia lava, ua manuia ai le toatele o isi o le matou siteki. Ua matuai ou tali-tonu lava i le mafai e mataupu faavae o le ola-tutoatasi ona siitia ai olaga, o lea ina ua avea au

ma se taitai i ni tagata faigaluega e toa 15 i lau galuega fou, sa amata ona ou aoaoina i latou i mataupu faavae o le ola-tutoatasi.

Ua ou tuputupu ae ma ua tele atu ou tomai nai lo le mea na ou manatu ou te oo i ai. Ua ou maua nei se totogi e tausai ai au ma lou aiga. O lenei tai-mua ua fesoasoani tatou te alualu ai i luma i aso taitasi e ala i le fesoasoani ia tatou maua le ola-tutoatasi sili atu. ■

Gibrir Padilha Dos Santos,
São Paulo, Pasila


FAATELEINA O LA'U PISINISI KEKE ARAISA

Sa ou manao lava e auina atu lo'u atalii i se misiona, peitai o le faatauina atu o le kilo e tasi (2 pauna) o *bibingka* (keke araisa) i le vaiaso, sa le lava lea e mafai ai ona tausi o ia i se misiona.

Sa fesoasoani lo'u atalii i mea tautupe a le aiga, sa ia le maua se lagona lelei pe a alu [i le misiona] aua sa popole tele o ia i lo matou tulaga tautupe. Sa o se tauiviga faifai pea mo lo latou aiga le maua o ni tupe. Sa ou mitamita i lo'u atalii e 25 tausaga le matua mo lona manaoga amiotonu e auauna atu i le Alii, ae na ou iloaina o le a matou manaomia se vavega ina ia faataunu ai lana moemitiga o le auauna atu i se misiona.

Sa ou auai i se vaega mo le ola faalagolago o le tagata ia te ia lava. Eala i le mataala ma le faaaogaina o lo'u faatuatua, na ou iloa ai, o le a faamanuiaina lo'u aiga. I le aluga o se tasi o fonotaga, sa uunaia ai au ou te alu i se maketi mo tagata lautele. O iina, na ou vaaia ai le toatele o tamaitai o faatau atu ni meaai mama faaleatunu. Sa ou faia se feutagaiga ma se tasi o tamaitai. Sa ou fai atu ia te ia, o le a tuu au oloa i le taeao na te faatauina atu, ae faatoa aumai le tupe mama pe a uma le aso. Sa aoga le fuafuaga ia i ma'uuma. Sa lei leva ae maua isi au tagata na faatauina atu [au oloa]. Sa oo la'u pisinisi i ni tagata faatau atu e toa 10 i le taimi na ou i ai i le vaega mo le ola faalagolago o le tagata ia te ia lava.

Sa ou aoaoina e tuu ese au tupe patino mai tupe o lau pisinisi ma fai lou lava totogi. Sa ou aoaoina e taofi le faaalu o le taimi i le faiga o oloa e le taulia ae taulai atu i le mea sa maua ai le tupe faasili. Sa ou aoao foi e uiga i le maketiina i ala o faasalalauga i agafesootai. Sa fesoasoani mai la'u soa mo faatinoga mai le vaega mo le ola faalagolago o le tagata ia te ia lava, e fai la'u faitotoa i le Apifoliga [Facebook]. Mai iina, sa ma aoao ai i le faaigoaina ma le tuupepaina [o oloa]. Sa iu ina ola la'u pisinisi ma oo ai ina faamavae lo'u toalua mai lana galuega faigata faaletino ae ma galulue faatasi.



MAUAINA O LE TAU A O LE TAGATA LAVA IA E ALA I LE OLA-TUTOATASI

Lata mai nei lava sa fesili mai ai se tasi pe na a mai au faatau. Sa ou tau atu ia te ia ma le mitamita, ua ou faatauina atu nei le 12 kilo (26 pauna) o keke araisa.

"O le 12 kilo i le vaiaso e maoae!" sa ia fai mai ai.

"Leai, tuagane," sa ou fai atu ai. "Ou te faatauina atu le 12 kilo *i le aso*."

Sa fai mai i se taimi mulimuli ane lo'u atalii, sa fiafia ona ua mafai nei e la'u pisinisi ona maua mai mea matou te manaomia.

"E foliga mai la ua mafai nei ona ou auauna atu i se misiona faafaifeautalai," o lana tala lea.

O loo auauna atu nei o ia i le Misiona a Filipaina San Pablo. Ou te faafetai lava mo le taulamua a le polokalama o le ola tutoatasi. E moni lava le fetalaga a le Alii na Ia fetalai mai ai, "O lo'u faamoemoe o le faia lea o mea mo la'u au paia" (MF&F 104:15). ■

Lordita Yagomyom, Misamis Occidental, Filipaina

I le aluga o se tasi o fonotaga a le vaega mo le ola-tutoatasi, sa uunaia ai au ou te alu i se maketi mo tagata lautele. Sa ou faia se feutagaiga ma se tasi o tamaitai na te faatau atu au keke araisa.

Sa ou faaipoipo ma na i ai sa'u fanau se toatolu, ae sa ou le faigaluega. O le leai o ni galuega sa ou lagonaina ai le leai o se faamoemoe. Sa ou popole mo le saogalemu o lo'u aiga, ma sa faapea ona ou le toe talitonu ai ia te au lava.

Sa uunaia au e lo'u toalua o Carla, ou te auai i se vaega o le ola faalagolago o le tagata ia te ia lava. Sa ou matamuli e faapea atu sa leai sa'u galuega, ae sa ia faamalosiau mai ou te auai i le vaega ia mafai ai ona ou tausia lo matou aiga.

Sa ou taumafai lava i ai ma le faatautau. Ao ou auai i le vaega, sa ou iloa ai o ou tomai i le Igilisi e mafai ona avea ma se aseta ttau i le lalolagi faigaluega. Sa ou aoaoina le Igilisi i la'u misiona, ae sa nao mea e faatautau i le lotu sa ou iloa tautala ai. Sa ou lesitala loa i vasega Igilisi sa ofoina mai e le Ekalesia e faaleleia atili ai la'u vaogagana Ou te foi mai mai le vasega Igilisi i se tasi o aso, ae tuu mai e Carla le telefoni ia te au.

"O ai lea? Sa ou fesili ai.

Sa ia tali mai, "Ou te le iloa." "O loo tautatala faaPeretania."

O se sui o punaoa mo tagata faigaluega mai se tasi o kamupani aupito tele i Costa Rica sa fesili mai e faatalanoa au. Sa ou tei, ae sa matuai manai

le aluga o le faatalanoaga. Sa ou iloa mulimuli ane o Carla na faatulagaina le faatalanoaga.

Sa ou maua le galuega, ma sa ou manatua auala na fesoasoani ai ia te au la'u vaega o le ola faalagolago o le tagata ia te ia lava. Ona ou mafaufau lea pe faapefea ona ou faaaogaina lelei mea na ou aoaoina. Sa amata ona ou sailia se galuega sa sili atu foi le lelei, ma sa ou mauaina. Ona ou galue lea agai i le amataina o la'u lava pisinisi kamuta.

Ou te le iloa po o fea se mea semanu o matou i ai ma lo'u aiga pe ana le aunoa le amataga lea na matou maua mai i le polokalama taimua o le ola-tutoatasi. Sa ou aoao ai ia lotomaualalo ma ia ole atu i le Alii mo le fesoasoani. Sa ou aoao ai foi e faataga i latou o e sa mananao e fesoasoani mai e faamanuia ai lo'u olaga. Ua matou maua le tele o faamanuiaga. Ua ou maua nei le lagona o le taua o le tagata lava ia, ma mafai ona ou faamanuiai lo'u aiga i tupe ou te maua. Ou te iloa e faamanuia i tatou e le Agaga pe a tatou lotomaualalo. ■

José Alberto Navas (e pei ona faamatalaina atu ia Miriam Sweeney), San José, Costa Rica



O Lesona e Lima mo le Autalavou Matutua mai i Aposetolo Talavou

Saunia e Matthew C. Godfrey

Matagaluega o Talafaasolopito a le Ekalesia

Sa i ai i le va o le 23 ma le 35 tausaga le matutua, peitai sa latou fesoasoani e sui le lalolagi. O uluai Aposetolo o le Ekalesia



toefuataiina sa talavou. Sa lagona e nisi le faatauvaa. Sa faia e nisi ni mea sese. Ae sa latou faia uma lava se ese-esega. O ni lesona nei se lima e mafai ona tatou aoao mai i o latou aafiaga?

1. E Le Faapea e Tatau ona E Lagona Ua Lava Lou Lelei E te Agavaa Ai

Sa lagona e Heber C. Kimball le faatauvaa ina ua ia maua lona valaauga i le Korama a Aposetolo e Toasefululua ia Fepuari 1835. Sa lei atoa le tolu tausaga talu ona i ai i le Ekalesia ma sa na o le 33 tausaga o lona soifua.

“Sa mamao lava mai lou manatu,” o le saunoaga lea a Heber i se taimi

**O le a se mea e
mafai ona tatou
aoao mai aafiaga
o uluai Aposetolo
o le Toefuataiga?**

mulimuli ane.¹ Ae sa naunau o ia e talia le valaauga, ma i le faamanuiaina o lona faauuga, sa tau atu ai ia te ia “e faitau miliona” o le a “liliu mai e ala i lana faatosinaga.”²

I le avea ai ma se Aposetolo, e lua ni misiona na maoae le faamanuiaina sa ia auauna atu ai i Egelani. Sa ia faaliliuina se anoano o tagata o o latou tupuaga lea atonu ua fia miliona lo latou aofai i le aso. Mo Heber, o le agai i luma e ui ina sa ia lagona na itiiti se mea sa ia te ia e tuuina atu, na faamanuiaina ai o ia ma le toatele o isi.



2. E Faamatalaina i Tatou i Faaiuga, Ae Le o Tulaga

Sa sola ese Thomas B. Marsh mai [lona] aiga i New Hampshire i le 14 o ona tausaga. Sa faigaluega o ia o se tagata faifaatoaga i Vermont; o se laulau'aiga i Albany, Niu Ioka; i se faletimalo i le Aai o Niu Ioka; ona avea ai lea o se auauna i Long Island. Sa le mautu ona tulaga se'i oo i le taimi na feiloi ma faaipoipo ai ia Elisapeta Godkin.

Sa faapea ona tialaina i laua ma Elisapeta e le Agaga i Niu Ioka i sisifo. O iina, sa la faalogo ai e uiga i le Tusi

a Mamona. Sa vaai Tomasi i kopi o itulau muamua e 16 a o aveese mai i le masini lomitusi, ma sa faataga o ia e le lomitusi e faitau le itulau na uma ona siaki. O le talitonu ai, o le tusi e mai le Atua, sa filifili ai Tomasi e auai i le Ekalesia. Sa papatisoina o ia i le aso 3 o Setema, 1830.³

Sa talai atu e Tomasi le talalelei i eria eseese. Sa ia onosaia faafitauli ina ua tutuliese faamalosi ai le Au Paia mai le Itumalo o Jackson, Misuri, ia Novema, 1833. Sa avea o ia ma se uluai sui o le au fautua maualuga a Misuri ina ua

faatulagaina ia Iulai 1834. Ina ua mavae lona valaauga o se Aposetolo ina ua 34 tausaga o lona soifua, sa avea loa o ia ma Peresitene o le Korama a le Toasefululua. E ui ina sa ia puipuia ma le faamaoni Iosefa Samita e faasaga i tagata tetee i taimi ua sola, ae sa iu ina faaseseina foi Tomasi lava ia. I le 1838 sa ia filifili ai e tuua le Ekalesia.⁴


Mai ia Tomasi Marsh e mafai ona tatou aoao ai, e le tatau ona taofia e tulaga le mautu i tatou mai faamanu-iaga o le talalelei—pe mai le faamanu-iaina o olaga o isi.

3. Ia Faaeteete: E Le Faapea a Lelei Tele se Tagata ona Le Pau Lea

O Lyman Johnson o le tagata aupito laitiiti lea o i latou na valaauna—sa 23 ona tausaga ma le fa masina i le taimi lea. Na faauuina o ia o se faitaulaga sili i na o ni nai aso talu ona atoa lona 20 i le 1831, ma na uma ona ia auauna atu i ni misiona mo le Ekalesia. Ao i ai i se tasi o nei misiona, sa ia talai atu ai se lauga na manatuaina o se “tasi o molimau aupito sili ona mamana e faatatau i le misiona a Iosefa Samita, ma le galuega maoae o aso e gata ai.”⁵

O le mea e faanoanoa ai, sa lei umi le auau-naga a Lyman o se Aposetolo. I le taimi o le vevesi i tulaga o le tamaoaiga i Katedani, Ohaio, i le 1837, sa liliu ma tetee atu ai o ia ia Iosefa Samita. Sa tape le igoa o Lyman [mai le Ekalesia] i le 1838.

E tusa lava po o le a le lelei na mafai ona ia talai atu ai, e tusa lava po o le a le tofi sa ia umia i le Eklesia, sa liliuese lava Lyman. Fai mai Polika Iaga, na toe tautino mulimuli ane e Lyman e faapea, maimau pe ana mafai ona ia talitonu pea i le talalelei: “Sa tumu au i le olioli ma le fafia. . . . Sa ou fafia i le ao ma i le po. . . . Ae o lenei ua pogisa, tiga, faanoanoa, ma pagatia e le gata mai.”⁶





4. E Le Faamautinoa Mai e le Usiusitai o le a Faigofie [le Olaga], ae e Matuai Aoga Lava

Ina ua uma ona faauuina Parley P. Pratt o se Aposetolo, o Oliva Kaotui, o se tasi o i latou sa tofia e fesoasoani e filifili le Au Aposetolo, sa [ia] tuuina atu se tiutetauave faapitoa ia Parley, ma faapea atu, o le a “oo i faafitauli lava e tasi ia na oo i Aposetolo anamua, i le faataunuuna o lana auaunaga.” Sa fai mai o ia o le a fetaiai Parley “ma falepuipui malolosi ma toese faanoanoa,” ae e le tatau ona faavaivai o ia i na tulaga, aua o tofotofoga o le a mafai ai ona ia “maua le mamalu” na teuina mo ia e le Alii.⁷

Sa mulimuli le soifuaga o Parley i lena mamanu. Sa i ai taimi na feagai ai o ia ma le mativa leagafaia. Sa tauemuina ao ia talai atu le talalelei. Sa faafalepuipuiina o ia i le 1838 ma le 1839 i tuuaiga o se taunuuga o faafitauli na feagai ma tagata o le Ekalesia i Misiuri. Ae sa maua foi e Parley faamanuiaga sa folafolina atu e Oliva. Sa ia tusia i se taimi e lei umi talu ona tatala mai le falepuipui, “O loo matou malolosi, ma manuia tele i le Alii, i le mavae ai o o matou faafitauli uma.”⁸

5. E Le Taua le Matua ae o le Faatuatua

O Orson Pratt, o le uso o Parley, o le tagata lea sa lona lua le laitiiti o le Au Apostolo. Na faauuina i le 23 [o ona tausaga], sa na o ni nai vaiaso na matua ai ia Lyman Johnson. O le tautua na uma ona tuuina atu e Orson i le Ekalesia ua tuuina mai ai se faataitaiga sili o le auala e mafai ona avea ai le autalavou matutua ma malosiaga mo le lelei.

Sa papatiso Orson i le aso 19 o Setema, 1830—o lona aso fanau lona 19. I se taimi puupuu mulimuli ane, na maua ai e Iosefa Samita se faaaliga mo ia na faapea mai, o Orson o se atalii o le Atua, na faamanuiaina o ia ona sa talitonu, ma o lona tiutetauave o le talaiina o le talalelei (tagai i le MF&F 34:3–6). O lea, sa tele ni misiona na auauna atu ai Orson, e aofia ai se misiona se tasi faatasi ma Lyman Johnson i le 1832, lea sa la papatisoina ia le toeitiiti 100 o tagata ma faauuina ni isi o toeaiina.

Ina ua valaaaina Orson e avea ma se Apostolo, sa lei i ai o ia i Katedani.

I le aso 23 o Aperila, 1835, i le aai o Kolomupasa, sa ia iloa ai sa manaomia lona i ai i se fonotaga i Katedani i le aso 26 o Aperila.

Sa alu faavave o ia iina e aunoa ma le iloaina o le faamoemoega o le fonotaga. Ma lona le iloaina ua valaaaina o ia o se Apostolo, sa ia savali atu ai i totonu a o “tatalo ma talotalo [le aofia] mo lona taunuu atu.”⁹ O le lagonaina o le lagolagosua o le Au Paia, na talia ai e Orson lona valaauga.

I le avea ai ma se Apostolo, sa ia saunia ai se tamaitusi na i ai le uluati tala na lomiaina o le Uluai Faaaliga a Iosefa Samita. I le avea ai o se paonia i le 1847, sa ia tausia ai se faamau-mauga auiliili o le savaliga umi i sisifo. Sa ia tusia foi le tele o tamaitusi a faifeautalai ma sa o se puipui malosi o le Tusi a Mamona.

Ua Ese Aso Nei . . . Po o Ua Ese Ea?

E tele itu, *ua* ese ai le autalavou matutua i aso nei nai lo le mea sa i ai i le 1835. Ae peitai, o nei lesona e mafai

ona fesoasoani i le autalavou matutua i aso nei i a latou taumafaiga e ola e tusa ai ma o latou gafatia. O se aotelega lenei:

- Afai e te lagonaina le faatauvaa, ia agai pea i luma.
- E tofu tagata uma ma luitau. E mafai ona e foia ou luitau.
- O le a sili atu lou fafia pe a tumau lou toaga i le Ekalesia.
- Tumau i le tuuto. Ia usitai ma faamaoni. O le a oo mai faamanuiaga.
- O loo ia te oe se mea taua e tuuina atu. O loo faamoemoe mai le Alii Ia te oe. ■

FAAMATALAGA

1. “Extracts from H. C. Kimball’s Journal,” *Times and Seasons*, Apr. 15, 1845, 868.
2. “Minutes, Discourse, and Blessings, 14–15 February 1835,” i le *The Joseph Smith Papers, Documents, Volume 4: April 1834–September 1835*, ed. Matthew C. Godfrey and others (2016), 229.
3. Tagai i le “History of Thos. Baldwin Marsh,” *The Deseret News*, Mar. 24, 1858, 18.
4. Tagai i le “History of Thos. Tagai i le “History of Thos. Baldwin Marsh,” *The Deseret News*, Mar. 24, 1858, 18; Kay Darowski, “The Faith and Fall of Thomas Marsh,” i le *Revelations in Context: The Stories behind the Sections of the Doctrine and Covenants*, Matthew McBride and James Goldberg, eds. (2016), 57–59.
5. Edward W. Tullidge, *Tullidge’s Histories* (1889), vol. 2 (supplement), 175.
6. Brigham Young, Discourse, June 17, 1877, i le *Journal of Discourses*, 19:41.
7. Oliver Cowdery, i le “Minutes and Blessings, 21 February, 1835,” i le *Joseph Smith Papers, Documents, Volume 4: April 1834–September 1835* 240–41.
8. “Letter from Parley P. Pratt, 22 November 1839,” josephsmithpapers.org/paper-summary/letter-from-parley-p-pratt-22-november-1839/1.
9. “Extracts from H. C. Kimball’s Journal,” *Times and Seasons*, Apr. 15, 1845, 869.

O Le Valaauna o Uluai Aposetolo o le Toefuataiga

I le aso 8 o Aperila, 1835, sa talosaga atu ai Iosefa Samita ia uso Polika ma Iosefa Iaga e pepese mai ia te ia. Ona maua ai lea e le Perofeta se faaaliga e faapea, ua oo i le taimi mo le valaauna o le Au Aposetolo e Toasefululu.¹

Sa talosaga atu Iosefa Samita ia Polika Iaga e auina atu se faaaliga e faapea, o le a tauaoia se konafesi i le Aso Toonai na sosoo ai. Sa ia tau atu ia Polika o le a avea o ia ma se tasi o le Toasefululu.²

I le ono aso mulimuli ane, sa faapopototoina ai le Au Paia. Na saunoa Iosefa Samita, o se tasi o faamoemoega autu o le fonotaga sa mo Molimau e Toatolu o le Tusi a Mamona o—Oliva Kaotui, Tavita Uitimera, ma Matini Harisi—“e filifilia ni tamalii se toasefululu mai le ekalesia e avea ma Aposetolo.”³ Na muamua maua e Oliva ma Tavita lena tofiga ia Juni 1829, ae e ui ina sa laua “fesili atu i le Alii e ala i le anapogi ma le tatalo” e faailoa mai le Toasefululu, peitai sa lei talafeagai ai i lena taimi.⁴ Na saunoa Iosefa, o lenei la ua oo mai le taimi.

O le Toasefululu (i le faasologa na fofoga atu ai i le fonotaga) o Lyman Johnson, 23 tausaga; Polika Iaga, 33; Heber C. Kimball, 33; Orson Hyde, 30; David W. Patten, 35; Luke Johnson, 27;

William E. McLellin, 29; John F. Boynton, 23; Orson Pratt, 23; William Smith, 23; Thomas B. Marsh, 34; ma Parley P. Pratt, 27. O i latou uma sa auauna atu muamua i ni misiona. E toavalu sa malaga faatasi atu ma Iosefa Samita i le vaega o le Tolauapiga a Siona i le taumafanafana na muamua atu.⁵

Ina ua maea lo latou tofiga, sa faapea loa ona faauuina ia Aposetolo taitoatas. ⁶ Sa faatumulua faamanuiaga o o latou faauuga i folafolaga o le manuia i le faafaifeatalai. Sa manatua mulimuli ane e Heber C. Kimball, sa “valoia [i faamanuiaga] le tele o mea o le a tutupu, e faapea, e tatau ona tatou maua le mana e faamalolo ai mai, e tulieseai tiapolo, faatutu mai e ua oti, faapupula e tauaso, . . . aveese ai mauga, ma o mea uma e tatau ona faalagolago ia i tatou e ala i le suafa o Iesu Keriso.”⁷

Sa faamamafa atu foi e Oliva Kaotui ia faafitauli o le a latou fetaiai: “Ia sau-nia i taimi uma e fai se osigataulaga *[sic]* o o outou soifua, pe a manaomia ai e le Atua i le agai i luma ma le atinaeina o lona faamoemoega.” Sa uunaia e Oliva le Au Aposetolo e saili le malamalamama patino e uiga ia Iesu Keriso ina ia mafai ona latou molimau atu ma le mautinoea e uiga i Lona i ai:

“Ia aua nei uma le taumafai seia oo ina outou vaai faafesagai ma le Atua.”⁸

Sa amata atu ia Me o le 1835, ona amatalia e le Au Aposetolo nisi o misiona talai mo le Ekalesia, ma sa faamanuiaina e la latou taitaiga lautele le toatele o tagata taitasi. ■

FAAMATALAGA

1. Tagai i le History, 1838–1856 (Manuscript History of the Church), volume B-1 [1 September 1834–2 November 1838], addenda, note A, page 1, josephsmithpapers.org/paper-summary/history-1838-1856-volume-b-1-1-september-1834-2-november-1838/304.
2. Tagai i le Joseph Young, *History of the Organization of the Seventies* (1878), 1.
3. “Minutes, Discourses, and Blessings, 14–15 February 1835,” i le *Joseph Smith Papers, Documents, Volume 4: April 1834–September 1835*, 224–28.
4. “Minutes and Blessings, 21 February 1835,” i le *Joseph Smith Papers, Documents, Volume 4: April 1834–September 1835*, 242, 243.
5. O le toafa sa lei avea ma vaega o le tolauapiga o David W. Patten, Thomas B. Marsh, William E. McLellin, ma John F. Boynton.
6. E na o le toaiva o le Toasefululu sa auai i le fonotaga i le aso 14 o Fepuari, 1835. Sa faauuina Parley P. Pratt i le aso 21 o Fepuari, 1835, ae o Thomas B. Marsh ma Orson Pratt sa faauuina faatasi i le aso 26 o Aperila, 1835.
7. “Extracts from H. C. Kimball’s Journal,” *Times and Seasons*, Ape. 15, 1845, 868.
8. “Minutes and Blessings, 21 February 1835,” i le *Joseph Smith Papers, Documents, Volume 4: April 1834–September 1835*, 244.

Ina ia aoao atili e uiga i le valaauga o uluai Aposetolo e Toasefululu i lenei tisipensione, asiasi i le **history.lds.org**.



**Saunia e Elder
David A. Bednar**

O Le Korama a Aposetolo
e Toasefululua

O Se **UIGAFAA-KERISO**

*O lesu, o le sa sili ona puapuagatia, ua silisili ona agaalofa
ia i tatou uma o e ua sili ona itiiti o tatou mafatiaga.*

Na aoao mai e Elder Neal A. Maxwell (1926–2004) se mataupu faavae na faagaeetia loloto ai au ma ua avea ma tauliga o le tele o au suesuega, manatunatuga, ma mafaufauga loloto. Sa saunoa o ia, “Semanu e leai se Togiola pe ana le seanoa le uiga o Keriso!”¹ Talu ona ou faalogo i lenei faamatalaga tuusao ma le anoa, ua ou taumafai ai lava e aoao atili i ai ma ia malamalama lelei i le upu “uiga.” Sa ou mafaufau loloto foi i le sootaga i le va o le uiga o Keriso ma Lana Togiola—ma aafiaga o lena sootaga mo i tatou taitoatas i le avea ai ma ni soo.

O le Uiga o le Alii o lesu Keriso

Atonu o le faailoga sili o le uiga o le mafai lea ona iloa ma tali lelei atu i isi tagata o e o loo feagai ma le luitau po o le faigata tonu lea e sili ona tuusao ma faamalosi le oo mai i o tatou luga. Mo se faataitaiga, ua faaalia le uiga i le mana e iloatino ai le mafatiaga o isi tagata ae o loo tatou mafatia foi i tatou lava; i le tomai e iloa ai le fiaaai o isi pe a tatou fiaaai; ma le mana e aapa atu ai ma faasafua atu galuega alofa mo le tiga faaleagaga o isi pe a tatou i ai i le totonugalemu o o tatou lava faanoanaga faaleagaga. O le mea lea, o le uiga e faaalia i le vaavaai atu ma le aapa atu i fafo atu ae o le tali masani ma le faalenatura o le manatu o le tagata ia te ia lava ma ona manaoga. Afai o se vaega lea o sea gafatia o le uiga faaletagata, ona avea lea o le Faaola o le lalolagi ma faataitaiga atoatoa o lena uiga e tumau ma e moni le alofa.





Faataitaiga o le Uiga o Keriso

I le afeafe aupito i luga i le po o le Tausamaaga Mulimuli, o le po tonu lea o le a Ia oo ai i puapuaga e sili le ogaoga e lei tupu lava i lalolagi uma sa foafoaina e Ia, sa fetalai atu ai le Alii e uiga i le Fesoasoani ma le manua:

“O mea ia ou te fai atu ia te outou manu o tatou o nonofo.

“A o le Fesoasoani, o le Agaga Paia lea, e auina mai e le Tama i lo’u igoa, o ia lava na te aoao ia te outou i mea uma lava, e faamanatu mai foi o ia ia te outou i mea uma ua ou fai atu ai ia te outou.

“Ou te tuuina atu ia te outou le manuia, o lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuatuvale o outou loto, aua foi tou te matatau” (Ioane 14:25–27).

O le silafaina o le a matuai aafia patino o Ia lava i le leai uma o le fesoasoani ma le manuia, ma i se taimi lea atonu na popole ma matau ai Lona loto, sa aapa atu ai le Matai ma ofo

atu i isi na lava faamanuiaga semanu e mafai ma o le a mafai ona faamalosia ai o Ia.

I le Tatalo maoae o le Faatoga, lea na fofogaina tonu lava a o lei maliu atu Iesu ma Ona sooo i le auvai o Katerno i le Faatoaga o Ketesemane, sa tatalo ai le Matai mo Ona sooo ma mo tagata uma “e faatuatua ia te au ona o la latou upu;

“Ina ia tasi i latou uma; faapei o oe, le Tama, o i totonus ia te au. . . .

“. . . Ina ia faaatoatoaina i latou ia tasi; ina ia iloa ai foi e le lalolagi, ma e auina mai au, ma e alofa mai ia te i latou, faapei ona e alofa mai ia te au. . . .

“Ua ou faailoa atu foi lou suafa ia i latou, ou te faailoa atu ai foi: ina ia i totonus ia te i latou lou alofa ua e alofa mai ai ia te au, o au foi i totonus ia i latou” (Ioane 17:20, 21, 23, 26).

Sa ou fesili faafia au lava i fesili nei ao ou mafaufau loloto i lenei mea ma isi mea na tutupu ao latalata atu i le taimi o Ona mafatiaga ma Lona

faalataina: Na mafai faapefea ona vave tatalo o Ia mo le manuia ma le lotogataso i isi e muamua atu i Ona Ia lava tiga? O le a le mea na mafai ai ona Ia sailia le fesoasoani ma le filemu mo i latou o o latou manaoga sa matuai itiiti atu nai lo Ona manaoga? A o fetaoomi atu i Ona luga le natura pau o le lalolagi na Ia foafoaina, na mafai faapefea ona Ia matuai uai atoatoa atu ma le faapitoa tele i luga o tulaga ma atugaluga o isi? Na mafai faapefea e le Matai ona aapa i tua atu ae o se tagata e maualalo atu semanu e manatu ia te ia lava? Ua tuuina mai i se faamatatalaga a Elder Maxwell le tali i fesili mamana taitasi nei:

“O uiga o Iesu na alagatatau ai ona tuuina mai le lagolagosua na manao-mia e faatino ai Lana togiola ofoofogia. Ana leai le uiga tulaga ese o Iesu, po ua le mafai ona i ai se togiola tulaga ese. O Lona uiga ua faapea ona Ia ‘[mafati] faaosoosoga o ituaiga eseese uma’ (Alema 7:11), ae sa ‘le gauai atu’ o Ia i faaosoosoga (MF&F 20:22).²

O Iesu, o le sa sili ona puapuagatia, ua silisili ona agaalofa ia i tatou uma o e ua sili ona itiiti o tatou mafatiaga. E moni lava, o le ogaoga o mafatiaga ma le agaalofa e mafana tele le fesoataiga ma le loloto o le alofa na lagolina e le tagata e faia le auaunaga.

Sailia Malosi o le Alofa Mama

E mafai ona tatou saili i le olaga nei ia faamanuiaina i le, ma atiniae elemene e tatau ai o se uiga faaKeriso.

E moni, e mafai e i tatou o tagata soifua ona taumafai i le amiontonu e maua meaalofa faaleagaga e o faatasi ma le gafatia e aapa atu ai i tua atu ma tali lelei atu i isi tagata o e o loo feagai ma le luitau po o le faigata tonu lea e sili ona tuusao ma faamalosi le oo mai i o tatou luga. E le mafai ona tatou maua se na gafatia e ala i le na o le finafinu po o le naunautai patino. Nai lo o lena, tatou te faalagolago i luga ma manaomia “galuega, ma le alofa mutimutivale, ma le alofa tunoa o le Mesia Paia” (2 Nifae 2:8). Ae o “lea fuaitau i luga o lea fuaitau, ma lea mataupu i luga o lea mataupu” (2 Nifae 28:30) ma “i le aluga o [le] taimi” (Mose 7:21), ona mafai lea ona tatou aapa i tua atu ao lilifa atu lo tatou tulaga faaletino i le liliu mai i totonu.

Sei ou fautua atu e faapea, e ao ia te oe ma au ona tatalo, faanaunau, taumafai, ma galulue e atiae se uiga faaKeriso pe afai tatou te faamoemoe e maua le meaalofa faaleagaga o le alofa mama—o le alofa mama lea o Keriso. O le alofa mama e le o se amioga po o se uiga tatou te maua faapitoa e ala i le faaalia o lo tatou lava filiga ma le naunautai. E moni, e tatau ona tatou faamamalu i a tatou feagaiga ma ola agavaa ma fai mea uma tatou te mafaia e agavaa ai mo le meaalofa; ae e iu ina maua i tatou e le meaalofa o le alofa mama—tatou te le mauaina (tagai i le Moronae 7:47). O le Alii e fuafuaina pe afai, ma po o afea foi tatou te maua ai meaalofa faaleagaga uma, ae e ao ona tatou faia



mea uma i lo tatou malosi ia mananao ai, moomoo, valaaulia, ma agavaa ai mo meaalofa faapena. A o faateleina lo tatou galulue i se agaga e talitutusa ma le uiga o Keriso, ona atonu lea o loo tatou faailoa atu i le lagi i se auala sili ona mamana lo tatou naunau mo le meaalofa paia faaleagaga o le alofa mama. Ma e manino lava e faamanuiaina i tatou i lenei meaalofa ofoofo-gia pe a faateleina lo tatou aapa i tua atu ae o le tagata natura o i totonu ia i tatou o le a masani lava ona liliu mai i totonu.

O Iesu o le Keriso o le Alo e Toatasi na Fanaua e le Tama Faavavau. Ou te iloa o loo soifua o Ia. Ma ou te molimau atu, o Lona uiga ua mafai ai ona tatou maua avanoa mo le tino ola pea ma le ola e faavavau. Tau ina ia tatou aapa atu i fafo e ui ina lilifa atu lo tatou tulaga faaletino i le liliu mai i totonu. ■

Mai se saunoaga na tuuina atu i le Tauaofiaga a Ekalesia i le Iunivesite o Polika Iaga-Idaho i le aso 25 Ianuari, 2003.

FAAMATALAGA

1. Neal A. Maxwell, “The Holy Ghost: Glorifying Christ,” *Ensign*, Julai 2002, 58.
2. Neal A. Maxwell, “O How Great the Plan of Our God!” (saunoaga i faiaoga faaleotu a le Ofisa o Aoga a le Ekalesia, Fep. 3, 1995), 6, si.lds.org.



O le Auala e Mafai ona

SUIA AI E SE SAVALI O LE KONAFESI LOU OLAGA



E mafai moni lava ona e avea atili e faapei o lesu Keriso. O le a fesoasoani meafaigaluega nei e te iloa ai le ala e mafai ai.

Saunia e Hadley Griggs

Oe lagonaina ua fai si maualalo o [lou] faaleagaga? E te ono manaomia sina taitaiga faaleagaga? Ia ua e laki la, aua o le konafesi aoao o le togafiti tonu a lena! Na saunoa mai Elder Robert D. Hales o le Korama a Apostolo e Toasefululu: “I tagata talavou o le Ekalesia, ou te folafola atu afai o le a outou faalogo [i le konafesi aoao], o le a outou lagonaina le faateleina o le Agaga i totonu o outou. O le a tau atu e le Alii ia te outou mea e finagalo o Ia ia outou faia i o outou olaga.”¹

Ma e le muta ai i le faaiuga o le vaivao o le konafesi—e mafai foi ona faaauau pea ona e lagona le Agaga e ala i le suesue i tautalaga pe a uma!

E tele auala e fesoasoani ai le konafesi ia i tatou. Atonu o le mea aupito taua, e mafai ai ona tatou latalata atili atu i le Faaola e ala i le aaoaina o i tatou i auala e avea atili ai e pei o Ia. O se auala sili ona lelei e aoao ai ni mea se tele mai le konafesi o le, uai faapitoa atu i aoaoga e uiga i uiga auaumama faaKeriso—po o le taimi o le faasalalauga pe ao e suesue mulimuli ane i tautalaga. A o e faalogo pe faiatua ma mafaufau i ni uiga auaumama patino faaKeriso, o le a mafai ona fesoasoani upu ma le Agaga e te iloa ai le ala e avea atili ai e pei o Keriso.

E mafai ona e faia le suega puupuu lenei e vaai ai po o le fea le uiga auaumama po ni [uiga auaumama] se lua e te manao e uai atu i ai ao e suesue i savali o le konafesi. (Mo se suEGA puupuu e loloto atu, tagai i le *New Era* Oketopa 2016 po o le mataupu e 6 o le *Tala'i La'u Talalelei*.)

Mo uiga auaumama faaKeriso taitasi e iva o loo i lalo, filifili le faamatalaga e sili ona faamatala ai oe.

1. FAATUATUA:

- a. Ou te le mautinoa pe o lesu Keriso o lo'u Faaola.
- e. Ou te talitonu ia lesu Keriso ma talia o la o lo'u Faaola.
- i. Ou te faamoemoe o lesu Keriso o lo'u Faaola.

I le aoga e i ai se vaega toalaiti o tamaiti e manatu le toatele o isi tamaiti aoga o le “au le taulia” ona e ese i latou. Sa le masani ona ou talanoa ia i latou. Sa ou le agaleaga, ae sa ou le amioolelei foi.

Ina ua ou faalogo i le lauga a Peresitene Dieter F. Uchtdorf, Fesoasoani Lua i le Au Peresitene Sili, “O Le e Alofa Atu e Alofaina Mai” (konafesi aoao ia Aperila 2012), sa i ai se mea na suia. Sa saunoa o ia, e i ai se mea e tasi e tatau ona tatou faia pe a oo i le faamasino atu: “Tuu loa!” Sa fesoasoani lana lauga ou te iloa ai, nai lo o le faamasino o nei tamaiti i le aoga, e tatau ona ou suia ou mafauauga ma lagona leaga i se “loto ua tumu i le alofa mo le Atua ma Lana fanau.”

O le Aso Gafua lena ina ua ou alu i le aoga, nai lo o le faatasi ma au uo masani, sa ou alu i le mea sa i ai le vaega lea sa manatu i ai tagata o le “au le taulia.” Sa amata ona matou talanoa ma ou iloa ai, o nei tagata sa leai se mea na ese ai mai se isi lava tagata. A o faaalu lou taimi ma i latou, sa ou atiina ae ai se sootaga malosi ma i latou. Ua ou maua ni uo fou se toalima.

Na ou iloa ai o au uo fou sa le o ni “au le taulia”—na taulia i latou i taimi uma i le Atua. Ua ou fiafia lava ua ou aoao atili e uiga i le alofa o le Atua mo Ana fanau.

Holly H., 19 tausaga, Kalefonia, ISA.



2. FAAMOE MOE:

- a. Ou te lagona le toofilemu ma le talitonu o le a lelei mea uma o le lumana!
- e. Ou te matuai fefe lava i le lumana!
- i. O le mea masani ou te le ano i le lumana!–afai ou te le mafaufau i ai, ou te le popole foi i ai.

3. ALOFA MAMA MA LE ALOFA:

- a. Ou te taumafai e alofa i isi tagata, ae e i ai a nisi o tagata e pei ua fai ma faasoesa ia te au.
- e. Ou te pisi tele i le taumafaiga e faaleleia lo'u lava olaga e faigata ai ona ou mafaufau i se isi lava tagata.
- i. Ou te naunau i le soifua manuia e faavavau ma le fiafia o isi tagata.

4. MAMA:

- a. “O le mama i mafauauga ma amioga.” E le foliga manaia lena mea!
- e. Ou te mama ma loto mama.
- i. E faigata ona ou mama ma ia le ponā.

5. MALAMALAMA:

- a. Ua tele naua au mea e fai e le mafai ai ona ou maua se taimi e sue ai tali o au fesili.
- e. Aue. Suesue? O nisi taimi e pei e 'iva le taumafai e aoao ni mea.
- i. Ou te saili faatauanau ia malamalama i upumoni ma sue tali i au fesili.

6. ONOSAI:

- a. E mafai ona ou faatali mo ni mea e aunoa ma le oso o le ita po o le fiafia.
- e. E matea e mafai ona ou faatali mo ni mea, ae e pei e oso ai lou ita.
- i. O le mea e sili ona leaga o le faatali mo ni mea. Ou te manao i mea uma i le taimi nei lava.

7. LOTOMAU ALALO:

- a. Ou te fia mautinoa e mafai ona ou faia e au lava ia mea uma.
- e. Ou te faalagolago i le Alii mo se fesoasoani.
- i. Pe a ou faia se mea, e masani ona galo ia te au e mafai ona ou ole atu i le Tama Faalelagi mo se fesoasoani.

8. FILIGĀ:

- a. Ou te faaaluina uma lou taimi i le matamata televisē, eva ma au uo, ma aloese mai tiutetauave!
- e. E masani ona faigata ona ou taulai atu i mea taua i lou olaga, ae ou te taumafai lava.
- i. E faaalu lou taimi ma le malosi i mea e aupito sili ona taua.

9. USIUSITAI:

- a. Ou te mulimuli ma le lotomalie i fautuaga a ou taitai ma matua.
- e. O le mea masani, ou te pule lava ia te au—E masani ona faigata ona ou faalogo i se isi lava tagata.
- i. Ou te mulimuli i fautuaga a ou taitai ma matua, ae o nisi taimi ou te faitio i ai.

ATINAEGA O LE ALOFA MAMA I LE VASEGA FAILI

Ia tagai i au tali. O le fea o uiga auaumama e te manao e galue i ai? Ina ia iloa le auala e atiina ae ai, e mafai ona e filifilia se [uiga auaumama] se tasi pe lua ma uai atu i ai ma le totoa ao e faalogo i le konafesi.

Ma afai na e tali o loo e lelei i le faia o mea uma, ia aveaveai ai pe! E mafai lava pea ona e filifilia se uiga auaumama se tasi pe lua na tumatilatila mai i le taimi o le suega puupuu ma taulai atu i ai i le taimi o au suesuega o le konafesi. Po o fea lava o e i ai i lau malaga o le avea e faapei o Keriso, e mafai lava ona e liliu atu i taimi uma i aoaoga a o tatou taitai, e fesoasoani atu ia te oe i lau faigamalaga.

Afai e le o mafai ona e filifilia se uiga auaumama i le taimi nei, aua le popole! E mafai lava ona e faalogo i le konafesi ma vaai ai po o le a se mea o tumatilatila atu i lena taimi.

O le taimi lava e te filifilia ai se uiga auaumama e te manao e taulai atu i ai, atonu e te manao e tusi i lalo ina ia e saunia e maua faaaliga e uiga i ai a o e faalogo i le konafesi pe ao e suesue mulimuli ane i tautalaga. Ao e faalogo ma suesue, ia faataga le Agaga e taiala oe i nisi o auala fitoitonu e mafai ona e galue ai i le uiga auaumama. Vaai foi laia le faataitaiga lea o loo i lalo! ■

E alala le tusitala i Iuta, ISA.

FAAMATALAGA


1. Robert D. Hales, "Konafesi Aoao: Faamalosia o le Faatuatua ma le Molimau," *Liahona*, Nov. 2013, 6.



I le konafesi aoao ia Oketopa 2015, sa tumatilatila mai ai ia te au se tasi o tautalaga faapitoa. Na tuuina mai ai e Elder Dale G. Renlund o le Korama a Aposestolo e Toasefululua se tautalaga na faaautuina "E Ala i Fofoga o le Atua." Sa ia saunoa mai i le taua o le vaaia o isi tagata e ala i fofoga o ni matua agaalofa. Ina ua ou faalogo i lena lauga, sa ou lagonaina na manaomia ona ou faia se taumafaiga atili e alofa atu ia i latou e siomia au.

I se tasi o taeao ina ua uma le konafesi, sa ou mataituna ai lava se taimi lelei e faafafia ai se tagata. Sa ou alu i lau vasega faili ma vaaia ai se tama sa masani ona ou le ano tele i ai. Sa mafai ona ou iloa sa i ai se mea sa le fiafia ai o ia, o lea na ou alu atu ai ma fesili pe na a mai lona aso. Sa le tautala soo o ia, o lea na ou fesili atu ai pe na fiafia i le vasega faili. Sa fai mai o ia, na te tau le iloa lelei le musika ma sa popole i le konaseti. Sa ou ofo atu ma te toe faataitaia faatasi, ma sa matalina faatasi le pese. Sa manaia i le faalogo! Ina ua uma lena, sa amata ona ma talanoa e uiga i a ma'uua mea faifaili. Ua sili atu ona ma vavalalata, ma ua ou fiafia lava ona sa ou faavanoa le taimi e talanoa ai ia te ia.

Christa M., 12 tausaga, Texas, ISA



Pipii MAU

Saunia e Lindsay Hiller

Sa ou ola ae faatasi ma ni uo o e o ni tagata o le Ekalesia, ma sa matuai ou fiafia lava e papatisoina ma avea foi au ma se tagata o le ekalesia. Ina ua ou siitia atu i le isi itu o le atunu mo le kolisi, sa amata ona fai au lesona e faifeautalai. O le mea sa faanoanoa ai, o faatosinaga mai i la'u tupulaga fou sa faigata ai ona ou mulimuli i tulaga faatonuina o le talalelei. Sa faalu e tamaiti aoga o le matou au tausaga muamua le tele o taimi i pati e inupia ai. Ou te lei inu muamua lava i se ava malosi, ae sa tauanau soo au e au uo e inu. Sa ou iloaina e moni le talalelei, ae sa faigata ona tetee atu i faaososoga mai i la'u tupulaga.

Sa amata ona ou tatalo i le Tama Faalelagi mo le malosi e fai ai filifiliga sao. Ou te lei tuuina i lalo ou tulaga faatonuina i le taimi lea, ae sa ou fefe ina nei ou le maua le malosi e teena ai le ava malosi i le isi taimi na ofofina mai ai. Sa ou misia au uo o e sa tutusa o matou tulaga faatonuina.

I le po o se tasi o Aso Toonai, sa matou o ai ma tagata o le matou au nofotumau i se pati. Sa vave ona inupia uma au uo ma uunaia au e faataitai la'u tofo muamua i le pia.

Na faaososoina au. Sa ou tago atu i le ipu pia sa tuuina mai ia te au. Sa ou tuuina faalatalata mai i lo'u gutu ma le le lagolelei ae sa ou fiafia i le gauai uma mai o au uo ia te au. Ona savali mai lea o Niki, o se tama sa ese le fiafia e inupia, i le matou faalapotopotoga.

“E te lei inuina le mea lena, a ea?” sa ia fesili mai ai.

“Leai, e lei inua,” sa ou tali atu ai.

“Afai e te inua,” sa fai mai ai Niki, “o le a e faanoanoa ai mo aso uma o totoe o lou olaga.”

Sa ou tei. Sa ou iloa sa sao o ia. Sa ou le fia inu Sa ou manao e auai i le Ekalesia. Sa ou toe faafoia atu le ipu ma ou aluese loa ma le pati, ma le loto faafetai ona sa ou le faia se faaiuga leaga.

*E faia e uo se eseesega tele i le
faigofie-po o le faigata-o lo tatou
ola ai i o tatou tulaga faatonuina.*



O le taeao na sosoo ai, sa ou alu ai i le lotu ma maua ai faifeautalai, ma faatulaga ai loa se aso mo lo'u papatisoga. Talu mai lava lena aso, sa ou aloaloese ai lava mai pati e i ai le ava malosi. Sa ou faia ni uo fou i le lotu, o e sa tutusa o matou tulaga faatauaina ma tulaga faatonuina. Sa matou faauo pea ma tagata o le matou au nofotumau, ae sa ou faamanino atu i ai ou tulaga faatonuina. Ina ua latou iloa le taua o ou tulaga faatauaina ia te au, sa latou faaaloalo i ai ma tuu le faaosoosina o au. Sa latou matauina ma faaaloalo [ia te au] i taimi ou te aluese ai mai le potu pe a latou matamata i ni ata tifaga pe faalogologo foi i ni musika e le talafeagai.

Sa faamalosia la'u molimau e ala i lenei aafiaga, ma o le a ou taumafai lava ia le tuuina i lalo ou tulaga faatonuina ona o faaosoosoga a le tupulaga. Ua ou iloa foi, o le auala sili ona lelei e faafetaiaia ai faaiuga faigata o le, ia iloa ou tulaga faatonuina ma pipii mau i ai mai lava i le amataga.

Ou te iloa na tali mai le Tama Faalelagi i au tatalo mo le malosi e tetee atu ai i faaosoosoga.

Ou te faafetai ona sa uunaia au e le Agaga Paia e fai le faaiuga sao. Ou te iloa, ua i ai iina tulaga faatonuina o le Ekalesia ina ia puipui ai i tatou, ma ou te faafetai ona o le filifili e mulimuli ai, sa fesoasoani ou te filifili ai e auai i le Ekalesia. ■

E alala le tusitala i Iuta, ISA.



O LE FAI ATU LEAI I LE FAAOSOOSOGA

“O i latou e faia le leaga latou te mananao ia e faatasi atu ma i latou aua o le a sili atu lo latou fiafia i mea o loo latou faia pe a faia foi e isi. Atonu foi o le a latou mananao e faaaogaina oe. O le mea masani lava le manao ina ia taliaina e lau tupulaga, ia avea ma se vaega o se faapotopotoga.... O se tasi o mea pito sili ona faigata ona e iloa, o lou malosi moni ua i ai ma le faaalo-alogiaina o oe e aunoa ma se leo e isi. E te le tau tuuina i lalo ou tulaga faatonuina ina ia talia oe e ni uo lelei. O le tele o lou usiusitai, o le tele o lou tu atu mo mataupu faavae moni, o le tele foi lena o le mafai e le Alii ona fesoasoani ia te oe e faatoilalo faaosoosoga.”

Elder Richard G. Scott (1928–2015) o le Korama a Aposetolo e Toasefululu, “O Fesili Tuga ma Tali Moni,” *Liahona*, Set. 1997, 29.

Momotu le Sitaili “MASANI A LE TUPULAGA”

Saunia e Charlotte Larcabal

Mekasini a le Ekalesia

Etele lava tala a le lalolagi e uiga i le tupulaga i aso nei. Atonu ua e iloa nisi o talitonuga masani pe ua e faalogo foi i se tasi o faitio e uiga i “tamaiti i aso nei.” Ua tele foi suesuega ma faamaumauga faafuainumera e uiga ia te outou—o a outou mausa i ala o fesootaiga faaagafesootai, o mea tou te faatauina mai, e oo lava foi i le po o le a le puupuu o le taimi tou te gauai atu ai [i se mea].

Ae fai mai Peresitene Russell M. Nelson, Peresitene o le Korama a Apostolo e Toasefululu, e “le toafimalie” o ia pe a faalogo i tagata sailili o faamatala a latou suesuega e faatatau i tagata talavou. “Ma o le mea moni lava,” sa ia fai mai ai, “ou te faale fiafia i mea e fai mai ai le *au popoto* e uiga ia te outou nai lo le mea ua tau mai e le Alii ia te au e uiga ia te outou.”¹

E le manaomia e le Alii ni suesuega po o ni talitonuga taatele ina ia iloa ai outou. Na te le manatu ia te outou o se fuainumera po o se tasi ua lofituina i le ala ua taumafai “le lalolagi” e faamatala ai outou.

Na saunoa Peresitene Dieter F. Uchtdorf, Fesoasoani Lua i le Au Peresitene Sili, “E alofa o Ia ia te oe e le gata mo le tagata ua i ai oe i lenei lava aso, ae faapena foi mo le tagata o le mamalu ma le malamalama lea e te maua ai le gafatia ma le manao e avea ai.”²

Faagalo mea o loo fai mai ai le lalolagi. E faapefea ona silasila mai le Tama Faalelagi ia te oe?



E le na ona vaai le Atua ia te oe; e alofa o Ia ia te oe.

E te manao e momotu le sitaili a le lalolagi? Ia amata ona e vaai ia te oe lava i le ala o loo silafia ai oe e le Tama Faalelagi ma Ana auauna filifilia. E te manao e talepe talitonuga taatele? O le taimi lenei e tulai ai ma gaoioi loa! I le avea ai ma se tama e 12-tausaga le matua, sa faamanatu atu ai e Keriso i Ona matua faalelalolagi, sa tatau ona Ia i ai “i le fale [pisinisi] a [Lona] Tama” (Luka 2:49).

Sa lei laitiiti tele o ia, ma e faapena foi ia te outou. O le isi la fesili lenei:

E mafai faapefea ona e i ai i le fale/[pisinisi] o lou Tama Faalelagi?

O Lona “fale/[pisinisi]” o le aumaia lea o “le tino ola pea ma le ola faavaau o le tagata” (Mose 1:39), e mafai la ona e i ai i le fale o lou Tama e ala i le faia o le mea sili e te mafaia ia ausia ai mea e te gafatia ma e ala i le avea ma se tasi e fesoasoani atu i isi ia ausia foi mea latou te gafatia.

O le taimi lenei e te nafa ai ma lou lava lumanai. O a ni mea e te faia *i le taimi nei* ia mautinoa o loo avea ai oe ma tagata ua silafia e le Tama Faalelagi e mafai ona e avea ai, e

*E mafai ona e ola e tusa ai ma Lana
silasila mamao e uiga i ou gafatia.*



O LOO OU AVEA MA TAGATA SILI ONA LELEI E ALA I LE ...

Aao e paketi? Faaleleia o la'u
suesuega o le talalelei? Atiina
ae se fiafia e auauna atu? Faasoai mai
pe o faapefea ona e pulea lou lava
lumanai e ala i le auina mai o se savali
i le liahona@ldschurch.org po o luga
o itulau LDS Youth Facebook po o le
Instagram.

le gata i le faavavaau, ae faapea foi i
lenei olaga?

E te fia faaipoipo i le malumalu?
Ia filifili nei ia mama [ou] mafaufauga,
upu, ma aga. O e fuafua e te aoga i
se iunivesite? Ia atinae i le taimi nei
ni tomai suesue lelei. E te manao e
auauna atu i se misiona? Faaopoopo
le *Tala'i La'u Talalelei* i au suesuega
o le talalelei (ae maise lava le mata-
upu e 3). E te manao e tausia se aiga?
Aoao nei i auala e maua ai ma tausia
se paketi.

E mafai foi ona e vaavaai i mea e te
maua ai le fiafia i le *taimi nei*. E te fia-
fia i le matematika? Taina o le piano?
Tusia o tala? Ia fai pea lava! Vai pe
i ai ni auala e mafai ona e alualu ai i
luma: i vasega i le aoga, aoaoga i luga
o le initoneti, tauvaga, aoaoga faama-
sani, ma isi mea faapena.

Momotu le sitaili ma talepe
talitonuga masani! Ia e
pulea lou lava lumanai.

O le a se mea o loo e faia
e avea ai oe ma tagata
sili ona lelei? Faailoa
mai ia i matou e ala
i le imeli mai i le
liahona@ldschurch.org
pe tuu se savali i luga
o itulau LDS Youth
Facebook po o le
Instagram. ■

FAAMATALAGA

- Russell M. Nelson, "Tutu Atu o ni Tagata Moni o le Meleniuma," *Liahona*, Oke. 2016, 46.
- Dieter F. Uchtdorf, "Ola Fiafia i le Talalelei," *Liahona*, Nov. 2014, 123.

ALU AE I LE FAATUATUA

Faamumu le afi o lou faatuatua ina ia alu ae i lugia atu o le toafa o le masalosalo.





**Saunia e Peresitene
Henry B. Eyring**

Fesoasoani Muamua
i le Au Peresitene Sili

O LE AUALA E TE ILOA AI MO OE LAVA

a matou uo talavou pele, o lo matou manao mo outou taitoatasi, ia outou iloa mo outou lava, tutoatasi mai soo se isi lava, e moni le Atua o le lagi, Na te silafia outou, ma na togolaina Lona Alo mo agasala a le Lalolagi.

O le matou faamoemoe ia e maua mo oe lava se molimau e le maluelue e faapea, ua toefuatai mai le talalelei a Iesu Keriso i luga o le fogaelele mo le taimi mulimuli. Sa tulaga ese lava le misiona a Iosefa Samita, peitai o lana tatalo faatauvaa o se faataitaiga aoga lea mo oe ma mo au. Sa agai atu Iosefa i le togavao e **tatalo ma le faatuatua** o le a tali mai se Atua agaalofa i lana tatalo ma tuumama ai lona le mautonu. Sa ia maua lena faamautinoaga e ala i le **faitavina o le afioga a le Atua** ma le **mauaina o se molimau** ua moni ia. Sa tatalo foi Iosefa ma le faamoemoe e le gata ia faalogo ae ia usitai, e tusa lava po o le a le fai-gata. Sa tuuto o ia e **faatino soo se mea o le a tau mai e le Atua** ia te ia.

I lena agaga, ou te fia tuu atu ai se luitau i le autalavou a le Ekalesia. O le lui-tau lenei: ia e iloa mo oe lava ia, ua moni nei mea. E mafai ona e faia lenei mea e ala i le mulimuli i le faataitaiga a Iosefa Samita: **suesue i tusitusiga paia**, ia oo upu i le taele o lou loto, **manatunatu** pea lava pea i ai, ona **ole atu lea i le Atua**, faatasi ma se naunautai e talia Lana taitaiga—ma le faamaoni, ia faia lava Lona finagalo.

E ui e foliga faigofie lenei valaaulia, ae ou te tautino atu e ono alu ai se tau-mafaiga tele. E le mafai ona ou folafola atu faapea o le a oo mai au tali i se aso se tasi pe i se vaiaso, ae e mafai ona ou folafola atu, o le a fetalai mai le Atua ia te oe i Lana lava ala ma i Lana lava taimi, pe afai e te ole atu i le faatuatua. Pe a e **talia ma galue i lenei valaaulia**, o le a e iloa ai, e le gata o le a oo mai tali, ae o le a e faavaeina ai se mamanu o le mauaina o le malamalamama faale-agaga lea o le a faamanuia ai oe mo aso o totoe o lou olaga. ■

*Mai se fuafuaga o le Faafesagaiga ia Mati 2017 jaatasi ma Peresitene Henry B. Eyring
ma Elder Jeffrey R. Holland.*



NA FAAPEFEA ONA E FAAAOGAINA LENEI MEA?

Manatu faaalia i le fuafuaga o le Faafesagaiga: "O le mea taua lava na faagaeetia ai au lava ia, o le manino o le taulai atu i le taua o le suesueina o a tatou tusitusiga paia ma tali e mafai ona tatou maua mai ai. Sa matuai ou fiafia lava foi i le soalaupulega o le mataupu o le tatalo ma le auala e tatau ona tatou o atu ai i le Atua pe a tatalo. Na ou iloaina o tatalo e mafai ma e tatau ona patino, ae e tatau ona tatou nofouta i le auala tatou te o atu ai i le Atua ma talanoa atu ai ia te la i le tatalo faaaloalo, o lo tatou Tama Faalelagi, ae le o se [tasi] o le tupulaga."

Joshua C., Hawaii, ISA

“E ese mai le tatalo ma le suesueina o tusitusiga paia, ole a se auala e sili ona lelei e faamalosia ai la’u molimau?”

Atonu o le a le oo mai uma i le taimi e tasi lau molimau. O le a tuputupu ae e tasi le aafiaga faaleagaga i le taimi—e pei ona fai mai tusitusiga paia o, “lea fuaitau i luga o lea fuaitau, ma lea mataupu i luga o lea mataupu” (2 Nifae 28:30). Ona tatau lea ona e faafaaileina ma faamalosia lau molimau, e pei lava o le tuputupu ae o se fatu (tagai Alema 32:28–43). Ma e pei lava ona leola se laau ititi i le nao le vai, e le nao le tasi foi se auala “sili ona lelei” e faamalosia ai lau molimau. E te manaomia se tuufatasiga o auala.

O le tatalo ma le duesueina o tusitusiga paia ua mautinoa lava o auala lelei ia e faamalosi ai lau molimau. Ao e duesue i le talalelei ma tatalo ma le manatu tonu i ai ina ia iloa e moni se mea, o le a fesoasoani le Agaga Paia ia e lagona le moni o le talalelei (tagai Moronae 10:4–5).

E mafai foi ona e faamalosia lau molimau e ala i le tausia o poloaiga. A e ola i se mataupu faavae o le talalelei—e pei o le anapogi, tausia o le aso Sapati ia paia, po o le tagofia o le faamanatuga—e amata ai ona e maua se molimau i le *faapefesa* ma le *aisea* e moni ai, nai lo nao le e moni. Ua fetalai mai Iesu, a e filifili e “fai lona finagalo,” o le a e “iloa le mataupu” (Ioane 7:17).

O le isi auala e faamalosia ai lau molimau e ala lea i le faaso atu. Na saunoa mai Peresitene Boyd K. Packer (1924–2015), le Peresitene o le Korama a Apostolo Toasefululua, “O se molimau e tatau ona *maua i le tuuina atu!*” (“The Candle of the Lord,” *Ensign*, Ian. 1983, 54; *Tambuli*, July 1983, 34). E mafai ona e faaso atu lau molimau i le lotu ma le seminare, i le aiga, ma i uo. Pe a e faia, o le a mafai ona molimau atu le Agaga Paia ia te oe e moni mea o loo e faasoaina atu.

Ao e faamalosia lau molimau i le tele o auala eseese, o le a tuputupu ae ma loloto atili ai, ma o le a e lagona le toofilemu ma le olioli.



Galulue faatasi ma Faifeautalai

O le galuega faafafeautalai o le auala sili lea ona lelei mo au e faamalosia ai lau molimau. O taimi uma lava matou te galulue ai ma faifeautalai, ou te lagona ai le alofa o Keriso.

Joy D., 19 tausaga, Leyte, Filipaina

Taumafai e Avea ma se Soo

E mafai ona e faamalosia lau molimau e ala i le taumafai e avea i taimi uma ma se soo moni o Iesu Keriso. O le usiusitai i poloaiga a le Atua tatou te totoga ai i a tatou molimau, ma faapena ai foi ona malolosi atili ai a tatou molimau ma saunia ai mo le malo o le Atua (tagai MF&F 76:79). E mafai foi ona e faamalosia lau molimau e ala i le faasoaina atu.

Elder Mule Simon, 23 tausaga, Misiona a le Ripapelika Temokarasi o Congo Lubumbashi

Faalogo i le Agaga Paia

O le alu i le lotu, faitauina o tusitusiga paia, faalogo i saunoaga o le konafesi, ma isi mea faapena, o le a fesoasoani e faamalosia ai lau molimau pe afai e te faalogo i le Agaga Paia. O le a Ia molimau atu i le moni ia te oe. Ia faalogo e le aunoa i le Agaga Paia, aua o loo i ai o Ia iina, ma o le a fesoasoani ia te oe e faamalosia lau molimau.

Alyssa B., 16 tausaga, Virginia, ISA





Alu i se Misiona.

O le alu i se misiona o le a faamalosia ai molimau mo oe lava ma mo isi e te aoaoina. O se misiona o le a e aoao ai e faalagolago atoa atu i le Alii ae e le o lo oe lava malosi. O se misiona o le a faamalosia ai oe, ma ao e auauna atu i le Alii ma fai lana galuega, o le a faamalosia ai lau molimau.

Elder Bailey Peaali'i Williams, 19 tausaga, Misiona a Sigapoa

Faasoa Atu le Mea Ua E Iloa e Moni

Ua ou iloa o se tasi o auala silisili lava e faamalosia ai la'u molimau o le faasoa atu lea i isi. O taimi uma lava ou te faasoa atu ai se mea ou te talitonu ma iloa ua moni—e tusa lava po o le a le faatauvaa e i ai—ou te lagonaina se mafanafana tele i lo'u fatafata, ma e o mai faatasi ai ma se faamautinoga tele i lo'u loto o na mea na ou fai atu ai ua moni! I se isi faaupuga, ou te lagona le faamalosia o la'u molimau.

Douglas S., 20 tausaga, São Paulo, Pasila



Avea Atili Faapei o Keriso

E mafai ona faamalosia a tatou molimau e ala i le avea atili e faapei o Keriso. Na ou faamalo-sia la'u molimau ina ua ou faaali atu le alofa mama o Keriso ma auauna atu i isi e pei ona sa faia e le Faaola.

Kyung Jin P., 17 tausaga, Seoul, Korea i Saute

Tuu Atu Lau Molimau

O se auala lelei e faamalosia ai lau molimau o le tuuina atu lea. O nisi taimi a faasoa atu lau molimau, e te maua ai. E mafai foi ona e anapogi ia iloa mo oe lava pe o sao mea na aoaoina ai oe. Sa ou faia uma nei mea, ma ua matuai faamalosia ai la'u molimau.

Porter S., 12 tausaga, Idaho, ISA



Auauna Atu i Isi

E ese mai le tatalo ma le suesueina o tusitusiga paia, ou te manatu, o le auala sili e faamalosia ai lau molimau e ala lea i le auauna atu. Pe a tatou auauna atu i isi, ua tatou faaali atu i le Atua tatou te alolofa i Ana fanau. Ma le isi, e mafai ona tatou maua le Agaga pe a o tatou faia le galuega a le Atua. Ou te iloa, e tele taimi na ou maua ai le mafanafana i taimi faigata ma tali i fesili a o [ou] faia ni auaunaga.

Caroline J., 18 tausaga, Iuta, ISA



FAFAGAINA O LAU MOLIMAU

"E pei o se laau ua tupu, [o se molimau] e tatau ona faafalele ne'i mamae.... O le usiusitai i poloaiga o se vaega o meaai e tatau ona e tuuina atu i lau molimau."

Pereitene Henry B. Eyring, Fesoasoani Muamua i le Au Pereitene Sili, "O Se Molimau Ola," Liahona, Me 2011, 125.

FESILI O LE A SOSOO AI

E mafai faapefea ona ou valaaulia le Agaga i totonu o lo'u aiga pe a tauaimisa ma fefi-nauai tagata?

Auina mai lau tali ma, afai e manaomia, se ata manino lelei ae lei oo i le aso 15 o Novema, 2017, i le liahona .lds.org kiliki le "Submit an Article" pe imeli mai i le liahona@ldschurch.org

Faamolemole ia aofia ai faamatalaga nei: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

E ono iloiloina tali mo le uumi po o le manino.

*Tatou te nonofo i
itu eseese o le lalo-
lagi, ae e tutusa o
tatou lagona pe a
lata mai ia i tatou
le mea e fausia ai
malumalu!*



O lou igoa o Rasela. Ou te nofo latalata i le Malumalu o Pale i Farani.

E taua tele le malumalu i lou aiga. A o lei fausia le Malumalu o Pale, e o ai ni malaga a o matou aiga i ni nai taimi o le tausaga i le Malumalu o Frankfurt Siamani. E 10 itula e tietie atu i ai ma le toe foi mai!

Sa matou fiafia e matamata i le faiga o le malumalu fou. O vaiaso uma lava pe a tuua le lotu, e faatietie atu ai i matou e o matou matua e vaavaai pe na a mai le aluga o lona fauga. Sa muamua lava ona latou talepeina i lalo se fale tuai ma eli se lua tele. Ona amata ai lea ona alu ae maua-luga le fausiga o le malumalu. E lei umi ae i ai loa iina le maota o le Alii!

Matou te fiafia ma nai ou tei e o atu i le malumalu. O lou uso matua, o ia la e muamua alu e fai papatisoga. O loo matou faatalitali uma ma le naunautai mo o matou taimi e o ai foi. Matou te alolofa i le malumalu ma fiafia i le i ai o se malumalu i lo matou lava aai!

Mai Pale

Mai i faatalanoaga na saunia e Amie Jane Leavitt, luta, ISA



*O le auala taviovio
i totonu o le Malu-
malu o Pale i Farani*



i Sapporo

TAMAI



O le moli i totonu o le potu selesitila o le Malumalu o Sapporo Iapani.



Olo'u igoa o Koshi. Ou te nofo latalata i le Malumalu o Sapporo Iapani. Ou te fiafia lava e nofonofo i talaane o le faamalamama i lo'u fale ma matamata atu i le fauina o le malumalu.

I le taimi o le fale tatala, sa ou valaaulia ai lau uo lelei lava matou te o. O lona manatu sa manaia mea uma.

Ou te fia mafaufau i le faapaiaga o le malumalu e faapea o lona aso fanau lea. O le aso foi lena o lo'u aso fanau. Ma o le aso soifua foi o Peresitene Monson! Sa mafai ona matou i ai ma ou matua i totonu o le malumalu i le taimi na faapaia ai.

Ou te faafetai lava i lo'u nofo latalata i le malumalu. A i ai ni ou aso faigata i le aoga, e mafai ona ou savali atu i le fale e ui atu i ona lotoa. Ou te lagona le alofa o le Tama Faalelagi ia te au pe a ou i ai iina. O loo ou tulimataia lava le taimi e mafai ai ona ou alu i totonu e fai papatisoga ma i se taimi mulimuli ane ia faaipoipo ai iina. ■



Saunia e Elder
Robert D. Hales

O Le Korama
a Apostolo e
Toasefululua

E mafai faapefea ona fesoasoani mai le Agaga Paia ia te au?

O le Agaga Paia o le tagata lona tolu lea o le Aiga Atua.
E molimau mai o Ia i le Tama Faalelagi ma Iesu Keriso.



Mai le "O Le Agaga Paia," Liahona, Me 2016, 105–107.

O LA TATOU ITULAU

TAMAITI




Faaaliga Vaaia a Liae, saunia e Maria V.,
10 tausaga, Pasila



Malumalu o Lima Peru, saunia e Valeria T., 9 tausaga, Peru



Malumalu o Guayaquil Ekuatoa, saunia
e Landys Z., 10 tausaga, Ekuatoa



Malumalu o Sate Leki, saunia
e Melissa L., 5 tausaga, ma
Ameila L., 2 tausaga, Esetonia



O Le Malaga a Sieni



Saunia e Jessica Larsen

E faavae i se tala moni

Niu Ioka, ISA, 1843

Sa vaavaai atu Sieni Manning i le tafetafea ese atu So le vaa mai le uafu e agai atu i le Vaituloto o Erie. Sa ia lagonaina le pei na tafetafea ese atu ai ma ana moemitiga.

Na faatoa tasi le tausaga ua tea talu ona auai o ia i Le Ekalesia a Iesu Keriso o le Au Paia o Aso e Gata Ai, ma na filifili ai e mei atu ina ia faatasi ma isi Au Paia i Navu. Sa latou malaga atu ma lona tina ma le toafitu o isi tagata o lona aiga i le Alavai i Erie e agai atu i Pafalo, Niu Ioka. Ae peitai, i Pafalo, sa le faatagaina ai i latou i luga o le vaa ona o le lanu o o latou pa'u.

"O le a le tatou mea o le a fai nei?" sa fesili lemu ane ai lona tuagane o Isaako.

Sa toe lagona siuleo o le fesili i le ea malulu. O Navu sa 800 maila (1,287 km) lona mamaao. Sa mafai lava ona togi o latou solo ma toe foi i le fale, pe taumafai foi e malaga i se taimi mulimuli ane. . . .

Ae sa le mafai ona faatali Sieni! Sa ia iloa na moni le Tusi a Mamona. Na toe fetalai mai le Atua e ala i pero-feta. Na manaomia ona latou oo atu ma lona aiga i Navu.

Sa faasasao e Sieni ona tauau ma tilotilo atu i sisifo. "Tatou savavali."

Ma sa latou savavali. Seia oo ina masaesae o latou seevae. Seia oo ina mavetevete ma tafetotoi o latou vae, ma sa tatau ona latou tatalo ina ia faamaloloina. O nisi taimi sa latou momoe ai i fafo, ma sa matuai mafafia lava le sau malulu ma sa pei o le toulu o le kiona. Sa faamatatau atu nisi o tagata e faafalepuipui i latou, ona na manatu o i latou o ni tagata pologa na sosola. Latou te lei iloa o le au aiga o Manning sa o se aiga uli saoloto. Ma sa latou savavali pea, ma pepese i viiga e faapasi ai le taimi.

Sa latou latalata atu i Navu ae latou tau atu loa i se vaitafe.

"E leai se auala laupapa," sa fai mai ai Isaako.

Sa luelue le ulu o Sieni. "Ia, o lona uiga o le a tatou asa atu ai." Ina ua laa o ia i totonu o le vai, sa oo le vai i ona tapuvae. Sa faasolosolo malie atu pea o ia i luma. Sa oo le vai i ona tulivae ma sa tea ma ona puimanava. E oo ane i le taimi na oo atu ai i le ogatotonu o le vaifate, ua tau le vai i lona ua! O le mea na laki ai, sa lei toesili atu se loloto o le vai, ma sa sopoia saogalemu uma le auaiga o Manning.

Ma na faapea ona latou taunu atu ai i Navu. Sa mafai ona iloa atu e Sieni ia puipui maaele matagofie o le Malumalu o Navu i luga o se maupuepue e iloa atoa atu ai le vanu. E ui lava ina sa lei uma i lena taimi, ae sa

maofa tele ai o ia. Sa taitai atu i latou e se tasi i le maota sa nofo ai le Perofeta o Iosefa.

Sa tu mai se tamaitai umi, lauulu uliuli i le faitotoa. "Susu mai i totonu, susu mai i totonu!" sa ia valaau mai ai. "O a'u o Ema Samita."

O nai isi minute na sosoo ai, sa nenefu. Sa feiloai atu Sieni i le Perofeta, ma sa ia faatulagaina ni nofoa faataamilo i le potu mo le auaiga uma o Manning. Sa saofai ifo ma le faafetai Sieni i le nofoa ma faalologo atu a o faailoa atu i latou e Iosefa i tagata uma sa i ai iina, e aofia ai lana uo o Dr. Bernhisel. Ona faliu ane lea o Iosefa ia Sieni, "O oe lea sa taitaia si vaega toaititi lenei a ea?" sa ia fesili atu ai.

"O lea lava, lau susuga!" na tali atu ai Sieni.

Sa ataata Iosefa. "Ia faamanua oe e le Atua! Ou te fia faalogo la i le tala i a outou malaga."

Sa faamatala atu Sieni e uiga i o latou vae na faamanualia ma le momoe i le kiona ma le sopoiaina o le vaitafe. Sa faalologo ma le filemu tagata uma. "Ae sa lei leaga," sa ia faamaeaina ai. "Sa matou o i le ala ma le olioli, ma pepese i viiga ma faafetai i le Atua mo Lona agalelei e le

uma ma le alofa mutimutivale ia i matou i le faamanuiaina o i matou, pui-puiua o i matou, ma le faamaloloina o o matou vae."

Sa faapea ona leai se pisa mo sina taimi. "O le a sou manatu i lena mea, Fomai?" Sa iu ina fai atu Iosefa, ma po le tulivae o le alii [fomai]. "Pe le o le faatuatua ea lena?"

"Ana faapea o au, tafefe ua ou toe solomuli ma toe foi atu i lo'u aigal!" O le tautino mai lea a Dr. Bernhisel.

Sa luelue le ulu o Iosefa ma toe liliu atu ia Sieni ma lona aiga: "Ia faamanua outou e le Atua. Ua outou i ai faatasi ma ni uo." ■

E alala le tusitala i Texas, ISA.



Sa nonofo faatasi Sieni Manning ma Ema ma losefa Samita mo ni nai masina. Sa faaipoipo o ia ia Isaako lakopo, ma o i lau o nisi o uluai tagata na nofoia le Vanu o luta. Sa tumau faamaoni o ia o se tagata o le Ekalesia e ui lava ina sa i ai ni ona luitau se tele. Ina ua maliu o ia i le 1908, sa sauna ai Peresitene Iosefa F.Samita i lona falelauasiga.

Sara ma le [Fa'aata] MRI

Saunia e Juliann Doman

E faavae i se tala moni

*"Sa folafola e Iesu, Na te auina mai,
o le Agaga Paia e fesoasoani mai"*
(Tusipese a Tamaiti, 56).

“E foliga mai e tatau ona fai se [fa'aata] MRI o Sara mo Elona papatua,” o le tala lea a Dr. Frank. Sa ataata atu o ia ia Sara. “O le a ou faatulagaina se fa'aata mo taeao. Ou te toe vave mai lava.”

Na fai si umi o fai ma tiga le tua o Sara. Ina ua ala ae i le taeao lena, sa matuai tiga tele na faigata ai ona tu sao i luga, ma sa tau le mafai ona savali. Na o mai Sara ma



lona tina e vaai Dr. Frank e fia iloa po o le a le mea na faaletonu.

“O se isi foi MRI” o le fesili lea a Sara, ma tilotilo atu ia Tina. Sa fai muamua foi sana MRI i se tasi o taimi. Na te manatua lona fefe i totonu o le pa’u tele lea na pueina ata o totonu o lona tino.

“Talofa e, Sara,” o le tala lea a Tina. “Ae o ata o le a fesoasoani ia Dr. Frank e iloa ai le mea o loo faaletonu o lou papatua. Ou te iloa e te mafai. Ma o le a ou i ai iina ma oe.” Na oomi e Tina le lima o Sara.

“Ae e le mafai ona ta o faatasi i totonu,” na fai atu ai Sara. Sa punou lona ulu, ma sa sisina ifo se loimata i lona alafau. E mafai ona la i ai faatasi ma Tina i totonu o le potu, ae o le taimi lava e alu ai Sara i totonu o le ana o le masini, o le a tuua toatasi loa nao ia.

Na fusi e Tina ia Sara. “E sa’o, ae e te iloa o ai e *mafai* ona i ai iina e faamafanafana ia te oe?”

Sa manatua e Sara se igoa sa faalogo i ai mo le Agaga Paia: *o le Fesoasoani*. Atonu e mafai ona fesoasoani le Agaga Paia ia ona le lagona tele le fefe.

“O le Agaga Paia?” Na fesili ai Sara.

Sa luelue le ulu o Tina. “E sa’o. E mafai ona e tatalo mo le Agaga Paia e fesoasoani atu ia te oe. O le a ma tatalo foi ma Tama mo oe.”

O lena mea na maua ai e Sara se manatu lelei lava. “E mafai ona ou fai ia Tama mo se faamanuiaga?”

Na ataata atu Tina. “Ioe. Ou te iloa o le a fiafia o ia e fai lena mea.”

O lena po, sa tuu ai e Tama ona lima i luga o le ulu o Sara ma tuu atu ia te ia se faamanuiaga faaleperisitua. Ina ua ia faamanuiaina Sara o le a faamafanafanaina o ia e le Agaga Paia, sa faapea ona faatumulia lona tino i se lagona mafanafana. Sa tumau ia te ia lea lagona i le po atoa.

O le aso na sosoo ai, sa taoto Sara i luga o le fata e faasee atu i totonu o le pa’u tele i le masini faata. Sa ia taulotoina i lona mafaufau upu na faaaoga e Tama i le taimi o lona faamanuiaga: *O le a i ai iina le Agaga Paia e faamafanafana ia te oe.* Na oomi mau e Sara le lima o Tina. Sa faasee atu o ia e le tausisoifua i totonu o le pa’u.

Sa fai e le masini fa‘ata ni leo malie ao ia pueina ata o lona papatua. Na tatau ona taoto filemu lelei Sara ina ia le nenefu ai ata. Sa popole o ia mo sina minute, ona



Analise F.,
6 tausaga,
Iuta, ISA

Ina ua lima ou tausaga, sa ou manaomia se taotoga e aveese ai o’u tonisili [tonsils] ma atinoi [adenoids]. Sa matuai ou popole lava ma fefe. Sa fai e lo’u tama lo’u faamanuiaga. Ina ua uma le faamanuiaga, sa ou le toe popole, ma sa ma fiafia uma ona sa ma lagonaina le Agaga Paia.

ia toe lagonaina ai lea o lena lagona mafanafana. Sa pei lava o se tasi o opo a Tina. Po o se palanikeke mafanafana. Sa ia iloa o le a lelei mea uma. Na te toe iloa ane, ua uma le faata!

I totonu o le ofisa o Dr. Frank, sa ia faaali atu ai ia Sara ma Tina ata o le papatua o Sara. “Ese lou lelei ma lou taoto filemu,” na fai atu ai Dr. Frank ia Sara ao tootuli atu o ia i ona autafa. “O ata nei o lou papatua ua faaalia ai, o le a e manaomia se taotoga e fesoasoani e te savali lelei ai.”

Na folo faua Sara.

“Matou te mananao e fai i se taimi lata mai le taotoga,” na fai atu ai Dr. Frank, ma tilotilo ae i le tina o Sara. Ona toe liliu atu lea ia Sara. “A uma lena, atonu e alu ni nai vaiaso ona faatoa e toe oo lea i le mea sa e i ai muamua, ae o le vaaia ai o oe i le aso, o le a e maoae lava.”


Sa taumafai Sara e mafaufau i mea uma o le a ia faia pe a uma ona faalelei e Dr. Frank lona papatua. *O le a mafai ona ou tamoe ma aau ma puna i totonu o se faaputuga tele o laulaau.* Ua ia misia lava le faia o na mea uma. Peitai, sa sili atu le taufaafefe o le taotoga nai lo o se MRI [fa‘ataa]! Ona manatua lea e Sara o ana tatalo ma lona faamanuiaga faapitoa. Na auina mai e le Tama Faalelagi le Fesoasoani ia te ia. O le a toe fesoasoani o ia ia te ia.

Sa tilotilo atu o ia ia Dr. Frank. “Ona mafai lea ona ou puna i totonu o se faaputuga tele o laulaau?” sa ia fesili atu ai.

Sa ataata o ia. “Ona mafai lea ona e puna i totonu o se faaputuga tele o laulaau.” ■
E alala le tusitala i Colorato, ISA.

O Se Perofeta Fou


*Oti ese faatusa nei e fesoasoani
e te faasoa atu ai tala o le
talafaa solo pito o le Ekalesia.*



Iosefa ma Ailama



Polika Iaga



I le 1844, na o atu ai Iosefa ma Ailama Samita i le Falepuipui i Karesasi e faatalitali ai mo se faamasinoga. Sa talepe faamalosi e ni tagata leaga le falepuipui ma fasiotia ai le Perofeta ma lona uso! Sa le mautinoa e le Au Paia po o ai le isi perofeta e tatau ona i ai. Mulimuli ane, i se fonotaga sa saunoa ai Polika Iaga, sa faapea ona tupu ai se vavega. E toatele tagata na fai mai, sa pei uma lava ona foliga ma lona leo o Iosefa Samita! Sa latou iloa o le a avea o ia ma perofeta e sosoo ai. Ua tatou iloa i aso nei, a maliu se perofeta, o le Peresitene o le Korama a Aposetolo e Toasefululua e avea ma perofeta e sosoo ai. ■

E mafai ona e maua isi faatusa o le talafaa solo pito o le Ekalesia i le liahona.lds.org.



FESOASOANI ATU e Tasi le Penitala i le Taimi

Saunia e Caleb H., 10 tausaga, Siamani

Sa amata muamua lava ina ua faatulaga e le matou siteki se galuega fesoasoani e fesoasoani ai i tagata sulufai. Sa ou fifia lava i le galuega fesoasoani, o lea na ou fai atu ai i lou tina e faamatala atu i lou faiaoga e uiga i ai, ma sa manao loa lou faiaoga e fai faatasi se mea ma le vasega fa. Ina ia faia se faataitaiga mo le galuega fesoasoani, sa ma o atu ai ma lou tuafafine o Mati i lea aiga ma lea aiga e talosagaina ni foai.

Na oo mai le aso e faaali atu ai le galuega fesoasoani i tamaiti uma o le vasega fa. Sa ou lagona sina fefe laitiiti. O le mea moni, sa matuai ou palaai lava, ae sa ou faia lava le mea sili na ou mafaia. Sa ou tau atu i isi tamaiti uma o le vasega fa, sa matou manaomia ni taga meaaoga mo tagata sulufai. Sa ou faamatala atu e uiga i le ma o i lea aiga ma lea aiga, ma tuu atu ia i latou se lui e taumafai ia sili atu i latou nai lo au i le mauaina o ni tupe. E silia ma le 100 ni taga [meaaoga] na matou faia faatasi. Sa matou tuuina i ai ni tamai api, penitala, ma isi sapalai o meaaoga. Sa matou faaopoopo foi i ai ma se faamatalaga puupuu e faapea, "Susu mai i Siamani."

Sa ma aveina atu ma lou tina ia taga i le tolauapiga o tagata sulufai. Ou te le faapea atu sa manai le tolauapiga, ae sa i ai se malae taalo, ma se vaega e aoao ai mataupu faaleatamai. Sa i ai se nofoaafi i talane o le tolauapiga lea sa matuai pao lava, ma sa fai mai tamaiti ia te au, sa pei lava o le pao o le felelei o vaalele tau i Syria ma isi nofoaga faapena. Atonu sa pei o le pao o pomu i tamaiti o e na faalogo i ai i o latou atunu moni.

Sa ou feiloai i nisi o tamaiti i le tolauapiga matou te tupulaga, e aofia ai Tanielu, o se tagata taalo lelei i le mu. Ou te lei maua se avanoa ma te mu ai ma ia, lea sa le manaia, ona ou te fifia foi i le mu, ae sa latou valaaulia au e taalo fisipolo [foosball] ma le ping-pong. Sa fai mai tama ia te au, na latou misia o latou aiga ma sa mananao lava e o ese mai le tolauapiga ae toe o i le aoga.

Ina ua uma ona matou taaalo fisipolo ma le ping-pong, sa ma tufatufaina atu loa taga [meaaoga]. Ua ou lagona le fifia ona ua mafai ona ou faia se mea agalelei mo tamaiti o loo nonofo i tolauapiga. ■



Na Asiasi Mai Iesu ia Iosefa Samita

Saunia e Kim Webb Reid

I ni tausaga se tele
ina ua mavae le toetu
o Iesu, sa faapea
ona i ai se fesili a se
taulealea e igoa ia
Iosefa Samita. Na
te lei iloa po o le
fea o lotu e tatau
ona alu i ai.




Sa faitau Iosefa i le
Tusi Paia. Na fai mai,
o le a tali mai e le Tama
Faalelagi a tatou fesili pe
afai tatou te tatalo atu
ia te Ia. Sa alu Iosefa i
le togavao ma tatalo atu
ai i le Tama Faalelagi.



Na afio ifo mai le lagile Tama Faalelagi ma Iesu. Sa fai mai Iesu, e le tatau ona alu Iosefa i soo se lotu lava, ona latou te lei aoaoina mea uma sa avea ma vaega o Lana Ekalesia.

Ina ua tuputupu ae Iosefa, sa fesoasoani o ia e toe aumai le Ekalesia a Iesu i le lalolagi. Ua ta'ua O Le Ekalesia a Iesu Keriso o le Au Paia o Aso e Gata Ai. E fesoasoani i tagata ia aoao e uiga ia Iesu ma le Tama Faalelagi.





O le faitau i tusitusiga paia e aoao mai ai ia te au mea se tele e uiga
i le Tama Faalelagi? A ou tatalo, e mafai foi ona tali mai o Ia. ■

O Le Sapati o se Aso Paia





Saunia e Peresitene
Thomas S. Monson

FESOASOANI I SE TASI I LE ASO

O i tatou o aao o le Alii. O loo faalagolago mai o la ia i tatou.

Ou te talitonu o le *faamoemoe* o tagata taitoatasi o le Ekalesia o le auauna atu lea ma ia fesoasoani ia i latou e puapuagatia. I le papatisoga na tatou osifeagaiga ai e “tauave avega a le tasi, ina ia māmā” [Mosaea 18:8]. Na faafia ona tuia lou loto ina ua e molimauina le tulaga manaomia o se tasi? E faafia ona e *faamoemoe* ia avea oe ma tagata e fesoasoani atu? Ae faafia ona faalavelavea le olaga i lea aso ma lea aso, ma e tuua ai i isi e fesoasoani atu, ma lou manatu e faapea, “oi e mautinoa lava o le a i ai se tasi e taulimaina lena manaoga.”

Ua faapea ona tatou popole i le pisi tele o o tatou olaga. Ae peitai, na tatau



ona tatou tutu ma vaavaai lelei lava i mea o loo tatou faia, ma atonu e iloa ai . . . ua faatele ona faaalu le tele o o tatou taimi, e fai ai mea e matua le aoga lava i le fuafuaga autu o le olaga, ma ua faatuatanai ai mea aupito sili ona taua. . . .

Ua siomia i tatou e i latou e manaomia lo tatou gauai atu, la tatou faamalosiau atu, la tatou lagolago, la tatou faamafanafana, lo tatou agalelei—pe o nisi o le aiga, uo, paaga, po o ni tagata ese. O i tatou o lima o le Alii i luga o le fogaeleele, ua i ai le tiutetauave e auauna atu ai

ma siitia Ana fanau. O loo faalagolago mai o Ia ia i tatou taitoatasi. . . .

Talosia ia tuia o tatou loto i upu o se viiga masani . . . :

Ua ou faia ea se lelei i le aso?

Ua ou fesoasoani ea?

Ua ou faafafia ea, i se ua faanoanoa?

A leai, ua le aoga.

Ua ou faamama i se ua mafatia

Ma faamafanafana i ai?

O e ua mama'i, ua ou tausia ea?

Ma faainu ma fasaga i ai?

[“Ua Ou Faia ‘Ea se Lelei?’ Viiga, nu. 136].

. . . Talosia ia tatou fesili ifo ia i tatou lava i le fesili . . . : “O Le a Se Mea Ua Ou Faia mo se Tasi i le Aso?” O la’u fautuaga i tagata o le ekalesia i le lalolagi atoa o le, ia sue se tasi o loo feagai ma se taimi faigata po o gasegase po o tuua toatasi, ma fai se mea mo ia i le aso. ■

Mai le “O Le a se Mea Ua Ou Faia mo Se Tasi i le Aso?” Liahona, Nov. 2009, 84–87.



FAAMANUIAGA,
NA SAUNIA E
LOUISE PARKER

"Ma o lo'u faamoemoe o le faia lea o mea mo la'u au paia, aua o mea uma e a a'u. . . .
"Aua ua tumu le lalolagi, ma ua lava ma totoe mea o i ai; ioe, na Ou saunia mea uma"
(MF&F 104:15, 17).

Ina ia aoao atili e uiga i le ola tutoatasí, tagai i itulau 32 ma le 40 i lenei lomiga.

Ei Ai Foi i le Lomiga Lenei

MO TALAVOU MATUTUA

O Lesona e Lima mo le Autalavou Matutua
mai Aposetolo Talavou

"E faamatalaina i tatou i faaiuga, ae le o tulaga": o le tasi o lesona e lima mai soifuaga o le toalima o uluai Apostolo e Toasefulua o le Toefuataiga—o e sa o ni talavou matutua. Faitau po o a isi lesona e mafai ona tatou aoao mai ia i latou.



i.44

MO LE AUTALAVOU



i.54


Auala e Mafai ai e se Savali o le
KONAFESI ona Suia
LOU OLAGA

O le konafesi aoao e sili atu nai lo o se fuafuaga—
o se avanoa e sui ai lou olaga.

MO TAMAITI

FESOASOANI ATU,
e Tasi le Penitala i le Taimi

E alala Caleb i Siamani. Sa manao o ia e fai se mea e fesoasoani ai i tamaiti i se tolauapiga o tagata sulufai e latalata atu ia te ia. O lea sa ia mafaufau ai i se fuafuaga.



i.75